


ইসলাম ও নৈতিক শিক্ষা

ষষ্ঠ শ্রেণি



জাতীয় শিক্ষাক্রম ও পাঠ্যপুস্তক বোর্ড, ঢাকা

জাতীয় শিক্ষাক্রম ও পাঠ্যপুস্তক বোর্ড কর্তৃক ২০১৩ শিক্ষাবর্ষ থেকে
ষষ্ঠ শ্রেণির পাঠ্যপুস্তকরূপে নির্ধারিত

ইসলাম ও নৈতিক শিক্ষা

ষষ্ঠ শ্রেণি

রচনা

মুহাম্মদ আবদুল মালেক

ড. মুহাম্মদ আব্দুর রশীদ

ড. মোহাম্মদ ইউছুফ

মুহাম্মদ ইউসুফ আলী শেখ

ইকবাল মোঃ জাহাঙ্গীর আলম শরীফ

সম্পাদনা

ডক্টর মো. আখতারুজ্জামান

মুহাম্মদ তমীযুদ্দীন

জাতীয় শিক্ষাক্রম ও পাঠ্যপুস্তক বোর্ড, ঢাকা

জাতীয় শিক্ষাক্রম ও পাঠ্যপুস্তক বোর্ড

৬৯-৭০, মতিঝিল বাণিজ্যিক এলাকা, ঢাকা ১০০০
কর্তৃক প্রকাশিত।

[প্রকাশক কর্তৃক সর্বস্বত্ব সংরক্ষিত]

পরীক্ষামূলক সংস্করণ

প্রথম প্রকাশ : সেপ্টেম্বর ২০১২

পাঠ্যপুস্তক প্রণয়নে সমন্বয়ক

রেবেকা সুলতানা লিপি
মো : আনিছুর রহমান

কম্পিউটার কমেপাজ

বর্ণনস কালার স্ক্যান

প্রচ্ছদ

সুদর্শন বাছার
সুজাউল আবেদীন

চিত্রাঙ্কন

আরিফুর রহমান তপু

ডিজাইন

জাতীয় শিক্ষাক্রম ও পাঠ্যপুস্তক বোর্ড

সরকার কর্তৃক বিনামূল্যে বিতরণের জন্য

মুদ্রণে :

প্রসঙ্গ-কথা

শিক্ষা জাতীয় জীবনের সর্বোত্তমুখী উন্নয়নের পূর্বশর্ত। আর দ্রুত পরিবর্তনশীল বিশ্বের চ্যালেঞ্জ মোকাবেলা করে বাংলাদেশকে উন্নয়ন ও সমৃদ্ধির দিকে নিয়ে যাওয়ার জন্য প্রয়োজন সুশিক্ষিত জনশক্তি। ভাষা আন্দোলন ও মুক্তিযুদ্ধের চেতনায় দেশ গড়ার জন্য শিক্ষার্থীর অন্তর্নিহিত মেধা ও সম্ভাবনার পরিপূর্ণ বিকাশে সাহায্য করা মাধ্যমিক শিক্ষার অন্যতম লক্ষ্য। এছাড়া প্রাথমিক স্তরে অর্জিত শিক্ষার মৌলিক জ্ঞান ও দক্ষতা সম্প্রসারিত ও সুসংহত করার মাধ্যমে উচ্চতর শিক্ষার যোগ্য করে তোলাও এ স্তরের শিক্ষার উদ্দেশ্য। জ্ঞানার্জনের এই প্রক্রিয়ার ভিতর দিয়ে শিক্ষার্থীকে দেশের অর্থনৈতিক, সামাজিক, সাংস্কৃতিক ও পরিবেশগত পটভূমির প্রেক্ষিতে দক্ষ ও যোগ্য নাগরিক করে তোলাও মাধ্যমিক শিক্ষার অন্যতম বিবেচ্য বিষয়।

জাতীয় শিক্ষানীতি-২০১০ এর লক্ষ্য ও উদ্দেশ্যকে সামনে রেখে পরিমার্জিত হয়েছে মাধ্যমিক স্তরের শিক্ষাক্রম। পরিমার্জিত এই শিক্ষাক্রমে জাতীয় আদর্শ, লক্ষ্য, উদ্দেশ্য ও সমকালীন চাহিদার প্রতিফলন ঘটানো হয়েছে, সেই সাথে শিক্ষার্থীদের বয়স, মেধা ও গ্রহণ ক্ষমতা অনুযায়ী শিখনফল নির্ধারণ করা হয়েছে। এছাড়া শিক্ষার্থীর নৈতিক ও মানবিক মূল্যবোধ থেকে শুরু করে ইতিহাস ও ঐতিহ্য চেতনা, মহান মুক্তিযুদ্ধের চেতনা, শিল্প-সাহিত্য-সাংস্কৃতিবোধ, দেশপ্রেমবোধ, প্রকৃতি-চেতনা এবং ধর্ম-বর্ণ-গোত্র ও নারী-পুরুষ নির্বিশেষে সবার প্রতি সমমর্যাদাবোধ জাগ্রত করার চেষ্টা করা হয়েছে। একটি বিজ্ঞানমনস্ক জাতি গঠনের জন্য জীবনের প্রতিটি ক্ষেত্রে বিজ্ঞানের স্বতঃস্ফূর্ত প্রয়োগ ও ডিজিটাল বাংলাদেশের রূপকল্প-২০২১ এর লক্ষ্য বাস্তবায়নে শিক্ষার্থীদের সক্ষম করে তোলার চেষ্টা করা হয়েছে।

নতুন এই শিক্ষাক্রমের আলোকে প্রণীত হয়েছে মাধ্যমিক স্তরের প্রায় সকল পাঠ্যপুস্তক। উক্ত পাঠ্যপুস্তক প্রণয়নে শিক্ষার্থীদের সামর্থ্য, প্রবণতা ও পূর্ব অভিজ্ঞতাকে গুরুত্বের সঙ্গে বিবেচনা করা হয়েছে। পাঠ্যপুস্তকগুলোর বিষয় নির্বাচন ও উপস্থাপনের ক্ষেত্রে শিক্ষার্থীর সৃজনশীল প্রতিভার বিকাশ সাধনের দিকে বিশেষভাবে গুরুত্ব দেওয়া হয়েছে। প্রতিটি অধ্যায়ের শুরুর শুরুতে শিখনফল যুক্ত করে শিক্ষার্থীর অর্জিতব্য জ্ঞানের ইজিত প্রদান করা হয়েছে এবং বিচিত্র কাজ, সৃজনশীল প্রশ্ন ও অন্যান্য প্রশ্ন সংযোজন করে মূল্যায়নকে সৃজনশীল করা হয়েছে।

ইসলামের মূল স্তম্ভ ও বিধানসমূহ শাস্ত্র ও অপরিবর্তনীয়। একবিংশ শতকের এই সূচনালগ্নে পরিবর্তিত সময়ের প্রেক্ষাপটে শিক্ষার্থীদের চাহিদা ও দৃষ্টিভঙ্গির ব্যাপক পরিবর্তনের পটভূমিতে ইসলামের শাস্ত্র বিধানসমূহকে জীবন ও কর্মে প্রতিফলিত করার প্রতি বিশেষ গুরুত্বারোপ করা হয়েছে। ইসলাম ধর্মের মানবতাবাদী জীবনদর্শনে অনুপ্রাণিত হয়ে শিক্ষার্থীরা দেশপ্রেমবোধ, সততা, ন্যায়নিষ্ঠা, সহনশীলতা, উদারতা, শ্রমের মর্যাদা, পরিবার ও সমাজের প্রতি কর্তব্য, গণতান্ত্রিক মূল্যবোধ, অসাম্প্রদায়িক জীবনবোধ ও সাম্যের চেতনায় উজ্জীবিত হয় সেই দিক বিবেচনায় রেখে ইসলাম ও নৈতিক শিক্ষা শীর্ষক পাঠ্যপুস্তকটি প্রণয়ন করা হয়েছে।

একবিংশ শতকের অঙ্গীকার ও প্রত্যয়কে সামনে রেখে পরিমার্জিত শিক্ষাক্রমের আলোকে পাঠ্যপুস্তকটি রচিত হয়েছে। কাজেই পাঠ্যপুস্তকটির আরও সমৃদ্ধিসাধনের জন্য যে কোনো গঠনমূলক ও যুক্তিসঙ্গত পরামর্শ গুরুত্বের সঙ্গে বিবেচিত হবে। পাঠ্যপুস্তক প্রণয়নের বিপুল কর্মসূচির মধ্যে অতি স্বল্প সময়ের মধ্যে পুস্তকটি রচিত হয়েছে। ফলে কিছু ভুলত্রুটি থেকে যেতে পারে। পরবর্তী সংস্করণগুলোতে পাঠ্যপুস্তকটিকে আরও সুন্দর, শোভন ও ত্রুটিমুক্ত করার চেষ্টা অব্যাহত থাকবে। বানানের ক্ষেত্রে অনুসৃত হয়েছে বাংলা একাডেমী কর্তৃক প্রণীত বানানরীতি।

পাঠ্যপুস্তকটি রচনা, সম্পাদনা, চিত্রাঙ্কন, নমুনা প্রশ্নাদি প্রণয়ন ও প্রকাশনার কাজে যারা আন্তরিকভাবে মেধা ও শ্রম দিয়েছেন তাঁদের ধন্যবাদ জ্ঞাপন করছি। পাঠ্যপুস্তকটি শিক্ষার্থীদের আনন্দিত পাঠ ও প্রত্যাশিত দক্ষতা অর্জন নিশ্চিত করবে বলে আশা করি।

প্রফেসর মোঃ মোস্তফা কামালউদ্দিন

চেয়ারম্যান

জাতীয় শিক্ষাক্রম ও পাঠ্যপুস্তক বোর্ড, ঢাকা।

সূচিপত্র

অধ্যায়	অধ্যায়ের শিরোনাম	পৃষ্ঠা
প্রথম	আকাইদ	১-১৭
দ্বিতীয়	ইবাদত	১৮-৪৩
তৃতীয়	কুরআন ও হাদিস শিক্ষা	৪৪-৭৭
চতুর্থ	আখলাক	৭৮-৯৭
পঞ্চম	আদর্শ জীবন চরিত	৯৮-১১২

بِسْمِ اللَّهِ الرَّحْمَنِ الرَّحِيمِ

প্রথম অধ্যায়

আকাইদ (الْعَقَائِدُ)

‘আকাইদ’ আরবি শব্দ। এটি বহুবচন। এর একবচন হলো- ‘আকিদাহ’ (الْعَقِيدَةُ) যার অর্থ বিশ্বাস। ইসলামের মৌলিক বিষয়সমূহের প্রতি বিশ্বাসকেই ‘আকাইদ’ বলা হয়। যেমন- আল্লাহ, নবি-রাসুল, ফেরেশতা, আসমানি কিতাব, পরকাল ইত্যাদির প্রতি বিশ্বাস স্থাপন করা।

এ অধ্যায় শেষে শিক্ষার্থী -

- আকাইদের ধারণা বর্ণনা করতে পারবে।
- তাওহিদের (একত্ববাদ) ধারণা ও প্রয়োজনীয়তা ব্যাখ্যা করতে পারবে।
- অর্থসহ কালেমা তায়্যিবা ও কালিমা শাহাদাত শুদ্ধ উচ্চারণে পড়তে, বলতে ও ব্যাখ্যা করতে পারবে।
- ইমান মুজমাল (ইমানের সংক্ষিপ্ত পরিচয়) অর্থসহ শুদ্ধ উচ্চারণে পড়তে, বলতে ও ব্যাখ্যা করতে পারবে।
- আল্লাহর কতিপয় গুণবাচক নামের অর্থ ব্যাখ্যা করতে পারবে।
- রিসালাতের ধারণা ও প্রয়োজনীয়তা ব্যাখ্যা করতে পারবে।
- আখিরাত ও নৈতিকতার ধারণা ব্যাখ্যা করতে পারবে।
- নৈতিকতা উন্নয়নে ‘আকাইদ’-এর গুরুত্ব বিশ্লেষণ করতে পারবে।

পাঠ ১

তাওহিদ (تَوْحِيدٌ)

তাওহিদের অর্থ

তাওহিদ (تَوْحِيدٌ) আরবি শব্দ। বাংলা ভাষায় একে বলা হয় একত্ববাদ। আল্লাহ তা‘আলাকে এক ও অদ্বিতীয় সত্তা হিসেবে বিশ্বাস করাকে তাওহিদ বা একত্ববাদ বলা হয়। আল্লাহ তা‘আলাই একমাত্র সৃষ্টিকর্তা, পালনকর্তা, রিযিকদাতা। তিনি ব্যতীত ইবাদতের যোগ্য কেউ নেই। তিনিই হলেন একমাত্র ইলাহ। আল্লাহ তা‘আলার প্রতি একপ বিশ্বাসই হলো তাওহিদ।

আল্লাহ তা‘আলার পরিচয়

আল্লাহ তা‘আলা এক ও অদ্বিতীয়। তিনি সত্তাগতভাবে যেমনি একক, তেমনি গুণাবলিতেও তুলনাহীন। অর্থাৎ মহান আল্লাহ একক সত্তা। তাঁর কোনো সমকক্ষ নেই। তিনি কারো সন্তান নন। আবার কেউ তাঁর সন্তানও নয়।

গুণাবলির দিক থেকেও মহান আল্লাহ অদ্বিতীয়। তিনি সকল গুণের আধার। তিনি চিরস্থায়ী, চিরঞ্জীব, শাস্ত ও সত্য। তিনি সৃষ্টিকর্তা, পালনকর্তা, রক্ষাকর্তা, পুরস্কারদাতা, শাস্তিদাতা ইত্যাদি। তিনি ‘লা শারীক’। তাঁর সমান বা সমকক্ষ কেউ নেই। তাঁর গুণাবলির সাথে কোনো কিছুই তুলনা করা যায় না। তাঁর তুলনা একমাত্র তিনি নিজেই।

তাওহিদের তাৎপর্য

আমরা আমাদের চারপাশে নানারকম জিনিস দেখতে পাই। সুন্দর সুন্দর ফুল-ফল, গাছপালা, তরলতা, পশু-পাখি ইত্যাদি। এছাড়া রয়েছে নদী-নালা, পাহাড়-পর্বত, বন-জঙ্গল, সাগর-মহাসাগর। আরও আছে বিশাল আকাশ, চন্দ্র-সূর্য, গ্রহ-নক্ষত্র ইত্যাদি। আমরা খালি চোখে দেখতে পাই না এমন অনেক বস্তু এবং প্রাণীও রয়েছে। এসব কিছুই সৃষ্টিজগতের অন্তর্গত। এগুলো সৃষ্টিকর্তা ছাড়া নিজ থেকে সৃষ্টি হয়নি। নিশ্চয়ই একজন স্রষ্টা এগুলো সৃষ্টি করেছেন। তিনি হলেন মহান আল্লাহ। তিনি একাকী সবকিছু সৃষ্টি করেছেন। তাঁর কোনো সাহায্যকারীর প্রয়োজন হয়নি। তিনি 'হও' (কুন) বলার সাথে সাথেই সবকিছু সৃষ্টি হয়ে যায়।

বিশ্বজগতের সবকিছুই তিনি মানুষের কল্যাণের জন্য সৃষ্টি করেছেন। মানুষ জ্ঞান-বুদ্ধি প্রয়োগ করে এগুলো থেকে উপকার লাভ করে। সুতরাং মানুষের উচিত তার স্রষ্টার প্রতি কৃতজ্ঞতা প্রকাশ করা। এক আল্লাহ তা'আলার আনুগত্য ও ইবাদত করা। তাঁর ইবাদতে অন্য কাউকে শরিক করা যাবে না। এভাবে মহান আল্লাহর তাওহিদ বা একত্ববাদের প্রতি অনুগত হলে মানুষ দুনিয়া ও আখিরাতের জীবনে কল্যাণ ও সফলতা লাভ করতে পারে।

তাওহিদে বিশ্বাসের প্রয়োজনীয়তা

তাওহিদ বা আল্লাহ তা'আলার একত্ববাদে বিশ্বাস আকাইদের সবচেয়ে গুরুত্বপূর্ণ বিষয়। ইমান ও ইসলামের মূলভিত্তি হলো তাওহিদ। তাওহিদে বিশ্বাস না করলে কেউ মুমিন বা মুসলিম হতে পারে না। পৃথিবীতে আগত সকল নবি-রাসূল (আ.) তাওহিদের দাওয়াত দিয়েছেন। সকলেই ঘোষণা করেছেন যে- আল্লাহ তা'আলা এক ও অদ্বিতীয়। তাঁর তুল্য কিছুই নেই। তাওহিদে বিশ্বাস মানুষকে দুনিয়াতে কল্যাণ দান করে। আর তাওহিদে বিশ্বাসীগণ আখিরাতে জান্নাত লাভ করবেন।

তাওহিদে বিশ্বাসের উদাহরণ

আমরা সকলেই হযরত ইবরাহিম (আ.) এর নাম শুনেছি। তিনি ছিলেন একজন নবি ও রাসূল। তিনি এক মূর্তিপূজক পরিবারে জন্মগ্রহণ করেন। তাঁর পিতা ছিলেন মন্দিরের পুরোহিত। তাঁর সময়ের লোকজন আল্লাহ তা'আলার একত্ববাদে বা তাওহিদে বিশ্বাস করত না। বরং তারা মূর্তিপূজা করত। তাদের রাজা নমরুদের উপাসনা করত। হযরত ইবরাহিম (আ.) এসব করতেন না। তিনি ভাবলেন মূর্তি বা নমরুদ কোনো কিছুর স্রষ্টা হতে পারে না। কেননা এগুলো নিজেরাই ধ্বংসশীল। সুতরাং এদের উপাসনা করা ঠিক নয়।

এভাবে তিনি স্রষ্টা সম্পর্কে চিন্তা করতে লাগলেন। প্রথমে তিনি ভাবলেন যে আকাশের তারকা, চন্দ্র, সূর্য ইত্যাদি হয়তো মানুষের সৃষ্টিকর্তা। কিন্তু এগুলো একে একে অদৃশ্য হয়ে গেলে তিনি বুঝতে পারলেন যে এগুলো মানুষের ইলাহ নয়। কেননা এগুলো কোনোটাই স্থায়ী নয়। বরং এরা অন্ত যায়, অদৃশ্য হয়। বরং এ সবকিছু যিনি সৃষ্টি করেছেন এবং সুন্দরভাবে পরিচালনা করেন তিনিই ইলাহ, তিনিই মাবুদ। অতঃপর তিনি সে অদৃশ্য সত্তার প্রতি ইমান আনলেন ও তাওহিদে বিশ্বাস স্থাপন করলেন। এভাবে বিশ্বজগতের নানা সৃষ্টির প্রতি লক্ষ্য করে হযরত ইবরাহিম (আ.) মহান আল্লাহর একত্ববাদের সাক্ষ্য প্রদান করলেন।

অতএব তাওহিদ অর্থ একত্ববাদ। আল্লাহ তা'আলা তার সত্তা ও গুণাবলিতে এক ও অদ্বিতীয়। আমরা তাওহিদে বিশ্বাস করব এবং সে অনুযায়ী আমল করব। আল্লাহ তা'আলার সাথে কোনো কিছুকে শরিক করব না।

কাজ : শ্রেণির সব শিক্ষার্থী দুই দলে ভাগ হয়ে যাবে। একদল তাওহিদের পরিচয় ও তাৎপর্য সম্পর্কে বলবে। অন্যদল একটি উদাহরণের মাধ্যমে তাওহিদে বিশ্বাসের গুরুত্ব সম্পর্কে বলবে।

পাঠ ২

কালিমা তায়্যিবা

কালিমা তায়্যিবা (كَلِمَةٌ طَيِّبَةٌ)

لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

উচ্চারণ : লা ইলাহা ইল্লাল্লাহু মুহাম্মাদুর রাসুলুল্লাহ

অর্থ : আল্লাহ ছাড়া কোনো মাবুদ বা ইলাহ নেই, মুহাম্মদ (স.) আল্লাহর রাসুল।

তাৎপর্য

কালিমা তায়্যিবা অর্থ হলো পবিত্র বাক্য। এটি তাওহিদ, ইমান ও ইসলামের মূলভিত্তি। এ কালিমা স্বীকার না করলে কেউ ইসলামে প্রবেশ করতে পারে না। এ কালিমার দু'টি অংশ। প্রথম অংশ : لَا إِلَهَ إِلَّا اللَّهُ (লা ইলাহা ইল্লাল্লাহ) অর্থ : আল্লাহ ছাড়া কোনো মাবুদ বা ইলাহ নেই। অর্থাৎ পৃথিবীতে ইলাহ বা ইবাদতের যোগ্য একমাত্র আল্লাহ তা'আলা। তিনি ব্যতীত আর কেউ উপাস্য হতে পারে না। চন্দ্র, সূর্য, তারকারাজি, পাহাড়-পর্বত, বাঘ-সিংহ, রাজা-বাদশাহ কেউই ইবাদতের যোগ্য নয়। বরং এসবের সৃষ্টিকর্তা আল্লাহ তা'আলাই হলেন একমাত্র মাবুদ। তাকে ছাড়া আর কারো ইবাদত বা উপাসনা করা যাবে না। এমনকি তাঁর ইবাদতে অন্য কাউকে শরিক করাও যাবে না। আরবি 'লা ইলাহা' শব্দের অর্থ কোনো ইলাহ নেই; আর 'ইল্লাল্লাহ' অর্থ আল্লাহ ছাড়া। কালিমার এ অংশটি না-বোধক শব্দ দ্বারা শুরু করা হয়েছে। এটি খুবই গুরুত্বপূর্ণ। আমরা কোনো পাত্রে ভালো কিছু নেওয়ার আগে প্রথমে ঐ পাত্রটি খালি করে ফেলি। যেন ঐ জিনিসটি অন্য কিছুর সাথে মিশ্রিত না হয়। একটি উদাহরণ দিলে বিষয়টি বুঝা যাবে। যেমন- একটি গ্লাসে পানি রয়েছে। তুমি যদি ঐ গ্লাসে দুধ নিতে চাও তাহলে কী করবে? প্রথমে গ্লাসের পানিটুকু ফেলে দেবে। তাই না? এরপর খালি গ্লাসে দুধ নেবে। গ্লাসে পানি রেখে দিয়ে তাতে দুধ নিলে দুধ আর পানি মিশ্রিত হয়ে যাবে। ফলে দুধের গুণাগুণ নষ্ট হয়ে যাবে। তদ্রূপ তাওহিদে বিশ্বাসের জন্য প্রয়োজন পবিত্র অন্তর। অর্থাৎ প্রথমে অন্তর থেকে সব রকমের ভুল ও ভ্রান্ত বিশ্বাস দূর করতে হবে। 'লা ইলাহা' দ্বারা এটাই করা হয়। অতঃপর ইল্লাল্লাহু দ্বারা আল্লাহ তা'আলার প্রতি বিশ্বাস স্থাপন করা হবে।

আমাদের প্রিয় নবি হযরত মুহাম্মদ (স.) যখন মক্কা নগরীতে ইসলাম প্রচার শুরু করেন, তখন আরবের লোকেরা ছিল মূর্তিপূজক। তারা নানারূপ মূর্তি, গাছ-পালা, চন্দ্র-সূর্য, পাহাড়-পর্বত ইত্যাদির পূজা করত। এজন্য রাসুল (স.) এ কালিমার দাওয়াত দেন। ফলে আরবের লোকজন মূর্তিপূজা থেকে অন্তরকে পরিষ্কার করে আল্লাহ পাকের প্রতি বিশ্বাস স্থাপন করে।

দ্বিতীয় অংশ : مُحَمَّدٌ رَّسُولُ اللَّهِ (মুহাম্মাদুর রাসুলুল্লাহ) অর্থ : মুহাম্মদ (স.) আল্লাহর রাসুল। অর্থাৎ মুহাম্মদ (স.)

আল্লাহ তা'আলার প্রেরিত সত্য নবি ও রাসুল। এ কথার উপর বিশ্বাস স্থাপন করা। কালিমা তায়্যিবাবার প্রথম অংশের প্রতি বিশ্বাস স্থাপন করা যেমন জরুরি, দ্বিতীয় অংশের প্রতি ইমান আনাও তেমনই আবশ্যিক।

আল্লাহর একত্ববাদ বিশ্বাসের পাশাপাশি মহানবি হযরত মুহাম্মদ (স.)-এর প্রতিও বিশ্বাস স্থাপন করতে হবে। কেননা তাঁর মাধ্যমেই আমরা আল্লাহ পাকের পরিচয় লাভ করি। তিনিই আমাদের নিকট আল্লাহ তা'আলার বাণী পৌঁছে দিয়েছেন। ভালো-মন্দ, সত্য-মিথ্যা ইত্যাদি তিনিই আমাদেরকে শিক্ষা দিয়েছেন। আর এসব তিনি নিজ থেকে শিক্ষা দেননি। বরং মহান আল্লাহর নির্দেশেই শিক্ষা দিয়েছেন। সুতরাং, আমরা বিশ্বাস করব যে, হযরত মুহাম্মদ (স.) আল্লাহ তা'আলার মনোনীত বান্দা। তিনি নবি ও রাসুল। তিনি যে বাণী নিয়ে এসেছেন তা আল্লাহ তা'আলার পক্ষ হতে অবতীর্ণ। যাতে রয়েছে মানুষের জীবন পরিচালনার যথার্থ বিধি-বিধান।

কালিমা তায়্যিবা ইমানের মূলভিত্তি। অতএব, আমরা শুদ্ধভাবে এ কালিমা পড়ব। এর অর্থ বুঝে আন্তরিকভাবে বিশ্বাস করব এবং এর মর্মানুসারে জীবনের সকল কাজ পরিচালনা করব।

কাজ : শিক্ষার্থীরা প্রত্যেকে বাড়ি থেকে বড় একটি কাগজে 'কালিমা তায়্যিবা' অর্থসহ লিখে একটি পোস্টার তৈরি করে নিয়ে আসবে এবং শ্রেণিতে উপস্থাপন করবে।

পাঠ ৩

কালিমা শাহাদাত (كَلِمَةُ شَهَادَةِ)

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَ أَشْهَدُ أَنَّ مُحَمَّدًا عَبْدُهُ وَرَسُولُهُ -

উচ্চারণ : আশহাদু আল্ লা-ইলাহা ইল্লাল্লাহু, ওয়াহদাহু, লা শারিকালাহু, ওয়া আশহাদু আন্না মুহাম্মাদান আবদুহু ওয়া রাসুলুহু।

অর্থ : আমি সাক্ষ্য দিচ্ছি যে, নিশ্চয়ই আল্লাহ ছাড়া আর কোনো ইলাহ নেই। তিনি একক, তাঁর কোনো শরিক নেই। আমি আরও সাক্ষ্য দেই যে, নিশ্চয়ই মুহাম্মদ (স.) আল্লাহর বান্দা ও রাসুল।

তাৎপর্য

কালিমা শাহাদাত হলো- সাক্ষ্য দানের বাক্য। অর্থাৎ এ কালিমা দ্বারা ইমানের সাক্ষ্য দেওয়া হয়। আমরা এ কালিমা উচ্চারণের মাধ্যমে আল্লাহ তা'আলার একত্ববাদ ও মুহাম্মদ (স.)-এর রিসালাতের সাক্ষ্য প্রদান করি।

আল্লাহ তা'আলা আমাদের সৃষ্টি করেছেন। তিনি আমাদের রব। তিনি আমাদের রিযিক দেন, প্রতিপালন করেন, সুস্থতা দান করেন। তিনি আমাদের নানারূপ নেয়ামত দান করেন। আলো, বাতাস, পানি, খাদ্য, সবকিছুই তাঁর দান। সুতরাং আমাদের উচিত তাঁর প্রতি কৃতজ্ঞতা প্রকাশ করা। অপরদিকে হযরত মুহাম্মদ (স.) আল্লাহ তা'আলার প্রেরিত নবি ও রাসুল। তিনিই আমাদের নিকট আল্লাহ পাকের পরিচয় তুলে ধরেছেন। সত্য-মিথ্যার পার্থক্য শিখিয়েছেন। জান্নাতে যাওয়ার দিকনির্দেশনা প্রদান করেছেন। সুতরাং সকল কাজে তাঁর আনুগত্য করা এবং ভালোবাসা প্রকাশ করাও অত্যাাবশ্যিক।

কালিমা শাহাদাতের মাধ্যমে আমরা এ দুটো কাজই করতে পারি। তাছাড়াও মহান আল্লাহর প্রতি কৃতজ্ঞতা প্রকাশ ও মুহাম্মদ (স.) এর প্রতি আমাদের বিশ্বাসের প্রমাণ দিতে পারি।

কালিমা তায়্যিবার ন্যায় কালিমা শাহাদাতও দুটি অংশে বিভক্ত। যথা-

প্রথম অংশ : أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ (আশহাদু আল্ লা-ইলাহা ইল্লাল্লাহু, ওয়াহদাহু, লা শারিকালাহু) অর্থ : আমি সাক্ষ্য দিচ্ছি যে, আল্লাহ ছাড়া আর কোনো ইলাহ নেই। তিনি একক, তাঁর কোনো শরিক নেই।

এ কথার দ্বারা তাওহিদ বা একত্ববাদের সাক্ষ্য দেওয়া হয়। অর্থাৎ আমরা এর দ্বারা সাক্ষ্য দেই যে, মহান আল্লাহ এক ও অদ্বিতীয়। তিনি তাঁর সত্তা ও গুণাবলিতে একক। তাঁর কোনো শরিক বা সমতুল্য নেই। ইবাদতের ক্ষেত্রে আমরা কাউকে তাঁর শরিক করি না।

দ্বিতীয় অংশ : (ওয়া আশহাদু আল্লা মুহাম্মাদান আবদুহু ওয়া রাসুলুহ)।

অর্থ : আমি আরও সাক্ষ্য দেই যে, নিশ্চয়ই মুহাম্মদ (স.) আল্লাহর বান্দা ও রাসুল।

কালিমার এ অংশ দ্বারা মুহাম্মদ (স.)-এর রিসালাতের স্বীকৃতি দেওয়া হয়। অর্থাৎ আমরা স্বীকার করি যে, হযরত মুহাম্মদ (স.) আল্লাহ তা'আলার প্রেরিত নবি ও রাসুল। তিনি নিজে আল্লাহ নন কিংবা আল্লাহর অংশও নন। বরং তিনি হলেন আল্লাহ তা'আলার প্রিয় বান্দা। তিনিও আল্লাহ তা'আলার ইবাদত করতেন।

তবে তাঁর বিশেষ বৈশিষ্ট্য হলো তিনি আল্লাহ তা'আলার মনোনীত সর্বশ্রেষ্ঠ নবি ও রাসুল। তিনি আল্লাহ তা'আলার বাণী আমাদের নিকট পৌঁছিয়েছেন।

কালিমা শাহাদাত ইমানের অন্যতম প্রধান বাক্য। এর দ্বারা মানুষ নিজ ইমানের প্রকাশ ঘটিয়ে থাকে। সুতরাং আমরা গুরুত্বপূর্ণভাবে এ কালিমা পড়ব এবং এর মর্মার্থ অনুসারে আমল করব।

কাজ : শিক্ষার্থীরা একে অপরকে কালিমা শাহাদাত অর্থসহ মুখস্থ শোনাবে।

পাঠ ৪

ইমান মুজমাল (إِيْمَانٌ مُّجْمَلٌ)

أَمْنْتُ بِاللَّهِ كَمَا هُوَ بِأَسْمَائِهِ وَصِفَاتِهِ وَقَبِلْتُ جَمِيعَ أَحْكَامِهِ وَأَرْكَانِهِ -

উচ্চারণ : আমানতু বিল্লাহি কামা হুয়া, বি আসমাইহি ওয়া সিফাতিহি ওয়া কাবিলতু জামি'আ আহকামিহি ওয়া আরকানিহি ।

অর্থ : আমি ইমান আনলাম আল্লাহর উপর, ঠিক তেমনি যেমন আছেন তিনি, তাঁর সকল নাম ও গুণসহ । আর আমি তাঁর সকল হুকুম-আহকাম ও বিধি-বিধান গ্রহণ করে নিলাম ।

তাৎপর্য

ইমান শব্দের অর্থ বিশ্বাস । আর মুজমাল অর্থ সংক্ষিপ্ত । অতএব, ইমান মুজমাল অর্থ সংক্ষিপ্ত বিশ্বাস । সংক্ষেপে আল্লাহ তা'আলার প্রতি বিশ্বাস করা ও আনুগত্য স্বীকার করাকে ইমানে মুজমাল বলা হয় । এ বাক্য দ্বারা আমরা পুরোপুরিভাবে আল্লাহ তা'আলার কর্তৃত্ব ও বিধান স্বীকার করে থাকি ।

আল্লাহ তা'আলা এক ও অদ্বিতীয় । তিনি অতুলনীয় । কোনো কিছুই তাঁর তুল্য নয় । আবার তাঁর ন্যায়ও অন্য কিছু নেই । তাঁর সত্তা ঠিক তাঁরই মত । কোনো মানুষ তাঁর সত্তা, আকার আকৃতির কল্পনা করতে পারে না । তিনি যেমন আছেন সেরূপই তাঁকে বিশ্বাস করতে হবে । তাঁর সুন্দর সুন্দর নাম রয়েছে । তিনি সকল গুণের অধিকারী । সবরকম গুণ তাঁর মধ্যে পূর্ণমাত্রায় রয়েছে । এসব নাম ও গুণের প্রতি আমাদের বিশ্বাস করতে হবে ।

মানুষের কল্যাণের জন্য তিনি নানা আইন-কানুন প্রদান করেছেন । নবি-রাসূলগণ এগুলো মানুষের নিকট পৌঁছিয়েছেন । আল্লাহ তা'আলার দেওয়া এসব বিধি-বিধান মানুষকে সফলতা ও মুক্তি দান করে । এগুলো অনুসরণ করলে, মেনে চললে দুনিয়া ও আখিরাতে শান্তি পাওয়া যায় । সুতরাং আমরা সদাসর্বদা তাঁর আদেশগুলো মেনে চলব । যেসব কাজ থেকে মহান আল্লাহ আমাদের নিষেধ করেছেন সেসব কাজ বর্জন করব ।

আমরা ইমান মুজমাল শুদ্ধরূপে পড়ব । এর অর্থ বুঝে আন্তরিকভাবে তা স্বীকার করব । আর জীবনের সর্বাবস্থায় এবং সকল কাজে আল্লাহ তা'আলার আদেশ-নিষেধ মেনে চলব ।

কাজ : শিক্ষার্থীরা ক্লাসে বসে প্রত্যেকে ইমানে মুজমাল অর্থসহ নিজের খাতায় লিখে একে অপরকে দেখাবে ।

পাঠ ৫

আসমাউল হুসনা (الْأَسْمَاءُ الْحُسْنَى)

আসমাউল হুসনা আরবি শব্দ। আসমা শব্দের অর্থ নামসমূহ। আর হুসনা অর্থ সুন্দর। অতএব, আসমাউল হুসনা অর্থ সুন্দর নামসমূহ। আল্লাহ তা'আলার সুন্দর সুন্দর নামকে একত্রে আসমাউল হুসনা বলা হয়। পবিত্র কুরআনে আল্লাহ পাক নিজেই বলেন :

وَاللَّهُ الْأَسْمَاءُ الْحُسْنَىٰ فَادْعُوهُ بِهَا

অর্থ : আল্লাহর জন্য রয়েছে সুন্দর সুন্দর নাম। অতএব তোমরা তাঁকে সেই সকল নামেই ডাকবে। (সূরা আল-আ'রাফ, আয়াত ১৮০)

আল্লাহ তা'আলা সকল গুণের আধার। যেমন- তিনি সৃষ্টিকর্তা, রিযিকদাতা, ক্ষমাশীল, দয়াবান, ধৈর্যশীল, সর্বজ্ঞ, সর্বশ্রোতা, সর্বজ্ঞানী, সর্বশক্তিমান, প্রতিপালক ইত্যাদি। এমন কোনো গুণ নেই যা তাঁর মধ্যে নেই। এসব গুণের প্রত্যেকটির পৃথক পৃথক নাম রয়েছে। এগুলো হলো গুণবাচক নাম। গুণবাচক এসব নামই আসমাউল হুসনা। পবিত্র কুরআনে আল্লাহ পাকের অনেক গুণবাচক নামের উল্লেখ আছে। আমরা আল্লাহ পাকের ৯৯ (নিরানব্বই)টি গুণবাচক নামের কথা জানি। কিন্তু প্রকৃতপক্ষে, মহান আল্লাহর গুণবাচক নামের কোনো শেষ নেই। এগুলো অসংখ্য। তবে বেশি উল্লেখযোগ্য হলো এ নিরানব্বইটি নাম।

এসব নাম আল্লাহ তা'আলার পরিচয় প্রকাশ করে। যেমন- আল্লাহ খালিক। খালিক অর্থ সৃষ্টিকর্তা বা স্রষ্টা। সুতরাং আমরা এ নাম দ্বারা বুঝতে পারি যে, এ বিশ্বজগতের সৃষ্টিকর্তা হলেন মহান আল্লাহ। এভাবে গুণবাচক নামসমূহ দ্বারা আমরা আল্লাহ তা'আলাকে ভালোভাবে চিনতে পারি। ফলে তাঁর আদেশ-নিষেধ মেনে চলা সহজ হয়। তাছাড়া আল্লাহ তা'আলার এসব গুণ আমরা অনুশীলন করব। এতে আমাদের চরিত্র সুন্দর হবে। সকলেই আমাদেরকে ভালোবাসবে। আল্লাহ তা'আলাও আমাদেরকে ভালোবাসবেন।

আল্লাহ মালিক (اللَّهُ مَالِكٌ)

আল্লাহ তা'আলা সকল কিছুই মালিক। মালিক অর্থ অধিকারী। তিনি আসমান-জমিন, চন্দ্র-সূর্য, গ্রহ-নক্ষত্র, পাহাড়-পর্বত, গাছ-পালা, নদী-সাগর সবকিছুর অধিপতি। সকল কিছুই তাঁর নির্দেশে পরিচালিত হয়। কোনো কিছুই তাঁর আদেশ লঙ্ঘন করে না। পশু-পাখি, কীট-পতঙ্গের মালিকও তিনিই। পৃথিবীতে বড়-ছোট সকল বস্তুই তাঁর মালিকানার অন্তর্ভুক্ত।

আল্লাহ তা'আলা মানুষেরও মালিক। আমাদের জীবন-মৃত্যু তাঁরই নিয়ন্ত্রণে। আমাদের ধনসম্পদ, সোনা-রুপা সবকিছুর প্রকৃত মালিকও তিনিই। পৃথিবীতে আমরা তাঁর প্রতিনিধি। এ হিসেবে আমরা ধন-সম্পদের আমানতদার মাত্র। আল্লাহ তা'আলা কিয়ামত ও পরকালের মালিক। জান্নাত-জাহান্নাম তাঁরই অধিকারে। শেষ বিচারের দিনের মালিকও তিনিই। এক কথায় বিশ্বজগতে যা কিছু আছে সবকিছুরই মালিক হলেন মহান আল্লাহ।

আল্লাহ কারিম (اللَّهُ كَرِيمٌ)

কারিম আরবি শব্দ। এর অর্থ দয়াময়, মহানুভব, উদার ইত্যাদি। আল্লাহ তা'আলা অতীব মহান, করুণাময়। উদারতা, দয়া, মায়া, স্নেহ, সহনশীলতা, ঔদার্য, ক্ষমা ইত্যাদি গুণাবলি পরিপূর্ণভাবে তাঁর সত্তায় বিদ্যমান রয়েছে। আল্লাহ অসীম

তাই তাঁর মায়া, ক্ষমা, সহনশীলতা ইত্যাদি সীমাহীন। আমাদের মধ্যকার কেউ কাউকে দয়া দেখালে, ক্ষমা করলে, আমরা ঐ ব্যক্তিকে কতইনা মহান ভাবি। আদর্শবান ব্যক্তি হিসেবে তার গুণগান করি। কিন্তু মহান আল্লাহ যে কত বড় দয়াময়, উদার, ক্ষমাশীল তা আমরা অনুমান করতেও পারি না। কেননা তিনি তো মহামহীম অসীম সত্তার অধিকারী। তিনি সকল সৃষ্টির প্রতিই উদার ও মহানুভব। বায়ু, পানি, আলো, চন্দ্র, সূর্য, জীবজন্তু, পাহাড়-নদী, জমিন, আসমান সবই আল্লাহর নেয়ামত। বিনিময় প্রত্যাশা ছাড়া উদারভাবে অকাতরে তিনি সকলের প্রতি নেয়ামত বিতরণ করেন। তাঁর মহানুভবতার কোনো সীমা পরিসীমা নেই। তাঁর এ অসীম এবং অফুরন্ত দয়া, মায়া ও উদারতার জন্য সকলকে তাঁর প্রতি কৃতজ্ঞতা প্রকাশ করা উচিত, শোকর আদায় করা উচিত।

মহান আল্লাহর গুণবাচক নামের অনুসরণে আমরাও অন্যের প্রতি উদার ও দয়াপূর্ণ আচরণ করব। কথায়, কাজে বাস্তব জীবনে মহানুভব হব।

আল্লাহ আলিম (اللَّهُ عَلِيمٌ)

আলিম আরবি শব্দ। এর অর্থ সর্বজ্ঞ অর্থাৎ যিনি সবকিছু জানেন বা যিনি সকল জ্ঞানের অধিকারী। আল্লাহ তা'আলা হলেন আলিম। তিনি সকল জ্ঞানের আধার, তাঁর জ্ঞান অসীম। তাঁর জ্ঞানের পরিমাপ করা যায় না। কোনো কিছুই তাঁর জ্ঞানের বাইরে নয়। তিনি আসমান জমিনের সবকিছুর খবরই জানেন। আমাদের সকল কথা-বার্তা, কাজ-কর্ম তিনি জানেন। এমনকি আমরা অন্তরে যা চিন্তা করি তিনি সেগুলোও জানেন। আমরা যা কল্পনা করি বা স্বপ্ন দেখি সেগুলোও তাঁর জানার বাইরে নয়। পবিত্র কুরআনে আল্লাহ পাক বলেন-

وَاللَّهُ عَلِيمٌ بِذَاتِ الصُّدُورِ

অর্থ : অন্তরে যা আছে আল্লাহ সে সম্পর্কে বিশেষভাবে অবহিত। (আলে ইমরান, আয়াত ১৫৪)

প্রকৃতপক্ষে আল্লাহ তা'আলার জ্ঞান সীমাহীন। তাঁর জ্ঞানকে কেউই ফাঁকি দিতে পারে না। ক্ষুদ্র পিপীলিকার সমস্ত খবরও তাঁর জানা। সমুদ্রের তলদেশে কিংবা মহাশূন্যে কোথায় কি হচ্ছে সবই তিনি জানেন। মোটকথা সবই তাঁর জ্ঞানের আওতাধীন। সুতরাং আমরা সবসময় একথা মনে রাখব। আল্লাহ তা'আলা অসম্ভব হন এমন কোনো কাজ করব না।

আল্লাহ হাকিম (اللَّهُ حَكِيمٌ)

হাকিম আরবি শব্দ। এর অর্থ প্রজ্ঞাময়, হিকমতের অধিকারী, সুবিজ্ঞ, সুনিপুণ কর্মদক্ষ। মহান আল্লাহর গুণবাচক নাম হিসেবে হাকিম অর্থ আল্লাহ তা'আলা অত্যন্ত প্রজ্ঞাময়, সুদক্ষ, সুনিপুণ ও হিকমতের মালিক। এই মহাবিশ্ব তিনি যেমন সর্বোত্তম দক্ষতার সাথে সৃজন করেছেন, তেমন মহা প্রজ্ঞা, সুনিপুণ ও সুদক্ষ কৌশলের মধ্যে আবহমানকাল থেকে পরিচালনা করছেন। আকাশের তারকারাজি, চন্দ্র, সূর্য, মেঘমালা, নদ-নদী, বায়ু, আগুন-পানি, ফুল-ফল, বৃক্ষ-লতা, আসমান-জমিন, জীবন-মরণ, স্বাদ-গন্ধ ও রূপ-রস যে দিকেই আমরা তাকাই সর্বত্রই এক সুন্দর সুনিপুণ কৌশল দেখতে পাই। তাইতো মহান আল্লাহ বলেন,

“যিনি সৃষ্টি করেছেন স্তরে স্তরে সগুণাশ। দয়াময় আল্লাহর সৃষ্টিতে তুমি কোনো খুঁত দেখতে পাবে না; তুমি আবার তাকিয়ে দেখ, কোনো ত্রুটি দেখতে পাও কি?” (সূরা আল-মুলক, আয়াত ৩)

মহান আল্লাহর মহা প্রজ্ঞা দেখে আমরা তাঁর প্রতি সুদৃঢ় ইমান আনব, শ্রদ্ধায় বিনম্রভাবে তাঁকে স্মরণ করব। সমগ্র সৃষ্টিকুলের মধ্যে যে প্রজ্ঞা ও হিকমত বিদ্যমান তা উপলব্ধি করে নিজেরা চিন্তাশীল হব। বিজ্ঞান ও প্রযুক্তি চর্চায় উৎসাহী হব। খাঁটি ইমানদার হওয়ার পাশাপাশি অনুসন্ধিৎসু বিজ্ঞানমনস্ক হব। আমাদের লেখাপড়া ও দৈনন্দিন কাজকর্ম গুছিয়ে সুশৃঙ্খল-সুনিপুণভাবে সময়ানুবর্তী হয়ে সমাপন করতে চেষ্টা করব। তাতে আমাদের জীবন সার্থক ও সফল হবে।

কাজ : শিক্ষার্থীরা আল্লাহর চারটি গুণবাচক নাম অর্থসহ মুখস্থ লিখে শ্রেণি শিক্ষককে দেখাবে।

পাঠ ৬

রিসালাত (رِسَالَةٌ)

রিসালাত শব্দটি আরবি। এর অর্থ বার্তা, খবর, চিঠি বা সংবাদ বহন। রাসুলগণ যে কর্তব্য ও দায়িত্ব পালন করেন তাকে বলা হয় রিসালাত। আল্লাহ তা'আলা নবি-রাসুলগণকে নানা দায়িত্ব দিয়ে প্রেরণ করেছেন। যেমন : মানুষকে আল্লাহ তা'আলার দিকে আহ্বান করা, সত্য দীন প্রচার করা, সত্য ও ন্যায়ের পথে চলা, মহান আল্লাহর বাণী পৌঁছে দেওয়া ইত্যাদি। রাসুলগণের এ সকল দায়িত্বকে এক কথায় রিসালাত বলা হয়।

আকাইদশাস্ত্রে তাওহীদের পরই রিসালাতের স্থান। এক্ষেত্রে নবুয়ত ও রিসালাত প্রায় সমার্থক।

নবি-রাসুলগণের পরিচয়

নবি-রাসুলগণ হলেন মহান আল্লাহর প্রেরিত পুরুষ বা মনোনীত বান্দা। নবুয়ত ও রিসালাতের দায়িত্ব পালনের জন্য আল্লাহ তা'আলা তাঁদের নির্বাচিত করেছেন। যিনি নবুয়তের দায়িত্ব পালন করেন তিনি হলেন নবি। আর রিসালাতের দায়িত্ব পালনকারীকে বলা হয় রাসুল।

নবি-রাসুলগণ আল্লাহর প্রিয় বান্দা ও প্রেরিত পুরুষ। তাঁরা কেউ আল্লাহর অংশ বা আল্লাহ তা'আলার পুত্র ছিলেন না। বরং মানুষের মধ্যে থেকেই আল্লাহ পাক তাঁদের নির্বাচন করেছেন। তাঁরা বিশেষ সম্মান ও মর্যাদার অধিকারী। তাঁরা মাসুম বা নিষ্পাপ ছিলেন। তাঁরা সর্বদা নেক ও ভালো কাজ করতেন। অন্যায় ও অশ্লীল কাজ থেকে বিরত থাকতেন। তাঁরা উত্তম চরিত্রের অধিকারী ছিলেন।

নবি-রাসুলগণ মানুষের নিকট আল্লাহ তা'আলার পরিচয় তুলে ধরেন। তাঁরা মানুষকে মহান আল্লাহর দিকে দাওয়াত দিতেন। মানুষকে সত্য ও ন্যায়ের শিক্ষা দিতেন। তাঁরা মানুষের নিকট আল্লাহ তা'আলার বাণী ও বিধান পৌঁছে দিতেন। আল্লাহ পাকের আদেশ-নিষেধ মেনে চলতে মানুষকে হাতে-কলমে শিক্ষা দিতেন। তাঁরা সবসময় মানুষের কল্যাণ কামনা করতেন।

নবি ও রাসুলগণের মধ্যে পার্থক্য রয়েছে। যাদের নিকট আসমানি কিতাব এসেছিল তাঁরা ছিলেন রাসুল। আর যাদের নিকট কোনো আসমানি কিতাব আসেনি তাঁরা হলেন নবি। নবির পূর্ববর্তী রাসুলের প্রচারিত দীন (ধর্ম) প্রচার করতেন। আল্লাহ তা'আলা পৃথিবীতে অনেক নবি-রাসুল পাঠিয়েছেন। পৃথিবীর প্রত্যেক সম্প্রদায়ের জন্যই নবি-রাসুল এসেছেন। এক মতে, এঁদের সংখ্যা সর্বমোট এক লক্ষ চব্বিশ হাজার। অন্যমতে, এঁদের সংখ্যা ছিল দুই লক্ষ চব্বিশ হাজার। তন্মধ্যে মাত্র ৩১৩ (তিনশত তের) জন ছিলেন রাসুল। অতএব বোঝা যায় প্রত্যেক রাসুলই নবি ছিলেন, কিন্তু প্রত্যেক নবি রাসুল ছিলেন না। সর্বপ্রথম নবি ছিলেন হযরত আদম (আ.)। আর সর্বশেষ ও সর্বশ্রেষ্ঠ নবি ও রাসুল ছিলেন আমাদের প্রিয় নবি হযরত মুহাম্মদ (স.)। তাঁর পর দুনিয়াতে আর কোনো নবি আসেনি, আসবেনও না।

নবি-রাসুল প্রেরণের প্রয়োজনীয়তা

মহান আল্লাহ নানা কারণে মানুষের মধ্যে নবি-রাসুল প্রেরণ করেছেন। নিম্নে এর কয়েকটি কারণ উল্লেখ করা হলো :

- নবি-রাসুলগণ মানুষকে আল্লাহ পাকের পরিচয় জানিয়েছেন।
- তাঁরা আমাদের আল্লাহ তা'আলা ও সত্য দীনের প্রতি আহ্বান করতেন।
- ভালো-মন্দ, ন্যায়-অন্যায় ইত্যাদির পার্থক্য নবি-রাসুলগণই শিক্ষা দিতেন।
- তাঁরা মানুষকে উন্নত ও উত্তম চরিত্রের শিক্ষা দিতেন।
- তাঁরা জান্নাতে যাওয়ার পথ নির্দেশ প্রদান করতেন। কীভাবে জাহান্নামের শাস্তি থেকে বেঁচে থাকা যায় সে শিক্ষা দিতেন।
- তাঁরা মানুষের নিকট আসমানি কিতাবসমূহ পৌঁছে দিতেন।
- হাতে-কলমে মানুষকে আল্লাহ তা'আলার বিধান শিক্ষা দিতেন।

রিসালাতে বিশ্বাসের গুরুত্ব

রিসালাতে বিশ্বাস করার গুরুত্ব অনেক। তাওহীদের পরপরই রিসালাতের স্থান। রিসালাতে অর্থাৎ নবি-রাসুলগণকে বিশ্বাস না করলে কেউ ইমানদার হতে পারে না। কেননা নবি-রাসুলগণই আমাদের আল্লাহ তা'আলার পরিচয় জানিয়েছেন। তাঁর বাণী পৌঁছে দিয়েছেন। তাঁদের বিশ্বাস না করলে আল্লাহ তা'আলা ও তাঁর বাণীকে অস্বীকার করা হয়। অতএব ইমানের অন্যতম অঙ্গ হচ্ছে রিসালাতের প্রতি বিশ্বাস স্থাপন করা।

নবি-রাসুলগণ ছিলেন আল্লাহ তা'আলার প্রিয় বান্দা ও প্রেরিত মানব। মানুষের হেদায়াতের জন্য আল্লাহ তা'আলা তাঁদের প্রেরণ করেছেন। মহান আল্লাহর প্রেরিত সব নবি-রাসুলের প্রতি আমরা ইমান আনব। তাঁদের আনীত বাণীকে সম্মান করব। আর সর্বশেষ নবি হযরত মুহাম্মদ (স.)-এর দেখানো পথে আমাদের জীবন পরিচালনা করব।

কাজ : শিক্ষার্থীরা নবি-রাসুল প্রেরণের প্রয়োজনীয়তা খাতায় লিখে শ্রেণিকক্ষে শিক্ষককে দেখাবে।

পাঠ ৭ আখিরাত (اٰخِرَةُ)

আখিরাত অর্থ হলো পরকাল। মানুষের দুনিয়ার জীবনকে বলা হয় ইহকাল। আর ইহকালের পরের জীবনই হলো পরকাল। আরবিতে একে বলা হয় আখিরাত। মানুষের মৃত্যুর পরবর্তী জীবনকে বলা হয় আখিরাত। এ জীবনের শুরু আছে কিন্তু শেষ নেই। আখিরাতে মানুষ জান্নাত লাভ বা জাহান্নামের শাস্তি ভোগ করবে।

আখিরাতে বিশ্বাসের গুরুত্ব

তাওহিদ ও রিসালাতে বিশ্বাসের পরপরই আমাদেরকে আখিরাতে বিশ্বাস করতে হবে। আখিরাতে বিশ্বাস না করলে কেউ ইমানদার হতে পারবে না। আখিরাতে বিশ্বাস মানুষকে চরিত্রবান ও সৎকর্মশীল করে তোলে। কেননা যে ব্যক্তি আখিরাতে বিশ্বাস করে, সে জানে আখিরাতে মানুষকে দুনিয়ার কাজের প্রতিদান দেওয়া হবে। সেখানে দুনিয়ার কাজকর্মের হিসাব দিতে হবে। যে ব্যক্তি ভালো কাজ করবে সে পুরস্কার লাভ করবে। তার স্থান হবে চিরশান্তির জান্নাত। আর যে ব্যক্তি দুনিয়াতে পাপ ও অন্যায্য কাজ করবে সে আখিরাতে শাস্তি ভোগ করবে। সে জাহান্নামের আগুনে দক্ষ হবে। সুতরাং আখিরাতে বিশ্বাস করলে মানুষ ভালো কাজ করতে উৎসাহিত হয়, মন্দ কাজ করা থেকে বিরত থাকে। এভাবে আখিরাতে বিশ্বাস মানুষকে কল্যাণের পথে পরিচালনা করে।

আমাদের প্রিয়নবি হযরত মুহাম্মদ (স.) বলেছেন, “দুনিয়া হলো আখিরাতের শস্যক্ষেত্র”। শস্যক্ষেত্রে মানুষ যেরূপ চাষাবাদ করে সেরূপ ফসল লাভ করে। যেমন কেউ ধান চাষ করলে ধান লাভ করে। গম চাষ করলে গম লাভ করে। তেমনি ভালো করে চাষাবাদ করলে ফসল বেশি লাভ করে। আর অলসতার কারণে চাষাবাদ না করে জমি ফেলে রাখলে সে কিছুই লাভ করে না। দুনিয়া ও আখিরাতের অবস্থাও ঠিক তেমন। আমরা যদি দুনিয়াতে ভালো কাজ করি, আল্লাহ তা’আলার আদেশ নিষেধ মেনে চলি তাহলে আখিরাতে ভালো ফল লাভ করব। আর যদি নিজ ইচ্ছামত চলাফেরা করি, অন্যায্য ও পাপ কাজ করি তাহলে আমরা পরকালে কঠিন শাস্তির মুখোমুখি হব। সুতরাং পরকালের অনন্ত জীবনের জন্য দুনিয়াতেই আমাদেরকে প্রস্তুতি গ্রহণ করতে হবে।

আখিরাতের পর্যায়সমূহ

আখিরাত বা পরকালের বেশ কয়েকটি পর্যায় রয়েছে। যেমন : কবর, কিয়ামত ও হাশর।

কবর

পরকালীন জীবনের প্রথম ধাপ বা পর্যায় হলো কবর। একে আলমে বারযাখও বলা হয়। মানুষের মৃত্যুর সাথে সাথে এ জীবনের শুরু হয়। এরপর কিয়ামত বা হাশর পর্যন্ত কবরের জীবন চলতে থাকে।

মৃত্যুর পর মানুষকে কাফন পরিয়ে কবরে রাখা হয়। এ সময় কবরে দুজন ফেরেশতা আগমন করেন। তাদের নাম মুনকার-নাকির। তাঁরা মৃত ব্যক্তিকে তিনটি প্রশ্ন করেন। এগুলো হলো- তোমার রব কে? তোমার দীন কি এবং তোমার রাসুল কে? যেসব লোকের কবর দেওয়া হয় না তারাও এ প্রশ্ন থেকে রেহাই পায় না।

দুনিয়ার জীবনে যারা আল্লাহ তা’আলাকে বিশ্বাস করত এবং রাসুলের নির্দেশ মেনে চলত তারা এ প্রশ্নগুলোর সঠিক উত্তর দিতে পারবে। তাদের কবর হবে শান্তিময়। আর যারা দুনিয়াতে ইমান আনে নি, দীন মেনে চলে নি তারা এসব প্রশ্নের উত্তর দিতে পারবে না। তারা সেসময় শুধু আফসোস করবে। কবরের জীবন তাদের জন্য হবে অতি কষ্টদায়ক।

কিয়ামত

কিয়ামত অর্থ মহাপ্রলয়। পৃথিবীতে এমন একসময় আসবে যখন মানুষ আল্লাহ তা'আলাকে ভুলে যাবে। দুনিয়াতে আল্লাহ বলার মত কোনো লোক থাকবে না। সেসময় আল্লাহ পাক দুনিয়া ধ্বংস করে দেবেন। তাঁর নির্দেশে হযরত ইসরাফিল (আ.) শিঙ্গায় ফুক দেবেন। ফলে মহাপ্রলয় ঘটবে। এ দুনিয়ায় যা কিছু আছে সব ধ্বংস হয়ে যাবে। পাহাড়-পর্বত তুলার ন্যায় আকাশে উড়তে থাকবে। পৃথিবীর নিচের সমুদয় ধন-সম্পদ বের হয়ে আসবে। সবকিছু উলট-পালট হয়ে যাবে। কোনো প্রাণী বা বস্তু অবশিষ্ট থাকবে না। কেবল আল্লাহ তা'আলা থাকবেন। তিনি ব্যতীত আর কেউ বিরাজমান থাকবে না। এ অবস্থাকেই বলা হয় কিয়ামত বা মহাপ্রলয়।

হাশর

হাশর শব্দের অর্থ- সমাবেশ, ভিড়, চাপ ইত্যাদি। কিয়ামতের পর বহুকাল একমাত্র আল্লাহ পাক বিদ্যমান থাকবেন। অতঃপর তিনি পুনরায় সমস্ত প্রাণীকে জীবিত করবেন। তাঁর হুকুমে হযরত ইসরাফিল (আ.) দ্বিতীয়বার শিঙ্গায় ফুক দেবেন। ফলে সকল প্রাণী পুনরায় জীবিত হবে। একে বলা হয় মৃত্যুর পর পুনরুত্থান। এসময় একজন ফেরেশতা সবাইকে আহ্বান করবেন। ফলে সকলে একটি বিশাল ময়দানে সমবেত হবে। একে বলা হয় হাশর। আল্লাহ তা'আলা এখানে সকলের পাপপুণ্যের হিসাব নেবেন। সকল মানুষকে সে সময় আল্লাহ তা'আলার সামনে জবাবদিহি করতে হবে। সেদিন সূর্য মাথার অতি নিকটে থাকবে। প্রচণ্ড গরমে মানুষ ঘামতে থাকবে। এমনকি অনেকে ঘামের মধ্যে সাঁতার কাটবে। আল্লাহ রব্বুল আলামিনের আরাশের ছায়া ব্যতীত সেদিন অন্যকোনো ছায়া তথা আশ্রয়স্থল থাকবে না। ইমানদার পুণ্যবানগণ সেদিন আরাশের ছায়াতলে স্থান লাভ করবেন। তাদের ডানহাতে আমলনামা দেওয়া হবে। আমলনামায় দুনিয়ার জীবনের সকল পাপ-পুণ্যের হিসাব লেখা থাকবে। পাপীরা বাম হাতে আমলনামা পাবে। এরপর আল্লাহ পাক মহাবিচার শুরু করবেন। এটিই হলো শেষ বিচারের দিন। এদিন মহান আল্লাহ হবেন একমাত্র বিচারক। নবি-রাসুল ও ফেরেশতাগণ এদিন সাক্ষী হবেন। মানুষের অঙ্গ-প্রত্যঙ্গগুলোও এদিন সাক্ষ্য দান করবে। আমাদের প্রিয়নবি হযরত মুহাম্মদ (স.) এদিন তাঁর উম্মতদের জন্য সুপারিশ (শাফা'আত) করবেন।

হাশরের ময়দানে মানুষের পাপপুণ্যের ওজন করা হবে। এর নাম মিয়ান। যাদের পুণ্যের পাল্লা ভারী হবে তারা জান্নাতে প্রবেশ করবে। তাঁরা জান্নাতের নানা রকম নিয়ামত ভোগ করবে। সেখানে তারা যা চাইবে তা-ই পাবে। যাদের মিয়ানে পাপের পাল্লা ভারী হবে তারা হবে জাহান্নামী। জাহান্নাম হলো ভীষণ কষ্টের স্থান। সেখানে তারা আগুনে দগ্ধ হবে। তবে কখনো মারা যাবে না। বরং কষ্ট ভোগ করতে থাকবে।

মৃত্যুর পরবর্তী অনন্ত জীবনই হলো আখিরাত। সেখানে মানুষের পাপ-পুণ্যের হিসাব নেওয়া হবে। পুণ্যবানগণ জান্নাতে প্রবেশ করবে। আর পাপীরা জাহান্নামের শাস্তি ভোগ করবে। সুতরাং আমরা দুনিয়াতে তাওহিদ, রিসালাত ও আখিরাতে বিশ্বাস করব। আল্লাহ তা'আলার আদেশ নিষেধ মেনে চলব। ন্যায় ও সৎকাজ করব। তবেই পরকালে চিরশান্তির জান্নাত লাভ করতে পারব।

কাজ : শিক্ষার্থীরা আখিরাতের স্তরসমূহের একটি ধারাবাহিক তালিকা তৈরি করবে।

পাঠ ৮

নৈতিকতা ও আকাইদ

ইসলামের মূল বিষয়সমূহের প্রতি বিশ্বাস স্থাপন করার নামই আকাইদ। যেমন: তাওহিদ, রিসালাত, আখিরাত ইত্যাদি। আর নৈতিকতা হলো নীতির অনুশীলন। অর্থাৎ কথা ও কাজে উত্তম রীতি-নীতির অনুশীলন করা, মার্জিত ও বিনয়ী হওয়া, উত্তম চরিত্রবান হওয়া ইত্যাদি। অন্যায়, অশ্লীল ও অশালীন বিষয়সমূহ পরিত্যাগ করাও নৈতিকতার অন্তর্ভুক্ত।

নৈতিকতা ও নীতির অনুসরণ মানব জীবনের গুরুত্বপূর্ণ সম্পদ। নীতিহীন মানুষ পশুর সমান। পশুর কোনোরূপ নীতিবোধ নেই। সে যা ইচ্ছা তা-ই করতে পারে। ভালো খারাপ, কল্যাণ-অকল্যাণ কোনো কিছুই সে পরোয়া করে না। সে শুধু নিজের লাভ ও কল্যাণই বোঝে। নীতিহীন মানুষও ঠিক তেমনি। সে কোনোরূপ আইন-কানুন, বিধি-বিধান মানে না। সে নৈতিক আচরণ পালন করে না। বরং নিজের লাভের জন্য সে অপরের ক্ষতিসাধন করে থাকে। মিথ্যা, প্রতারণা, ধোঁকা দেওয়া, পরচর্চা ইত্যাদি তার চরিত্রে ফুটে ওঠে। সমাজে সে নানারূপ অশান্তি সৃষ্টি করে। ফলে সমাজের কেউই তাকে বিশ্বাস করে না। কোনো মানুষই তাকে ভালোবাসে না।

অন্যদিকে নৈতিকতা মানুষকে প্রকৃত মানুষে পরিণত করে। নীতিবোধসম্পন্ন মানুষ সমাজে শ্রদ্ধা ভালোবাসা লাভ করে। সকলেই তাঁকে সম্মান করে।

আকাইদ ও নৈতিকতার সম্পর্ক অত্যন্ত গভীর। আকাইদ বা ইসলামি বিশ্বাসসমূহ মানুষকে নৈতিকতার শিক্ষা দেয়। যে ব্যক্তি আকাইদের বিষয়গুলো ভালোভাবে বিশ্বাস করে তার চরিত্র সুন্দর হয়। সে সবসময় নীতি ও উত্তম আদর্শের অনুসরণ করে। অন্যায়-অত্যাচার, অশ্লীলতা থেকে সে সর্বদা দূরে থাকে। সে কখনো দুর্নীতিকে প্রশ্রয় দেয় না। বরং সমাজ থেকে দুর্নীতির প্রতিরোধে সে সচেষ্ট হয়।

আকাইদ এর প্রথম বিষয় হলো তাওহিদ। তাওহিদ হলো একত্ববাদ। আল্লাহ তা'আলাকে এক ও অদ্বিতীয় বলে বিশ্বাস করা। তিনি সকল কিছুর স্রষ্টা ও মালিক। তিনিই সকল ক্ষমতার অধিকারী ইত্যাদি বিশ্বাস করা। তাওহিদে এরূপ বিশ্বস্ত ব্যক্তি কখনো অনৈতিক কাজ করতে পারে না। কেননা সে জানে যে তার সৃষ্টিকর্তা আল্লাহ রব্বুল আলামিন। তিনি তাকে সর্বদা দেখছেন এবং তার সকল কাজের হিসাব রাখছেন। সুতরাং সে সর্বদা আল্লাহ তা'আলার হুকুমমত জীবনযাপন করে। অন্যায়, অত্যাচার ও পাপ কাজ থেকে দূরে থাকে।

তাওহিদের পরই আসে রিসালাত। রিসালাত হলো নবি-রাসুলগণের উপর বিশ্বাস। তাঁরা আল্লাহ তা'আলার মনোনীত বান্দা। তাঁরা ছিলেন মানবজাতির মধ্যে শ্রেষ্ঠজন। তাঁরা নিষ্পাপ ও উন্নত নৈতিক চরিত্রের অধিকারী। সুতরাং রিসালাতে বিশ্বাসী মানুষ নবি-রাসুলগণের চরিত্র দ্বারা প্রভাবিত হয়। তাঁদের ন্যায় সেও উত্তম চরিত্র অনুশীলন করে। উদ্ধত ও অশালীন চলাফেরা ও কথাবার্তা তার থেকে কখনো প্রকাশ পায় না।

আখিরাতে বিশ্বাস আকাইদের অন্যতম অংশ। আখিরাত হলো পরকাল। মানুষের এ দুনিয়ার জীবনই শেষ নয়। বরং মৃত্যুর সাথে সাথে আরেক জীবনের শুরু হবে। এরই নাম আখিরাত। এ জীবনের শুরু আছে কিন্তু শেষ নেই। এ জীবন অনন্ত ও চিরস্থায়ী। আখিরাতে মানুষের দুনিয়ার কাজকর্মের হিসাব নেওয়া হবে। দুনিয়াতে যে ভালো ও নেক কাজ করবে আখিরাতে সে চিরশান্তির জান্নাত লাভ করবে। আর দুনিয়ায় যে অন্যায় ও পাপ কাজ করবে আখিরাতে সে চরম শাস্তির মুখোমুখি হবে, তার ঠিকানা হবে জাহান্নাম। সুতরাং আখিরাতে বিশ্বাস মানুষকে দুনিয়ার জীবনে ভালো কাজ করতে

উৎসাহিত করে। আখিরাতের সফলতা ও শান্তির আশায় মানুষ ভালো কাজ করে, সকলের সাথে মিলেমিশে চলে এবং উত্তম চরিত্রবান হয়। অন্যদিকে আখিরাতের শান্তির ভয়ে মানুষ মন্দ ও অশ্লীল কাজ পরিত্যাগ করে। অন্যায়, অত্যাচার ও পাপ কাজ থেকে দূরে থাকে। এভাবে মানুষ আখিরাতে বিশ্বাসের ফলে নৈতিকতা অনুশীলন করে থাকে।

অতএব, নৈতিকতা অর্জনে আকাইদের ভূমিকা অত্যন্ত গুরুত্বপূর্ণ। আমরা ভালোভাবে তাওহিদ, রিসালাত ও আখিরাতে বিশ্বাস করব। দুনিয়াতে নৈতিকতার অনুশীলন করব, অনৈতিক কাজকে কখনোই পছন্দ করব না। তাহলে আমরা ইহকাল ও পরকালে সফলতা লাভ করব।

কাজ : শ্রেণির সব শিক্ষার্থী মিলে তাদের মধ্য থেকে দুইজন ছাত্র ও দুইজন ছাত্রীকে নির্বাচন করবে। তারা প্রত্যেকে এই পাঠ থেকে কি শিক্ষা পেলো তা আলোচনা করবে আর অন্য সব শিক্ষার্থী শুনবে।

নতুন শব্দাবলি

ইলাহ - মাবুদ, উপাস্য

মাবুদ - ইবাদতের যোগ্য/ অধিকারী। যাঁর ইবাদত করা হয়

লা-শরিক - যাঁর কোনো অংশীদার নেই

দীন - ধর্ম, জীবন বিধান

আরশ - আল্লাহ তা'আলার আসন

উম্মত - অনুসারী বা দল। যেমন- আমরা হযরত মুহাম্মদ (স.)-এর উম্মত; দল

দাওয়াত - আহবান। আল্লাহ তা'আলা ও দীন ইসলামের দিকে আহবানকে দাওয়াত বলা হয়।

অনুশীলনমূলক প্রশ্ন

শূন্যস্থান পূরণ কর :

১. কালিমা তায়্যিবা অর্থ হলো
২. কালিমা শাহাদাত ইমানের অন্যতম বাক্য ।
৩. ইমান মুজমাল অর্থ সংক্ষিপ্ত
৪. আল্লাহ তা'আলা সকল গুণের
৫. আকাইদ শাস্ত্রে তাওহীদের পরই স্থান ।

বাম পাশ থেকে শব্দ বা বাক্যাংশ নিয়ে ডান পাশের সাথে মিল কর :

বাম পাশ	ডান পাশ
১. কালিমা তায়্যিবা	বলা হয় রাসুল
২. আল্লাহর গুণবাচক নাম আল্লাহর	নবি-রাসুল পাঠিয়েছেন
৩. রিসালাতের দায়িত্ব পালনকারীকে	ইমানের মূল ভিত্তি
৪. আল্লাহ তাআলা পৃথিবীতে অনেক	শ্রেষ্ঠ সন্তান
৫. নবি-রাসুলগণ ছিলেন মানবজাতির	পরিচয় প্রকাশ করে

সংক্ষিপ্ত উত্তর প্রশ্ন :

১. ইমানের সংক্ষিপ্ত পরিচয় দাও ।
২. আল্লাহর গুণবাচক নাম 'কারিমুন' এর সংক্ষিপ্ত পরিচয় লেখ ।
৩. হাশর বলতে কী বুঝ ?

বর্ণনামূলক প্রশ্ন :

১. রিসালাতের ধারণা ও প্রয়োজনীয়তা ব্যাখ্যা কর ।
২. 'আখিরাতে বিশ্বাস নৈতিকতার উন্নয়ন ঘটায়' - ব্যাখ্যা কর ।
৩. নৈতিকতা উন্নয়নে আকাইদ এর গুরুত্ব বিশ্লেষণ কর ।

বহুনির্বাচনি প্রশ্ন :

১. 'আকিদাহ' (الْإِقْدَان) শব্দের অর্থ কী ?
 - ক. একত্ববাদ
 - খ. বিশ্বাসমালা
 - গ. বিশ্বাস
 - ঘ. পবিত্র
২. নৈতিকতা বলতে বোঝায় -
 - i. কর্মে উত্তম রীতি-নীতির অনুশীলন করা
 - ii. পড়ালেখায় মনোযোগী হওয়া
 - iii. খারাপ বিষয়সমূহ পরিত্যাগ করা
 নিচের কোনটি সঠিক ?
 - ক. i, ii
 - খ. i, iii
 - গ. ii, iii
 - ঘ. i, ii, iii
৩. কালিমা তায়্যিবা অর্থ কী ?
 - ক) পুণ্যবাক্য
 - খ) পূর্ণবাক্য
 - গ) পবিত্র বাক্য
 - ঘ) পরিচ্ছন্ন বাক্য ।

নিচের অনুচ্ছেদটি পড় এবং ৪, ৫ ও ৬ নম্বর প্রশ্নের উত্তর দাও :

আরিফ ও জিয়াদ একই কলেজে পড়ে। আরিফ বলল, মানুষের সঠিক পথ প্রদর্শনের জন্য নবি-রাসুলের প্রয়োজন নাই। জিয়াদ বলল, নবি-রাসুলগণই আমাদেরকে আল্লাহ ও রাসুলের পরিচয় জানিয়েছেন।

৪. আরিফের মধ্যে কোন বিশ্বাসের অভাব রয়েছে ?

- ক) আখিরাতের
- খ) হাশরের
- গ) রিসালাতের
- ঘ) মিযানের।

৫. আরিফের বক্তব্যে তার কী নষ্ট হবে ?

- ক) আমল
- খ) ইমান
- গ) সুনাম
- ঘ) প্রভাব।

৬. জিয়াদের বক্তব্যে প্রকাশ পেয়েছে, সে একজন -

- i. মুমিন
- ii. মুসলিম
- iii. আবেদ

নিচের কোনটি সঠিক ?

- ক. i, ii
- খ. ii
- গ. i, ii
- ঘ. ii, iii

সৃজনশীল প্রশ্ন :

১। মুয়ীদ কর ফাঁকি দিয়ে বিদেশী শাড়ী আমদানীর মাধ্যমে প্রচুর অর্থ উপার্জন করে বিলাসবহুল জীবনযাপন করেন। তার ছোট ভাই নাজির সরকারি অফিসে গুরুত্বপূর্ণ পদে চাকরি করেন। অবৈধভাবে অর্থ উপার্জনের অনেক পথ খোলা থাকলেও তিনি তা কখনো গ্রহণ করেন নি। তিনি মনে করেন দুনিয়ার সুখশান্তি ক্ষণস্থায়ী।

- ক) কিয়ামত শব্দের অর্থ কী ?
- খ) 'হাশর' বলতে কী বোঝায় ?
- গ) মুয়ীদদের কর্মকাণ্ডে কোন্ বিশ্বাসের অভাব রয়েছে ? ইসলামের দৃষ্টিতে ব্যাখ্যা কর।
- ঘ) নাজির সাহেবের কর্মকাণ্ড ইসলামের দৃষ্টিতে মূল্যায়ন কর।

২। রাশেদ ও খালেদ সহপাঠী। হেমন্তের শেষে তারা রান্গামাটি ও সুন্দরবন ভ্রমণে গিয়েছিল। সেখানকার পাহাড়-পর্বত, ঝর্ণাধারা, গাছগাছালি ও সমুদ্র তীরের মনোরম দৃশ্যাবলি দেখে মুগ্ধ হয়ে রাশেদ বললো, কী চমৎকার মহান আল্লাহর সৃষ্টি! কিন্তু খালেদ দ্বিমত পোষণ করে বললো, এসব কিছু প্রকৃতির সৃষ্টি। এসবের মাঝে সৃষ্টিকর্তার অবদান আছে বলে আমি বিশ্বাস করি না।

- ক) কোন নবি অগ্নিকুণ্ডে নিষ্কিণ্ড হয়েছিল ?
- খ) তাওহিদে বিশ্বাস প্রয়োজন কেন ?
- গ) রাশেদের মন্তব্যে কী প্রকাশ পেয়েছে ?
- ঘ) খালেদের মতামতের পরিণাম পাঠ্যবইয়ের আলোকে মূল্যায়ন কর।

দ্বিতীয় অধ্যায় ইবাদত (الْعِبَادَةُ)

আল্লাহ তায়ালা দাসত্ব স্বীকার করাকে ইবাদত বলে। আল্লাহর সকল আদেশ-নিষেধ, বিধিবিধান মেনে চলার নামই ইবাদত। পরকালের শান্তির জন্য মানুষ সালাত, সাওম ইত্যাদি পালন করে থাকে। দুনিয়ার প্রত্যেকটি কাজ বিসমিল্লাহ বলে শুরু করাও ইবাদতের অন্তর্ভুক্ত।

এ অধ্যায় শেষে শিক্ষার্থী -

- ইবাদতের ধারণা ও প্রকারভেদ বর্ণনা করতে পারবে।
- পবিত্রতা ও অপবিত্রতার ধারণা বর্ণনা করতে পারবে।
- সালাত (নামায) আদায়ের নিয়ম-কানুন, সময়সূচি ও সালাতের ফরয, ওয়াজিব ইত্যাদি সম্পর্কে ধারণা লাভ করতে পারবে।
- সালাত (নামায) ভঙ্গের কারণ বর্ণনা করতে পারবে।
- সিজদা সাহু ও সিজদা তিলাওয়াতের ধারণা ও প্রয়োজনীয়তা বর্ণনা করতে পারবে।
- বাস্তব জীবনে পরিষ্কার পরিচ্ছন্নতা, সময়ানুবর্তিতা, শৃঙ্খলাবোধ, নিয়মানুবর্তিতা ও সাম্যের শিক্ষা অর্জন করতে পারবে।

পাঠ ১

ইবাদতের ধারণা

ইবাদত আরবি শব্দ। এর অর্থ দাসত্ব বা আনুগত্য। আল্লাহর দাসত্ব ও আনুগত্যই হল ইবাদত। ইসলামি পরিভাষায় আল্লাহর সকল আদেশ নিষেধ মেনে চলার নামই ইবাদত।

মহান আল্লাহ আমাদের সৃষ্টি করেছেন। তিনিই আমাদের লালন পালন করেন। তিনিই আমাদের রব। আমরা তাঁর বান্দা। আমাদের জীবন, মরণ তাঁর হাতে। তিনি আমাদের জন্য এ মহাবিশ্বকে কত সুন্দর করে সাজিয়েছেন। আসমান-জমিন, চাঁদ-সুরঞ্জ, ফল-ফুল, নদী-নালা সব আমাদের জন্য সৃষ্টি করেছেন। আমরা সব ভোগ করি। আমাদের সৃষ্টির সেরা জীব হিসেবে তৈরি করেছেন। আল্লাহর দেওয়া অফুরন্ত নিয়ামত ভোগ করার পর এর শুকরিয়া (কৃতজ্ঞতা) আদায় করতে হবে। নিয়ামতের শুকরিয়া আদায় করে আল্লাহর দেওয়া বিধানমতো চলার নামই ইবাদত। আমরা আল্লাহর আদেশমতো চলব এবং তাঁরই ইবাদত করব। পবিত্র কুরআনে আল্লাহ তাআলা বলেন :

“এবং তুমি তোমার ঋণটির জন্য ক্ষমা প্রার্থনা কর এবং সকাল-সন্ধ্যায় তোমার প্রতিপালকের পবিত্রতা ও মহিমা ঘোষণা কর।” (সূরা মু’মিন : ৫৫)

মহান আল্লাহ সকল জিনিস মানুষের জন্য সৃষ্টি করেছেন। আর জিন ও মানবজাতিকে সৃষ্টি করেছেন তাঁর ইবাদত বা দাসত্ব স্বীকার করার জন্য। এ সম্পর্কে কুরআন মাজিদে আল্লাহ তাআলা ঘোষণা করেন :

وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ.

অর্থ : “আর আমি জিন ও মানবজাতিকে শুধু আমার ইবাদতের জন্য সৃষ্টি করেছি।” (সূরা যারিয়াত : ৫৬)

মহানবি (স.) ইবাদত সম্পর্কে বলেছেন : যেখানেই থাক আল্লাহকে ভয় করে চল। আর কখনো কোনো মন্দ কাজ হয়ে গেলে তখন একটি ভালো কাজ করে ফেল। তাহলে এ কাজটি পূর্ববর্তী মন্দ কাজকে মিটিয়ে দিবে। আর মানুষের সাথে উত্তম আচরণ কর।” (তিরমিযি)

যেখানে আল্লাহ তাআলা তাঁর বড় বড় দানের কথা উল্লেখ করেছেন, সেখানেই তিনি রাসুলুল্লাহ (স.)-কে ‘আবদুন’ বলে সম্বোধন করেছেন। যেমন : কুরআন মাজিদ অবতীর্ণের সময় আল্লাহ তাআলা বলেন :

الْحَمْدُ لِلَّهِ الَّذِي أَنْزَلَ عَلَىٰ عَبْدِهِ الْكِتَابَ

অর্থ : “সকল প্রশংসা আল্লাহর জন্য যিনি তাঁর বান্দার (রাসুলের) উপর কিতাব (কুরআন) অবতীর্ণ করেছেন” (সূরা কাহুফ : ০১)

আমরা ভালো কাজ করব। অন্যকে সৎকাজের পরামর্শ দিব। এতে উভয়ই সমান সাওয়াব পাবে। এ প্রসঙ্গে মহানবি (স.) বলেন : “যে ব্যক্তি কোনো ভালো কাজের পরামর্শ বা সন্ধান দেবে, সে ঐ কাজটি সম্পাদনকারীর সমান সাওয়াব পাবে (মুসলিম)।” আমাদের জন্য নামায, রোযা, হজ, যাকাত ইত্যাদি কতগুলো নির্ধারিত ইবাদত রয়েছে। এগুলো নবি কারিম (স.) যেভাবে আদায় করেছেন, আমাদেরকে করতে বলেছেন, আমরা ঠিক সেভাবেই আদায় করব। এভাবে মানুষ তার জীবনকে পরিচালিত করলে সমাজে শান্তি, শৃঙ্খলা, আনুগত্য ও অপরের প্রতি শ্রদ্ধা-ভক্তি বৃদ্ধি পাবে।

ইবাদতের প্রকারভেদ

ইবাদতকে তিন ভাগে ভাগ করা যায় : ১. ইবাদতে বাদানি বা শারীরিক ইবাদত ২. ইবাদতে মালি বা আর্থিক ইবাদত ৩. ইবাদতে মালি ও বাদানি বা শরীর ও অর্থ উভয়ের সংমিশ্রণে ইবাদত । শরীরের অঙ্গ-প্রত্যঙ্গের সাহায্যে যে ইবাদত করা হয় তাকে বলা হয় ইবাদতে বাদানি বা শারীরিক ইবাদত ।

যথা : দৈনিক পাঁচ ওয়াক্ত নামায আদায় করা ও রমযান মাসে রোযা রাখা । ইবাদতের মধ্যে শারীরিক ইবাদত সবচেয়ে বেশি গুরুত্বপূর্ণ । অর্থের দ্বারা যে ইবাদত করতে হয় সেগুলোকে বলা হয় ইবাদতে মালি বা আর্থিক ইবাদত । যেমন : যাকাত দেওয়া, সাদকা ও দান-খয়রাত করা ইত্যাদি । উল্লিখিত দুই প্রকার ইবাদত ছাড়াও এমন কিছু ইবাদত আছে যা শুধু শরীর দ্বারা বা কেবল অর্থ দ্বারা করা যায় না । বরং শরীর এবং অর্থ উভয়ের প্রয়োজন হয় যেমন : হজ করা, জিহাদ করা ইত্যাদি ।

আল্লাহ তাআলা যেহেতু আমাদের ইবাদতের জন্যই সৃষ্টি করেছেন, তাই সবসময় তাঁর ইবাদতে মশগুল থাকা আমাদের কর্তব্য । এখন প্রশ্ন জাগতে পারে যে, সবসময় কি ইবাদত করা সম্ভব? হ্যাঁ, দিনরাত চব্বিশ ঘণ্টা ইবাদত করা সম্ভব । যেমন আমরা খেতে বসলে যদি ‘বিস্মিল্লাহ’ বলে খাওয়া শুরু করি, তবে যতক্ষণ খাওয়ার মধ্যে থাকব ততক্ষণ আল্লাহর রহমত পেতে থাকব । এটিই ইবাদত । পড়ার সময় যদি ‘বিস্মিল্লাহ’ বলে পড়া শুরু করি তবে যতক্ষণ পর্যন্ত লেখাপড়া করব, ততক্ষণই তা ইবাদত হিসেবে গণ্য হবে । স্কুলে যাবার সময় ‘বিস্মিল্লাহ’ বলে যাত্রা শুরু করলে রাস্তার সকল বিপদাপদ থেকে আল্লাহ আমাদের রক্ষা করবেন । একজন অন্ধলোক রাস্তা পার হতে পারছে না, তাকে হাত ধরে রাস্তা পার করে দিলে তাও আল্লাহর নিকট ইবাদত হিসেবে গণ্য হবে । এমনিভাবে সবসময় আমরা ইবাদতে মশগুল থাকতে পারি । ইবাদত করলে আল্লাহ খুশি হন । এতে দুনিয়ার জীবন সুখময় হয় । পরকালে পরম শান্তিময় স্থান জান্নাত লাভ করা যায় । আর যারা ইবাদত করে না, আল্লাহর নির্দেশিত পথে চলে না, আল্লাহ তাদের প্রতি অসন্তুষ্ট হন । তারা দুনিয়াতে শান্তি পায় না । পরকালেও তাদেরকে জাহান্নামের কঠোর শাস্তি ভোগ করতে হবে ।

কাজ : শিক্ষার্থীরা দলে বিভক্ত হয়ে পাঠ্যপুস্তকের আলোচনার বাইরে আর কোন কোন কাজ ইবাদতের অন্তর্ভুক্ত হতে পারে তার তালিকা তৈরি কর ।

পাঠ ২

অপবিত্রতা (نَجَاسَةٌ)

অপবিত্রতার আরবি প্রতি শব্দ হলো ‘নাজাসাতুন’। এটি হলো তাহারাতুন (পবিত্রতা) এর বিপরীত। কতিপয় বস্তুর কারণে বা প্রভাবে পবিত্র জিনিস অপবিত্র হয়ে যায়, তাকে নাজাসাত বলে। যেমন : পেশাব, পায়খানা ইত্যাদির কারণে শরীর, কাপড় ও ব্যবহারিক জিনিসপত্র অপবিত্র হয়ে যায়। এ অবস্থায় তা পবিত্র করা একান্ত জরুরি।

অপবিত্র অবস্থা থেকে পবিত্র হওয়ার জন্য আল্লাহ তাআলার নির্দেশ রয়েছে। আল্লাহ তাআলা পবিত্র কুরআনে ঘোষণা করেন :

“এবং তোমার পোশাক-পরিচ্ছদ পবিত্র কর।” (সূরা মুদ্দাসসির : ৪)

নাজাসাত বা অপবিত্রতা দুই প্রকার :

১. নাজাসাতে হাকিকি বা প্রকৃত অপবিত্রতা
২. নাজাসাতে হুকমি বা অপ্রকৃত অপবিত্রতা।

নাজাসাতে হাকিকি

নাজাসাতে হাকিকি হচ্ছে ঐ সকল অপবিত্র বস্তু যা থেকে মানুষ নিজে দূরে থাকতে চায় এবং নিজের শরীর, পোশাক পরিচ্ছদ ও অন্যান্য ব্যবহারের জিনিসপত্র বাঁচিয়ে রাখতে চায়। যেমন : পেশাব, পায়খানা, রক্ত, মদ ইত্যাদি। ইসলাম এসব থেকে দূরে থাকার নির্দেশ দিয়েছে।

নাজাসাতে হুকমি

নাজাসাতে হুকমি হচ্ছে ঐসকল অপবিত্রতা যা দেখা যায় না কিন্তু ইসলামি বিধানে তা নাজাসাত বা অপবিত্র বলে গণ্য। যেমন : ওজু ভঙ্গ হওয়া, গোসলের প্রয়োজন হওয়া ইত্যাদি। উল্লেখ্য যে, উভয় প্রকার অপবিত্রতা থেকে শরীর পবিত্র রাখা একান্ত প্রয়োজন।

অপবিত্রতার ব্যাপারে সতর্ক না থাকলে কবরে শাস্তি ভোগ করতে হবে। মহানবি (স.) একদিন দু’টি কবরের নিকট দিয়ে যাচ্ছিলেন। তখন তিনি বললেন, এ কবর দু’টিতে যাদের দাফন করা হয়েছে, তাদের ওপর শাস্তি হচ্ছে। তাদের একজনের গুনাহ তো এই যে, সে পেশাবের অপবিত্রতা হতে পবিত্র থাকার চেষ্টা করত না। আর অপরজন চোগলখোরি (দুর্নাম) করে বেড়াতো। তারপর মহানবি খেজুরের একটি কাঁচা ডাল ভেঙ্গে দু’টুকরা করে দু’কবরে গেড়ে দিলেন। সাহাবিগণ (রা) নিবেদন করলেন, হে আল্লাহর রাসূল! কী উদ্দেশ্যে আপনি এ কাজ করলেন? তিনি উত্তরে বললেন, আশা করা যায় ডালের এ টুকরো শুকিয়ে না যাওয়া পর্যন্ত উভয়ের কবর আযাব (শাস্তি) কম করে দেওয়া হবে। (বুখারী ও মুসলিম)

কাজ : শিক্ষার্থীরা চার-পাঁচজনের দলে বিভক্ত হয়ে প্রত্যেক দল প্রকৃত অপবিত্রতার ও অপ্রকৃত অপবিত্রতার একটি তালিকা ছক আকারে লিখে শ্রেণিতে উপস্থাপন করবে।

পাঠ ৩

পবিত্রতা (طَهَارَةٌ)

পবিত্রতার আরবি প্রতিশব্দ ‘তাহারাতুন’। ওয়ু, গোসল, ইত্যাদির মাধ্যমে পবিত্রতা অর্জন করা যায়। ইবাদতের জন্য পবিত্র থাকা একান্ত প্রয়োজন। পবিত্র না হয়ে নামায আদায় করা যায় না। এমনকি ইবাদতও কবুল হয় না। এ প্রসঙ্গে মহানবি (স.) বলেন : “পবিত্রতা ব্যতীত নামায কবুল হয় না এবং আত্মসাতের মাল সাদাকা (দান) হয় না।” (মুসলিম)।

পবিত্র থাকলে শরীর সুস্থ থাকে। মন প্রফুল্ল থাকে। লেখাপড়া ও কাজকর্মে মন বসে। আল্লাহ তাআলা ও তাদের ভালোবাসেন। এ প্রসঙ্গে আল্লাহ তাআলা বলেন :

وَاللَّهُ يُحِبُّ الْمُطَهَّرِينَ

অর্থ : “আর উত্তমরূপে পবিত্রতা সম্পাদনকারীদের আল্লাহ তাআলা ভালোবাসেন।” (সূরা তাওবা : ১০৮)

রাসুলুল্লাহ (স.) স্বয়ং পবিত্রতা ও পরিচ্ছন্নতার অতুলনীয় দৃষ্টান্ত ছিলেন। তিনি তাঁর উম্মতকে পবিত্রতা অর্জনের জন্য বিশেষভাবে তাগিদ দিয়েছেন এবং পবিত্র থাকার জন্য বিশেষভাবে উদ্বুদ্ধ করেছেন। এ প্রসঙ্গে মহানবি (স.) বলেন, “পবিত্রতা ইমানের অংশ।” (মুসলিম)

পবিত্রতার প্রকারভেদ

পবিত্রতা দুই প্রকার : ১. আভ্যন্তরীণ পবিত্রতা ২. বাহ্যিক পবিত্রতা

আভ্যন্তরীণ পবিত্রতা :

হৃদয়েকে যাবতীয় শিরক আকিদা, রিয়া, গিবত ইত্যাদি থেকে মুক্ত রাখার নাম আভ্যন্তরীণ পবিত্রতা।

বাহ্যিক পবিত্রতা :

শরিয়াতের বিধিমোতাবেক ওয়ু, গোসল ইত্যাদির মাধ্যমে পবিত্রতা অর্জনকে বাহ্যিক পবিত্রতা বলে।

পবিত্রতা ও অপবিত্রতার মানদণ্ড হচ্ছে শরিয়াত। নিজের জ্ঞান-বুদ্ধি বা অভিরূচি অনুযায়ী এ বিষয়ে কিছু কম-বেশি করার কারো অধিকার নেই। কেবল সেসব বস্তুই পবিত্র যাকে শরিয়াত পবিত্র বলেছে। আর সেসব বস্তু অপবিত্র যাকে শরিয়াত অপবিত্র বলেছে। সুতরাং শরিয়াতের বিধিমোতাবেক পবিত্রতা অর্জন করতে হবে। নিজের ধ্যান-ধারণা ও রূচির বশীভূত হয়ে পবিত্র ও অপবিত্রতার কোনো মানদণ্ড ঠিক করা উচিত নয়। এ প্রসঙ্গে আল্লাহ তাআলা বলেন :

مَا يُرِيدُ اللَّهُ لِيَجْعَلَ عَلَيْكُمْ مِنْ حَرَجٍ وَلَكِنْ يُرِيدُ لِيُطَهَّرَكُمْ

অর্থ : “আল্লাহ তোমাদের উপর কোনো অসুবিধা রাখতে চান না। বরং তিনি তোমাদের পবিত্র করতে চান।” (সূরা মায়িদা : ৬)

কাজ : শিক্ষার্থীরা দলে বিভক্ত হয়ে পবিত্র থাকার উপায়গুলো দলীয় আলোচনার পর পোস্টারে লিপিবদ্ধ করবে এবং শ্রেণিতে উপস্থাপন করবে।

পাঠ ৪

(الْوُضُوءُ)
ওযু

ওযু আরবি শব্দ। এর অর্থ সুন্দর, পরিষ্কার ও স্বচ্ছ। ইসলামি শরিয়াতের পরিভাষায় শরীর পবিত্র করার নিয়তে পবিত্র পানি দিয়ে শরিয়াতের নিয়ম অনুযায়ী নির্দিষ্ট অঙ্গপ্রত্যঙ্গ ধোয়ার নামই ওযু।

ওযুর গুরুত্ব

ওযুর প্রয়োজনীয়তা ও গুরুত্ব বর্ণনা করে পবিত্র কুরআনে বলা হয়েছে :

“যারা ইমান এনেছ জেনে রেখো, যখন তোমরা নামাযের জন্য দাঁড়াবে তার আগে নিজেদের মুখমন্ডল ধুয়ে নিবে, তোমাদের দুই হাত কনুই পর্যন্ত ধুয়ে নিবে, মাথা মাসেহ করবে এবং উভয় পা গিরাসহ ধুয়ে নিবে।” (সূরা মায়িদা : ৬)

ভালোভাবে ওযু করলে মন প্রফুল্ল থাকে। শরীরের অঙ্গপ্রত্যঙ্গ সতেজ থাকে। ইবাদতেও একাগ্রতা আসে। এ প্রসঙ্গে মহানবি (স.) বলেন : ‘আমি কিয়ামতের দিন আমার উম্মতকে চিনতে পারব।’ জনৈক সাহাবি প্রশ্ন করলেন : ‘হে আল্লাহর রাসুল কোটি কোটি মানুষের মধ্যে আপনি কীভাবে আমাদের চিনবেন?’ নবি কারিম (স.) উত্তরে বললেন : ‘ওযুর ফলে আমার উম্মতের মুখমন্ডল এবং হাত পা উজ্জ্বলতায় ঝকঝক করবে। তাতেই আমি আমার উম্মতকে চিনতে পারব।’ (বুখারী ও মুসলিম)। কাজেই ওযুর ফযিলত বা মর্যাদা পাবার আশায় আমাদের অতি উত্তমরূপে ওযু করতে হবে। ওযু পরিপূর্ণ হলে ইমাম ও মুক্তাদি উভয়ের নামাযই পরিশুদ্ধ হয়। আর ওযু অপরিপূর্ণ হলে নামাযে পরিপূর্ণতা আসে না।

ওযুর নিয়ম

মনে মনে পবিত্রতা অর্জনের নিয়ত করে বিসমিল্লাহ বলে প্রথমে দুই হাত কজি পর্যন্ত ধুয়ে তারপর ডান হাতে পানি নিয়ে তিনবার কুলি করতে হবে। রোযা না থাকলে তিনবারই গড়গড়া করে কুলি করতে হবে। এরপর নাকে পানি দিয়ে তিনবার নাক পরিষ্কার করতে হবে। তারপর তিনবার সমস্ত মুখমন্ডল এমনভাবে ধৌত করতে হবে যাতে চুল পরিমাণ স্থানও শুকনো না থাকে। দাড়ি ঘন হলে খিলাল করতে হবে। এরপর দুই হাত কনুই পর্যন্ত ধৌত করতে হবে। হাতে ঘড়ি ইত্যাদি থাকলে তা নাড়াচাড়া করতে হবে যেন সবখানে পানি পৌঁছে যায়। তারপর দুই হাত ভিজিয়ে মাথা এবং কান মাসেহ করতে হবে। মাসেহ করার সময় দুই হাতের বুড়ো এবং শাহাদাত অঙ্গুলি আলাদা রেখে বাকি তিন অঙ্গুলি মিলিয়ে অঙ্গুলিগুলোর ভিতর দিক দিয়ে কপালের চুলের গোড়া থেকে পেছন দিকে মাথার এক-চতুর্থাংশ মাসেহ করতে হবে। তারপর দুই হাতের তালু পেছন দিক থেকে সামনের দিকে টেনে মাথার এক-চতুর্থাংশ মাসেহ করতে হবে। এরপর শাহাদাত অঙ্গুলি দিয়ে হাতের অঙ্গুলিগুলোর পিঠ দিয়ে ঘাড় মাসেহ করতে হবে। মাসেহ করার পর দুই টাখনু পর্যন্ত ভালো করে ধৌত করতে হবে যাতে একটু জায়গাও বাকি না থাকে। ওযুর কাজগুলো পর পর করে যেতে হবে। অর্থাৎ এক অঙ্গের পর অন্য অঙ্গ সঙ্গে সঙ্গে ধৌত করতে হবে। অনেকক্ষণ থেমে থেমে করা যাবে না।

ওয়ুর ফরয

ওয়ুর ফরয চারটি । এ চারটির মধ্যে কোনো একটি বাদ পড়লে ওয়ু হবে না ।

১. মুখমন্ডল একবার ধৌত করা ।
২. উভয় হাত কনুই পর্যন্ত একবার ধোয়া ।
৩. মাথার এক-চতুর্থাংশ একবার মাসেহু করা ।
৪. উভয় পা গিরাসহ একবার ধোয়া ।

ওয়ু ভঙ্গের কারণ

১. পেশাব পায়খানার রাস্তা দিয়ে কোনো কিছু বের হলে ।
২. পেশাব পায়খানার রাস্তা ব্যতীত শরীরের যেকোনো স্থান থেকে যেকোনো অপবিত্র বস্তু বের হয়ে গড়িয়ে গেলে যেমন : রক্ত, পুঁজ ইত্যাদি ।
৩. থুথু, কাশি ব্যতীত বমির সাথে রক্ত, পুঁজ, খাদ্য অথবা অন্য কিছু বের হলে এবং মুখভর্তি বমি হলে ।
৪. থুথুর সাথে বেশি পরিমাণ রক্ত এলে ।
৫. চিত হয়ে, কাত হয়ে অথবা হেলান দিয়ে ঘুমালে ।
৬. বেহুশ হলে ।
৭. পাগল হলে ।
৮. নেশাগ্রস্ত হলে ।
৯. নামাযে অটুহাসি হাসলে

কাজ : শিক্ষার্থীরা প্রত্যেকেই শ্রেণিতে ওয়ু করার উপকরণের মাধ্যমে অথবা প্রতীকী উপকরণের সাহায্যে ওয়ু করার নিয়ম অনুশীলন করবে ।

পাঠ ৫

তায়াম্মুম (اَلتَّيْمُّمُ)

তায়াম্মুম আরবি শব্দ। এর অর্থ হচ্ছে করা। ইসলামি পরিভাষায় পবিত্র মাটি বা ঐ জাতীয় পবিত্র বস্তু (যেমন : পাথর, চূনা, বালি ইত্যাদি) দ্বারা পবিত্র হওয়ার নিয়তে মুখমন্ডল ও উভয় হাত কনুইসহ মাসেহ করাকে তায়াম্মুম বলে। তায়াম্মুম ওয়ু ও গোসল উভয়ের পরিবর্তে করা যায়। তায়াম্মুমের মাধ্যমে পবিত্র হওয়ার অনুমতি উম্মতে মুহাম্মাদির (স.) জন্য আল্লাহ তাআলার এক বিশেষ অনুগ্রহ। বস্তুত পবিত্রতা অর্জনের প্রকৃত মাধ্যম হলো পানি। আল্লাহ তাআলা তাঁর বান্দাদের জন্য প্রচুর পরিমাণে পানি সরবরাহ করে রেখেছেন। তথাপি এমন অবস্থাও সৃষ্টি হতে পারে, যে পানি পাওয়া যাচ্ছে না অথবা পাওয়া গেলেও পানি ব্যবহারে রোগবৃদ্ধি বা প্রাণ নাশের আশংকা রয়েছে। এসব অবস্থায় আল্লাহ তাআলা মাটি দিয়ে পবিত্রতা অর্জনের অনুমতি দিয়েছেন। এ প্রসঙ্গে আল্লাহ তাআলা বলেন : আর তোমরা যদি পানি না পাও, তবে পবিত্র মাটি দ্বারা তায়াম্মুম করবে এবং তোমরা তোমাদের মুখমন্ডল ও হাত মাসেহ করবে। আল্লাহ তাআলা তোমাদের কষ্ট দিতে চান না, বরং তিনি তোমাদের পবিত্র করতে চান ও তোমাদের প্রতি তাঁর অনুগ্রহ সম্পূর্ণ করতে চান, যাতে তোমরা কৃতজ্ঞতা জ্ঞাপন কর। (সূরা মায়িদা : ৬)

তায়াম্মুমের ফরয : তায়াম্মুমের ফরয তিনটি।

১. পবিত্রতা অর্জনের নিয়ত করা
২. পবিত্র মাটি দিয়ে সমস্ত মুখমন্ডল মাসেহ করা
৩. উভয় হাত পবিত্র মাটি দিয়ে কনুইসহ মাসেহ করা

তায়াম্মুম করার নিয়ম

প্রথমে নিয়ত করে 'বিস্মিল্লাহির রাহমানির রাহিম' পড়বে। তারপর দু'হাতের তালু একটু প্রসারিত করে পবিত্র মাটি বা ঐ জাতীয় পবিত্র বস্তু যেমন : পাথর, চূনা, বালি ইত্যাদিতে দুই হাত লাগিয়ে সমস্ত মুখমন্ডল একবার মাসেহ করবে। পুনরায় দুই হাত মাটিতে লাগিয়ে উভয় হাত কনুই পর্যন্ত মাসেহ করবে। হাতে কোনো ঘড়ি বা অন্য কোনো জিনিস থাকলে তা সরিয়ে তার নিচেও মাসেহ করতে হবে।

তায়াম্মুম ভঙ্গের কারণ

যেসব কারণে ওয়ু ভঙ্গ হয় সেসব কারণে তায়াম্মুমও ভঙ্গ হয়। যেসব কারণে গোসল ওয়াজিব হয়, সেসব কারণে তায়াম্মুম ভঙ্গ হয়ে যায়। পানি পাওয়ার সাথে সাথে তায়াম্মুম ভঙ্গ হয়ে যায়। কোনো রোগের কারণে তায়াম্মুম করা হলে, সে রোগ দূর হওয়ার সাথে সাথে তায়াম্মুম ভঙ্গ হয়ে যায়।

কাজ : শিক্ষার্থীরা প্রত্যেকেই শ্রেণিতে তায়াম্মুম করার পদ্ধতি অনুশীলন করবে। শিক্ষক/শিক্ষিকা মহোদয় শিক্ষার্থীদের সহযোগিতা করবেন।

পাঠ ৬
গোসল (الْغُسْلُ)

‘গোসল’ আরবি শব্দ। এর অর্থ ধৌত করা। ইসলামি শরিয়াতের পরিভাষায় পবিত্রতা অর্জন ও আত্মাহর সজ্জি লাভের উদ্দেশ্যে পবিত্র পানি দ্বারা সমস্ত শরীর ধোয়াকে গোসল বলে।

গোসলের ফরয : গোসলের ফরয তিনটি :

১. গড়গড়া করে কুলি করা।
২. নাকের নরম জায়গা পর্যন্ত পানি পৌছানো।
৩. সমস্ত শরীর পানি দিয়ে ধোয়া।

গোসলের নিয়ম

প্রথমে ডান হাতে পানি নিয়ে দুই হাত কজি পর্যন্ত ভালো করে ধৌত করতে হবে। তারপর শরীরের কোথাও অপবিত্র বস্তু লেগে থাকলে তা পরিষ্কার করতে হবে। এরপর ভালোভাবে গুঁষু করতে হবে। কুলি করার সময় কঠিনদেশে এবং নাকের ভিতরে পানি ভালো করে পৌঁছাতে হবে। গুঁষুর পর মাথায় পানি ঢালতে হবে। এরপর ডান কাঁধে তারপর বাম কাঁধে পানি ঢেলে সমস্ত শরীর ধৌত করতে হবে। যেন, শরীরের কোনো অংশ শুকনো না থাকে। সর্বশেষে পা ধুতে হবে। এরপর সমস্ত শরীর কোনো কাপড় বা গামছা দিয়ে মুছে শুকনো কাপড় পরতে হবে। মেয়েদের জন্য খোঁপা বা বেনী খোলার প্রয়োজন নেই, তবে চুলের গোড়ায় অবশ্যই পানি পৌঁছাতে হবে।

কাজ্জ : ‘পবিত্র হওয়ার একমাত্র উপায় হচ্ছে গোসল।’

এ নিয়ে শিক্ষার্থীরা নিজেদের মধ্যে দলে ভাগ হয়ে বিতর্ক করবে।

পাঠ ৭

সালাত (الصَّلَاةُ)

‘সালাত’ আরবি শব্দ। এর আভিধানিক অর্থ দোয়া, রহমত, নামায ও ক্ষমা প্রার্থনা। ইসলামি শরিয়াতের পরিভাষায় : আরকান আহকামসহ বিশেষ নিয়ম ও নির্দিষ্ট সময়ে আল্লাহর ইবাদতের নাম নামায। আল্লাহর নিকট বান্দার আনুগত্য প্রকাশের শ্রেষ্ঠ মাধ্যম হচ্ছে নামায। ইসলামের পাঁচটি রুকন বা স্তম্ভের মধ্যে নামায দ্বিতীয় গুরুত্বপূর্ণ রুকন। হাদিসে আছে, “ইসলাম পাঁচটি স্তম্ভের ওপর প্রতিষ্ঠিত। এ কথার সাক্ষ্য দেওয়া যে আল্লাহ ছাড়া কোনো মা’বুদ নেই এবং হযরত মুহাম্মদ (স.) আল্লাহ তাআলার বান্দা ও রাসুল। নামায প্রতিষ্ঠা করা, যাকাত আদায় করা, হজ করা এবং রমযান মাসে রোযা রাখা।” (বুখারী, তিরমিযি)

পবিত্র কুরআন মাজিদে আল্লাহ তাআলা বলেন :

وَأَقِيمُوا الصَّلَاةَ وَآتُوا الزَّكَاةَ

অর্থ : “এবং তোমরা নামায প্রতিষ্ঠিত কর ও যাকাত আদায় কর।” (সুরা বাকারা : ১১০)

নামায মানুষকে অন্যায় কাজ থেকে বিরত রাখে। যেমন আল্লাহ তাআলা পবিত্র কুরআন মাজিদে ঘোষণা করেন :

إِنَّ الصَّلَاةَ تَنْهَى عَنِ الْفَحْشَاءِ وَالْمُنْكَرِ ۗ

অর্থ : “নিশ্চয়ই নামায মানুষকে অশ্লীল ও খারাপ কাজ থেকে বিরত রাখে।” (সুরা আনকাবুত : ৪৫)

নামায আদায়কারী দুনিয়াতে মর্যাদা পাবে। আখিরাতে পাবে জান্নাত। এ প্রসঙ্গে মহানবি (স.) বলেন, “নামায বেহেশতের চাবি।” কারও হাতে কোনো ঘরের চাবি থাকলে যেমন অতি সহজেই ঘরে প্রবেশ করতে পারে। তেমনি যে ব্যক্তি নামায কয়েম করে সে অতি সহজেই জান্নাতে প্রবেশ করতে পারে। নামায অত্যন্ত গুরুত্বপূর্ণ ইবাদত। নামাযের মাধ্যমে মুমিনের গুনাহ মাফ হয়। রাসুলুল্লাহ (স.) বলেন : ‘এ কথার মধ্যে তোমাদের কী মত? যদি তোমাদের কারো বাড়ির দরজায় একটি প্রবাহিত নদী থাকে, যার মধ্যে সে প্রতিদিন পাঁচবার গোসল করে। তা’হলে তার দেহে কোনো ময়লা বাকী থাকবে কী? সাহাবিগণ (রা) বললেন : তার কোনো ময়লা বাকী থাকবে না। তখন রাসুলুল্লাহ (স.) বললেন : ইহাই পাঁচ ওয়াক্ত নামাযের উদাহরণ যা দ্বারা যাবতীয় গুনাহ মিটিয়ে দেয়া হয়। (বুখারী ও মুসলিম)।

মহানবি (স.) আরও বলেন : “যে ব্যক্তি নামাযের হেফযত করবে কিয়ামতের দিন তার জন্য নামায নূর, দলীল ও নাজাত হবে। আর যে ব্যক্তি নামাযের হেফযত করবে না কিয়ামতের দিন তার জন্য নামায নূর, দলীল ও নাজাত হবে না। তার হাশর হবে করুণ, ফেরাউন, হামান ও উবাই ইবনে খলফের সঙ্গে।” (আহমদ, দারেমী)

এছাড়াও নামাযের আরও কতিপয় গুরুত্ব রয়েছে যা সংক্ষিপ্ত আকারে বর্ণিত হলো :

- ইমানের পরই ইসলামে নামাযের স্থান (হাদিস)।
- নামায ত্যাগকারী মুশরিকদের অন্তর্ভুক্ত হয়ে যায় (সূরা রুম : ৩১)।
- যে নামায নষ্ট করল সে যেন জাতিকে ধ্বংস করল (সূরা মরিয়ম : ৫৯)।
- মৃত্যুকালে রাসুলুল্লাহ (স.)-এর সর্বশেষ উপদেশ ছিল নামায ও নারীজাতি সম্পর্কে। (নাসাঈ, ইবনে মাজাহ)

কাজ : “একজন মানুষ নামাযি হতে পরিবারই মুখ্য ভূমিকা রাখে” এ বিষয়ে শিক্ষার্থীরা দলে বিভক্ত হয়ে বিতর্ক করবে।

পাঠ ৮

সালাতের সময় সূচি (اَوَّلَاتِ الصَّلَاةِ)

যথাসময়ে নামায আদায় করা আল্লাহর আদেশ। সময়মতো নামায আদায় করা ফরয। এ সম্পর্কে আল্লাহ তাআলা বলেন :

إِنَّ الصَّلَاةَ كَانَتْ عَلَى الْمُؤْمِنِينَ كِتَابًا مَّوْفُؤًا ۝

“নিশ্চয়ই সঠিক সময়ে নামায কয়েম করা মুমিনের উপর ফরয।” (সূরা নিসা : ১০৩)

নামায আদায়ের সময় সম্পর্কে আমাদের ভালোভাবে জেনে নিতে হবে।

নামাযের সময়

ফজর : ফজরের সালাতের সময় আরম্ভ হয় সুবহি সাদিক হওয়ার সাথে সাথে এবং সূর্য উদয়ের পূর্ব পর্যন্ত এর সময় থাকে। আকাশের পূর্ব দিগন্তে লম্বমান যে আলোর রেখা দেখা দেয় তাকেই বলে সুবহি সাদিক। এই আলো ক্রমশ বৃদ্ধি পায় এবং শেষে সূর্যোদয় ঘটে। রাসুলুল্লাহ (স.) বলেন : “সুবহি সাদিকের পর হতে সূর্যোদয় না হওয়া পর্যন্ত ফজর সালাতের সময়।” (মুসলিম)

যুহর : দ্বিপ্রহরের পর সূর্য পশ্চিম আকাশে হেলে পড়লেই যুহরের সময় শুরু হয়। প্রত্যেক বস্তুর ছায়া 'ছায়া আসলি' বাদ দিয়ে দ্বিগুণ হওয়া পর্যন্ত এই সময় থাকে। কোনো বস্তুর ঠিক দুপুরের সময়ে যে একটু ছায়া থাকে তাকেই 'ছায়া আসলি' বা আসল ছায়া বলে। যেমন এক হাত লম্বা একটি কাঠির আসল ছায়া দুপুরবেলা চার আঙ্গুল ছিল। তারপর ঐ কাঠির ছায়া যখন দুই হাত চার আঙ্গুল হবে তখন যুহরের সময় শেষ হয়ে যাবে।

আসর : যুহরের সময় শেষ হলেই আসরের সময় শুরু হয় এবং সূর্যাস্তের পূর্ব পর্যন্ত থাকে। তবে সূর্যের বর্ণ হলুদ রং ধারণ করলে আসরের নামায আদায় করা মাকরুহ। আল্লাহ তাআলা বলেন : “তোমরা নামাযসমূহ সংরক্ষণ কর বিশেষ করে মধ্যবর্তী (আসর) নামায।” (সুরা বাকারা : ২৩৮)

মাগরিব : সূর্যাস্তের পর থেকে মাগরিবের সময় শুরু হয় এবং পশ্চিম আকাশে যতক্ষণ লালিমা থাকে ততক্ষণ সময় থাকে। মাগরিবের সময় খুবই কম। তাই সময় হওয়ার সাথে সাথেই নামায আদায় করে নেওয়া উত্তম।

ইশা : মাগরিবের সময় শেষ হওয়ার পর ইশার নামাযের সময় শুরু হয় এবং সুবহি সাদিকের পূর্ব পর্যন্ত থাকে। তবে রাতের প্রথম প্রহরের মধ্যে ইহা আদায় করা উত্তম। রাত দ্বিপ্রহরের পর আদায় করা মাকরুহ। (তিরমিযি)

বিতর : বিতর এর আসল সময় শেষরাত। তবে ইশার নামাযের সাথেও আদায় করা যায়। কিন্তু ইশার আগে পড়া যায় না। (তিরমিযি)

কাজ : শিক্ষার্থীরা চার-পাঁচজনের দলে বিভক্ত হয়ে সালাতসমূহের শুরু ও শেষ সময়ের সংক্ষিপ্ত বিবরণ ছকের মাধ্যমে প্রকাশ কর।

পাঠ ৯

সালাত (নামায) আদায়ের নিয়ম

প্রতিটি কাজেরই একটি নির্দিষ্ট নিয়ম আছে। নিয়মমতো কাজ করলে সুফল পাওয়া যায়। নামায একটি গুরুত্বপূর্ণ ইবাদত। ইহা মহানবি (স.) প্রদর্শিত পন্থায় আদায় করা অত্যন্ত জরুরি। এ প্রসঙ্গে মহানবি (স.) বলেন : “তোমরা নামায আদায় কর যেমনিভাবে আমাকে আদায় করতে দেখেছ।” (বুখারী)

কোনো প্রকার ভুল হলে নামাযের ক্ষতি হয়। এতে বান্দাহর গুনাহ হয়। ভুল নামায আল্লাহ কবুল করেন না। এ প্রসঙ্গে মহান আল্লাহ বলেন :

“ পরিতাপ সেই নামায আদায়কারীদের জন্য যারা তাদের নামাযের মধ্যে অমনোযোগী, যারা লোকদেখানোর জন্য গুটা (সালাত) আদায় করে।” (সুরা মাউন : ৪-৬)

নামায আদায় কালে এ ব্যাপারে নিশ্চিত হতে হবে যে, নামাযের শর্তগুলোর কোনোটাই যেন বাদ না পড়ে। পবিত্র হয়ে একনিষ্ঠভাবে আল্লাহর দিকে মনোনিবেশ করতে হবে। মনে করতে হবে যে, আমি আল্লাহর সামনে দাঁড়িয়ে আছি। তিনি আমাকে দেখছেন।

দুই, তিন ও চার রাকআত বিশিষ্ট নামায আদায়ের নিয়মে কিছুটা তারতম্য আছে। নিচে এর বিবরণ দেওয়া হলো :

দুই রাকআত বিশিষ্ট সালাত আদায়ের নিয়ম

কিবলামুখী হয়ে নিয়ত করে দুই হাত কাঁধ পর্যন্ত তুলে ‘আল্লাহ্ আকবার’ বলে নাভির উপর হাত বাঁধব। তবে স্ত্রীলোকগণ হাত বাঁধবে বুকের উপর। নিয়ত মনে মনে করলেই চলবে। তবে মুখে উচ্চারণ করা উত্তম। এরপর ‘সানা’ পড়ব। এরপর আউয়ু বিল্লাহি মিনাশ শাইতানির রাজিম, বিস্মিল্লাহির রাহমানির রাহিম বলে সুরা ফাতিহা পড়ব। ফাতিহা পড়ে মনে মনে ‘আমিন’ বলব। এরপর অন্য কোনো সুরার কমপক্ষে বড় এক আয়াত অথবা ছোট তিন আয়াত কিংবা একটি সুরা পড়ব। তারপর ‘আল্লাহ্ আকবার’ বলে রুকু করব। রুকুতে কমপক্ষে তিনবার ‘সুবহানা রাবিয়াল আযিম’ বলব। তারপর ‘সামি আল্লাহলিমান হামিদাহ্’ বলে সোজা হয়ে দাঁড়াব। দাঁড়ানো অবস্থায় ‘রাব্বানা লাকাল হাম্দ’ বলব। তারপর ‘আল্লাহ্ আকবার’ বলে সিজদাহ করব। সিজদায় অন্তত তিনবার ‘সুবহানা রাবিয়াল আলা’ বলব। তারপর ‘আল্লাহ্ আকবার’ বলে সোজা হয়ে বসব। আবার ‘আল্লাহ্ আকবার’ বলে দ্বিতীয় সিজদাহ করব। এবারও সিজদায় কমপক্ষে তিনবার ‘সুবহানা রাবিয়াল আলা’ বলব। এরপর ‘আল্লাহ্ আকবার’ বলে সোজা হয়ে দাঁড়াব। এভাবে প্রথম রাকআত শেষ হবে। এখন দ্বিতীয় রাকআত শুরু হলো। বিস্মিল্লাহির রাহমানির রাহিম বলে সুরা ফাতিহা পড়ব। তারপর পূর্বের মতো সুরা মিলাব। তারপর প্রথম রাকআতের মতো রুকু ও সিজদা করে সোজা হয়ে বসব। তাশাহুদ, দরুদ ও দোয়া মাসুরা পড়ে ডানে ও বামে মুখ ফিরিয়ে ‘আসসালামু আলাইকুম ওয়া রাহ্মাতুল্লাহ’ বলব। এইভাবে দুই রাকআত বিশিষ্ট নামায শেষ হবে।

তিন রাকআত বিশিষ্ট সালাত আদায়ের নিয়ম

তিন রাকআত বিশিষ্ট ফরয নামাযে দ্বিতীয় রাকআতের পর শুধু তাশাহুদ পড়ব। তারপর তাকবির বলে সোজা হয়ে দাঁড়াব। এরপর বিস্মিল্লাহির রাহমানির রাহিম বলে শুধু সুরা ফাতিহা পড়ব। অন্য কোনো সুরা পড়ব না। এরপর পূর্বের মতো রুকু সিজদা করব। সিজদার পর সোজা হয়ে বসে তাশাহুদ, দরুদ ও দোয়া মাসুরা পড়ে ডানে বামে সালাম ফিরিয়ে নামায শেষ করব।

চার রাকআত বিশিষ্ট সালাত আদায়ের নিয়ম

চার রাকআত বিশিষ্ট ফরয নামাযে দ্বিতীয় রাকআতের পর শুধু তাশাহুদ পড়ব। পরে তৃতীয় রাকআতের জন্য তাকবির বলে উঠে দাঁড়াব। এরপর বিস্মিল্লাহির রাহমানির রাহিম বলে শুধু সুরা ফাতিহা পড়ব। তারপর রুকু সিজদা করে, চতুর্থ রাকআতের জন্য উঠে দাঁড়াব। চতুর্থ রাকআতে তৃতীয় রাকআতের মতো সুরা ফাতিহা পড়ে রুকু, সিজদা করার পর বসে তাশাহুদ, দরুদ ও দোয়া মাসুরা পড়ে ডানে বামে সালাম ফিরিয়ে নামায শেষ করব। ওয়াজিব, সুন্নাত বা নফল নামায হলে তৃতীয় এবং চতুর্থ রাকআতে সুরা ফাতিহার সাথে অন্য সুরা মিলিয়ে পড়ব।

কাজ : শিক্ষার্থীরা প্রত্যেকেই উপকরণের মাধ্যমে নামায আদায়ের নিয়ম শ্রেণিতে অনুশীলন করবে। শিক্ষক মহোদয় সহযোগিতা করবেন।

পাঠ ১০
সালাতের ফরয

সালাত (নামায) সহিহ বা শুদ্ধ হওয়ার জন্য কতগুলো প্রয়োজনীয় বিষয় রয়েছে। যার কোনো একটি ইচ্ছায়ই হোক আর অনিচ্ছায়ই হোক, বাদ পড়লে নামায বাতিল হয়ে যাবে। নামাযে মোট ফরয চৌদ্দটি। নামাযের পূর্বে প্রস্তুতিমূলক সাতটি ফরয রয়েছে। এগুলোকে নামাযের আহকাম বলা হয়।

১. শরীর পবিত্র হওয়া।
২. পরিধানের কাপড় পবিত্র হওয়া।
৩. নামাযের স্থান পবিত্র হওয়া। কমপক্ষে দাঁড়ানোর জায়গা থেকে সিজদার জায়গা পর্যন্ত পবিত্র হতে হবে।
৪. সতর ঢাকা। পুরুষের নাভি থেকে হাঁটু পর্যন্ত এবং মহিলাদের মুখমন্ডল, দু'হাতের কজি, পায়ের পাতা ছাড়া সমস্ত শরীর ঢাকা।
৫. কিবলামুখী হওয়া। সফর অবস্থায় যানবাহনে সম্পূর্ণ কিবলামুখী না হলেও নামায আদায় হয়ে যাবে। আর অজানা অবস্থায় নিজের প্রবল ধারণা অনুযায়ী কিবলা নির্ধারণ করে নামায আদায় করবে।
৬. নামাযের সময় হওয়া।
৭. নিয়ত করা। যে সময়ের নামায আদায় করবে মনে মনে সেই সময়ের নিয়ত করা। প্রত্যেকেই নিজ নিজ ভাষায় নিয়ত করতে পারবে।

নামাযের ভিতরে সাতটি ফরয রয়েছে : এগুলোকে নামাযের আরকান বলা হয়।

১. তাকবিরে তাহরিমা : আল্লাহ্ আকবার বলে নামায আরম্ভ করা।
২. দাঁড়িয়ে নামায আদায় করা। দাঁড়াতে অক্ষম হলে বসে এবং বসতে সক্ষম না হলে শয়নাবস্থায় ইশারায় নামায আদায় করতে হবে।
৩. সুরা বা আয়াত তিলাওয়াত করা।
৪. রুকু করা।
৫. সিজদাহ করা।
৬. শেষ বৈঠক যে বৈঠকের মধ্যে তাশাহুদ, দরুদ ও দোয়া মাসুরা পড়ে সালাম ফিরিয়ে নামায শেষ করা তাকেই শেষ বৈঠক বলে।
৭. সালামের মাধ্যমে নামায থেকে বের হওয়া।

কাজ : শিক্ষার্থীরা নামাযের আহকাম ও আরকানের সংক্ষিপ্ত শিরোনাম পোস্টারে লিখবে। এরপর শ্রেণিতে উপস্থাপন করবে।

সালাতের ওয়াজিব

নামাযের ওয়াজিব বলতে এমন সব জরুরি বিষয় বোঝায় যার কোনো একটি ভুলবশত ছুটে গেলে সিজদায়ে সাহু দ্বারা নামায শুদ্ধ করতে হয়। কিন্তু ইচ্ছাকৃত ছেড়ে দিলে নামায (ফাসিদ) ভঙ্গ হয়ে যায় এবং পুনরায় নামায আদায় করতে হয়।

নামাযের ওয়াজিব চৌদ্দটি

১. প্রত্যেক রাকআতে সুরা ফাতিহা পড়া।
২. সুরা ফাতিহার সাথে কোনো একটি সুরা বা সুরার অংশবিশেষ পাঠ করা।
৩. রুকু সিজদা ও তিলাওয়াতের আয়াতগুলোর ধারাবাহিকতা ঠিক রাখা।
৪. নামাযের রুকনগুলো সঠিকভাবে আদায় করা।
৫. রুকু করার পর সোজা হয়ে দাঁড়ানো।
৬. দুই সিজদার মাঝখানে সোজা হয়ে বসা।
৭. প্রথম বৈঠক অর্থাৎ তিন বা চার রাকআত বিশিষ্ট নামাযে দুই রাকআত পড়ার পর তাশাহুদ পড়ার জন্য বসা।
৮. তাশাহুদ পাঠ করা।
৯. ইমামের জন্য উচ্চস্বরে তিলাওয়াতের স্থলে উচ্চস্বরে এবং চুপে চুপে তিলাওয়াতের স্থলে চুপে চুপে তিলাওয়াত করা।
১০. বিতর নামাযে দোয়া কুনুত পাঠ করা।
১১. নামাযের মধ্যে সিজদার আয়াত পড়লে তিলাওয়াতে সিজদা করা।
১২. সিজদার মধ্যে উভয় হাত ও হাঁটু মাটিতে রাখা।
১৩. দুই ঈদে অতিরিক্ত ছয় তাকবির বলা।
১৪. আস্‌সালামু আলাইকুম ওয়া রাহ্‌মাতুল্লাহ বলে নামায শেষ করা।

কাজ : শিক্ষার্থীরা দলে বিভক্ত হবে এবং প্রত্যেক দল নামাযের ওয়াজিবগুলোর নাম পোস্টারে লিখবে এবং শ্রেণিতে উপস্থাপন করবে।

সালাতের সুন্নত

রাসুলুল্লাহ (স.) নামাযের মধ্যে ফরয ওয়াজিব ছাড়াও কিছু আমল বা কাজ করেছেন কিন্তু এগুলো আদায়ের ব্যাপারে ফরয ওয়াজিবের ন্যায় তাগিদ করেন নি। এগুলোকে বলা হয় সুন্নত। যদিও এগুলো ছুটে গেলে নামায নষ্ট হয় না কিংবা সাহ্ সিজদা দিতে হয় না, তথাপি এগুলো মেনে চলা উচিত। কারণ রাসুলুল্লাহ (স.) এভাবে নামায আদায় করেছেন এবং অন্যকেও আদায় করতে বলেছেন। রাসুলুল্লাহ (স.) বলেন : “তোমরা নামায আদায় কর, যেমনিভাবে আমাকে নামায আদায় করতে দেখেছ।” (বুখারী)

সালাতের সুন্নত একুশটি এগুলো নিম্নরূপ :

১. তাকবির তাহরিমা বলার সময় পুরুষের কানের লতি ও স্ত্রীলোকের কাঁধ পর্যন্ত দুই হাত উঠানো।
২. তাকবির বলার সময় দুই হাতের আঙ্গুলগুলো খুলে রাখা এবং কিবলামুখী করে রাখা।
৩. নিয়ত করার পর ডান হাত বাম হাতের উপর রাখা। পুরুষের জন্য নাভির উপর এবং স্ত্রীলোকের জন্য বুকের উপর হাত রাখা।
৪. তাকবির তাহরিমা বলার সময় মাথা অবনত না করা।
৫. ইমামের জন্য জোরে তাকবির বলা।
৬. সানা পড়া।
৭. আউযু বিল্লাহ পড়া।
৮. প্রত্যেক রাকাআতে সুরা ফাতিহার পূর্বে মনে মনে বিসমিল্লাহ পড়া।
৯. ফরয নামাযের তৃতীয়, চতুর্থ রাকাআতে শুধুমাত্র সুরা ফাতিহা পড়া।
১০. ফাতিহার পর আমিন বলা।
১১. সানা, আউযুবিল্লাহ, আমিন আন্তে বলা।
১২. এক রুকন থেকে অন্য রুকনে যাওয়ার সময় তাকবির বলা।
১৩. রুকু এবং সিজদায় তাসবিহ পড়া।
১৪. রুকুতে মাথা ও কোমর সোজা রাখা এবং দুই হাতের আঙ্গুল দিয়ে উভয় হাঁটু ধরা।
১৫. রুকু থেকে উঠে দাঁড়ানো অবস্থায় ‘ইমামের সামি আন্লাহ্ লিমান হামিদাহ্’ ও মুক্তাদির ‘রাব্বানা লাকাল হাম্দ’ বলা।
১৬. সিজদায় যাওয়ার সময় প্রথমে হাঁটু, তারপর দুই হাত, তারপর নাক এবং সর্বশেষ কপাল মাটিতে রাখা।
১৭. বসার সময় বাম পা বিছিয়ে তার উপর বসা এবং ডান পা খাড়া রাখা।
১৮. তাশাহ্হুদে লা ইলাহা এর ‘লা’ উচ্চারণের সময় শাহাদাত আঙ্গুল উঠানো।
১৯. শেষ বৈঠকে তাশাহ্হুদের পর দরুদ পড়া।
২০. দরুদের পর দোয়া মাসুরা বা এই জাতীয় কোনো দোয়া পড়া।
২১. প্রথমে ডানে এবং পরে বামে সালাম ফিরানো।

কাজ : শিক্ষার্থীরা দলে বিভক্ত হয়ে এবং প্রত্যেক দল নামাযের সুন্নতগুলো পোস্টার লিখে শ্রেণিতে উপস্থাপন করবে।

সালাতের মুস্তাহাব

নামাযে এমন কিছু কাজ আছে যা মেনে চললে সাওয়াব পাওয়া যায়, কিন্তু ছেড়ে দিলে গুনাহ হয় না। এগুলোকে বলা হয় মুস্তাহাব। নামাযের কতিপয় মুস্তাহাব নিচে দেওয়া হলো :

১. নামাযে দাঁড়ানো অবস্থায় সিজদার স্থানে দৃষ্টি রাখা।
২. রুকুর সময় পায়ের ওপর, সিজদার সময় নাকের ওপর এবং বসা অবস্থায় কোলের ওপর দৃষ্টি রাখা।
৩. হাঁচি এলে, হাই উঠলে, কাশি এলে যথাসম্ভব চেপে রাখার চেষ্টা করা।
৪. ধীরস্থিরভাবে কুরআন পাঠ করা।
৫. সিজদার সময় উভয় হাতের মধ্যস্থানে মাথা রাখা।
৬. মাগরিবের নামাযে ছোট সুরা পাঠ করা।
৭. একা একা নামায আদায় কালে রুকু, সিজদায় তাসবিহ তিনবারের বেশি (পাঁচ, সাত, নয় ইত্যাদি) পড়া।

সালাত ভঙ্গ হওয়ার কারণ

নামাযের শুরুতে আমরা নিয়ত করে ‘আল্লাহ্ আকবার’ বলে হাত বাঁধি, একে বলা হয় তাকবিরে তাহরিমা। এই তাকবির বলার পর অন্য কোনো কাজ বা কথা বলা হারাম হয়ে যায়। যদি কেউ এমন করে ফেলে তবে নামায বাতিল হবে। কী কী কাজ করলে নামায ভেঙ্গে যায় তা আমাদের জেনে রাখা প্রয়োজন। নামায ভঙ্গ হওয়ার কারণগুলো নিচে উল্লেখ করা হলো :

১. নামাযের মধ্যে কাউকে সালাম দিলে এবং সালামের উত্তর দিলে। ২. নামাযের মধ্যে কথা বললে। ৩. কিছু খেলে। ৪. কিছু পান করলে। ৫. শব্দ করে হাসলে। ৬. বিপদ বা কষ্টের জন্য উচ্চস্বরে কাঁদলে। ৭. ব্যথা বা রোগের কারণে উহ্ আহ্ এরূপ শব্দ করলে। ৮. কুরআন মাজিদ দেখে পড়লে। ৯. কিবলার দিক থেকে মুখ ঘুরালে। ১০. দুই হাত দিয়ে কোনো কাজ করলে। ১১. মুজাদি ইমাম অপেক্ষা সামনে দাঁড়ালে। ১২. অপবিত্র স্থানে সিজদাহ করলে। ১৩. দুনিয়ার কোনো কিছু প্রার্থনা করলে। ১৪. বিনা কারণে বারবার কাশি দিলে। ১৫. নামাযের কোনো ফরয বাদ গেলে। ১৬. কোনো সুসংবাদে ‘আলহামদুলিল্লাহ্’ বললে। ১৭. কোনো দুঃসংবাদে ‘ইন্নািলিল্লাহ্’ বললে। ১৮. হাঁচি দিয়ে ‘আলহামদুলিল্লাহ্’ বললে। ১৯. হাঁচির উত্তরে ‘ইয়ারহামুকাল্লাহ্’ বললে। ২০. নিজের ইমাম ছাড়া অন্য কারো ভুল ধরলে। ২১. আমলে কাসির করলে (এমন কাজ করা যা দেখলে মানুষ মনে করবে, সে নামায পড়ছে না)।

সালাত মাকরুহ হওয়ার কারণ

এমন কিছু কাজ আছে যা করলে নামায নষ্ট না হলেও সাওয়াব কম হয়, সেগুলোকে মাকরুহ বলে। নিম্নে এমন কতকগুলো কাজের কথা উল্লেখ করা হলো :

১. নামাযে বিনা কারণে আঙ্গুল মটকানো। ২. আলসেমী করে খালি মাথায় নামায আদায় করা। ৩. কাপড় ধুলাবালি থেকে বাঁচানোর জন্য গুটিয়ে নেওয়া। ৪. পরনের কাপড়, বোতাম, দাড়ি ইত্যাদি অহেতুক নাড়াচানা করা। ৫. ময়লা ও অশালীন পোশাক পরে নামায আদায় করা। ৬. পেশাব পায়খানা চেপে রেখে নামায আদায় করা। ৭. নামাযে এদিক ওদিক তাকানো। ৮. সিজদায় দুই হাত কনুই পর্যন্ত বিছিয়ে দেওয়া। ৯. ইমামের মেহরাবের ভিতরে দাঁড়ানো। ১০. প্রাণীর ছবিযুক্ত কাপড় পরা। ১১. আগের কাতারে জায়গা থাকলেও একাকী পিছনে দাঁড়ানো। ১২. ইশারায় সালাম করা। ১৩. শুধু কপাল অথবা শুধু নাক মাটিতে ঠেকিয়ে সিজদাহ করা। ১৪. বিনা কারণে শুধু ইমামের উচ্চস্থানে দাঁড়ানো। ১৫. বিনা কারণে চারজানু হয়ে বসা। ১৬. চোখ বন্ধ করে নামায আদায় করা। ১৭. তিলাওয়াত পুরা না করেই রুকু জন্ম বুঁকে পড়া। ১৮. সিজদার সময় পা মাটি থেকে ওপরে উঠানো। ১৯. নামাযে আয়াত, তাসবিহ আঙ্গুল দিয়ে গণনা করা। ২০. তিলাওয়াতে অসুবিধা হয় মুখে এমন কোনো জিনিস রাখা।

সালাতের নিষিদ্ধ সময়

তিন সময় নামায পড়া নিষেধ : ১. ঠিক সূর্যোদয়ের সময়। ২. ঠিক দ্বিপ্রহরের সময়। ৩. সূর্যাস্তের সময়, তবে কোনো কারণে ঐ দিনের আসরের নামায আদায় করা না হলে তা ঐ সময় আদায় করা যাবে কিন্তু মাকরুহ হবে।

নামাযের মাকরুহ সময়

১. ফজরের নামাযের পর সূর্য উদয় না হওয়া পর্যন্ত। ২. আসরের পর সূর্যাস্ত পর্যন্ত। ৩. ফজরের সময় হলে ঐ সময়ের সন্ধ্যাত ছাড়া অন্য কোনো নামায পড়া। ৪. ফরয নামাযের জন্য যখন তাকবির দেওয়া হয় তখন অন্য নামায শুরু করা। ৫. যখন ইমাম জুমার খুতবা দিতে থাকেন তখন কোনো নামায শুরু করা। ৬. ইশার নামায মধ্যরাতের পরে পড়া।

কাজ : শিক্ষার্থীরা দলে বিভক্ত হয়ে নামায মাকরুহ হওয়ার কারণগুলো লিখে শ্রেণিতে উপস্থাপন করবে।

পাঠ ১১
সিজদা (السَّجْدَةُ)

‘সিজদা’ আরবি শব্দ। এর অর্থ মাথা অবনতকরণ। ইসলামি শরিয়াতের পরিভাষায় আল্লাহর সন্তুষ্টি লাভের জন্য বান্দা তার কপাল জমিনে রাখাকে সিজদা বলে।

সিজদার প্রকারভেদ

ফরয সিজদা : মানুষ নামায আদায়ের সময় যেসব সিজদা দিয়ে থাকে তাকে ফরয সিজদা বলে।

ওয়াজিব সিজদা : ভুলবশত নামাযে কোনো ওয়াজিব ছুটে গেলে এবং সিজদার আয়াত তিলাওয়াত করলে যে সিজদা দিতে হয় তাকে ওয়াজিব সিজদা বলে।

মুস্তাহাব সিজদা : কোনো নিয়ামত প্রাপ্ত হলে, বিপদমুক্ত হলে আল্লাহর কৃতজ্ঞতা প্রকাশে যে সিজদা দেওয়া হয় তাকে মুস্তাহাব সিজদা বলে।

সিদায়ে সাহ্ সিজদায়ে সাহ্ অর্থ ভুলের জন্য সিজদা। ভুলবশত নামাযে ওয়াজিব বাদ পড়লে, তা সংশোধনের জন্য নামাযের শেষ বৈঠকে দুটি সিজদা করা হয়, একেই সিজদায়ে সাহ্ বলে।

সিজদায়ে সাহ্ আদায় করার নিয়ম :

নামাযের শেষ বৈঠকে তাশাহুদ পড়ার পর ডান দিকে সালাম ফিরাব। তারপর ‘আল্লাহ্ আকবার’ বলে নামাযের সিজদার ন্যায় দু’টি সিজদাহ করে তাশাহুদ, দরুদ ও দোয়া মাসুরা পড়বে। তারপর দু’দিকে সালাম ফিরিয়ে নামায শেষ করবে। সিজদায়ে সাহ্ সম্পর্কে মহানবি (স.) বলেন : “আমি তোমাদের ন্যায় একজন মানুষ। তোমরা যেমন ভুলে যাও, আমিও তেমনি ভুলে যাই। সুতরাং যখন আমি ভুলে যাব তখন তোমরা আমাকে স্মরণ করিয়ে দিবে। যখন তোমাদের কেউ নামাযের মধ্যে সন্দেহ করবে তখন সে গভীর চিন্তা করে সঠিক বিষয়টি ঠিক করে নিবে। অতঃপর এর উপর ভিত্তি করে নামায পূর্ণ করবে এবং সালাম দিয়ে দু’টি সিজদা করবে। (বুখারী ও মুসলিম)

সিজদায়ে সাহ্ ওয়াজিব হওয়ার কারণ :

১. ভুল বশত নামাযের কোনো ওয়াজিব ছুটে গেলে। ২. নামাযের কাজগুলো পরপর আদায় করতে বিলম্ব করলে যেমন : ফাতিহা পড়ার পর চুপ করে থাকলে, কিছুক্ষণ চুপ থাকার পর কোনো সুরা পড়লে। ৩. কোনো ফরয আদায় করতে বিলম্ব হলে। ৪. নামায আদায়ে ধারাবাহিকতার ব্যতিক্রম হলে যেমন : রুকু আগেই সিজদাহ করলে। ৫. কোনো ফরয একবারের স্থলে একাধিকবার করলে। ৬. কোনো ওয়াজিবের রূপ পরিবর্তন করলে যেমন : সরবে তিলাওয়াতের স্থলে নীরবে এবং নীরবে তিলাওয়াতের স্থলে সরবে পড়লে।

মনে রাখা দরকার, প্রথম বৈঠক করতে ভুলে গেলে যদি দাঁড়ানোর পূর্বেই মনে পড়ে তা হলে বসে যাবো এবং বৈঠক পূর্ণ করব। আর যদি দাঁড়ানোর পর মনে পড়ে তা হলে বসব না। নামায শেষে সাহ্ সিজদা করব।

কাজ : সিজদা সাহ্ ওয়াজিব হওয়ার কারণগুলো ছক আকারে লিখে শিক্ষার্থীরা শ্রেণিতে উপস্থাপন করবে।

পাঠ ১২

সিজদায়ে তিলাওয়াত (سَجْدَةُ التَّلَاوَةِ)

পবিত্র কুরআন মাজিদে কতগুলো আয়াত আছে যা পড়লে বা শুনলে সিজদাহ করা জরুরি। সিজদা আদায় না করলে গুনাহগার হবে। হাদিসে আছে, 'যখন কেউ সিজদার আয়াত পড়ে সিজদা করে তখন শয়তান একপাশে বসে বিলাপ করতে থাকে এবং বলে, হায় আফসোস! আদম সন্তানদের সিজদাহর হুকুম দেওয়া হলো, তারা সিজদা করলো এবং জান্নাতের দাবিদার হলো। আর আমাকে সিজদার হুকুম দেওয়া হলো আমি অস্বীকার করে জাহান্নামি হলাম।' (মুসলিম)

সিজদায়ে তিলাওয়াতের নিয়ম

কিবলামুখী হয়ে দাঁড়িয়ে সিজদায়ে তিলাওয়াতের নিয়ত করে 'আল্লাহু আকবার' বলে সিজদাহ করতে হয়। সিজদাহ করার পর 'আল্লাহু আকবার' বলে উঠে দাঁড়াতে হয়। তাশাহুদ পড়া ও সালাম ফিরানোর প্রয়োজন নেই। সিজদায়ে তিলাওয়াতে একটি সিজদাহ করলেই চলবে।

সিজদায়ে তিলাওয়াতের চারটি শর্ত

১. তাহারাৎ অর্থাৎ পবিত্র হওয়া। ২. সতর ঢাকা। ৩. কিবলামুখী হওয়া। ৪. সিজদায়ে তিলাওয়াতের নিয়ত করা।

সিজদায়ে তিলাওয়াতের স্থান:

১. সুরা আল আরাফ আয়াত : ২০৬। ২. সুরা রা'দ আয়াত : ১৫। ৩. সুরা আন নাহল আয়াত : ৪৯-৫০। ৪. সুরা বনী ইসরাইল আয়াত : ১০৭-১০৯। ৫. সুরা মারইয়াম আয়াত : ৫৮। ৬. সুরা আল-হাজ আয়াত : ১৮। ৭. সুরা আল-ফুরকান আয়াত : ৬০। ৮. সুরা আন নামল আয়াত : ২৫-২৬। ৯. সুরা আলিফ-লাম-মীম-সিজদাহ আয়াত : ১৫। ১০. সুরা সাদ আয়াত : ২৪। ১১. সুরা হা-মীম-সিজদাহ আয়াত : ৩৮। ১২. সুরা আন নাজম আয়াত : ৬২। ১৩. সুরা আল ইনশিকাক আয়াত : ২১। ১৪. সুরা আল আলাক আয়াত : ১৯।

কাজ : শিক্ষার্থীরা দলে বিভক্ত হয়ে যাবে এবং সুরার নাম ও আয়াত নম্বরসহ সিজদায় তিলাওয়াতের স্থানসমূহ ছক আকারে লিখে শ্রেণিতে উপস্থাপন করবে।

পাঠ ১৩ সালাতের নৈতিক শিক্ষা

সালাত (নামায) ইসলামের একটি গুরুত্বপূর্ণ ইবাদত। এর সাথে নৈতিকতা বিষয়টি বিশেষভাবে জড়িত। ইসলামি বিধান অনুযায়ী নামায আদায় করলে একেতো আল্লাহর আইন পালন করা হয়। অপরদিকে বান্দার পার্থিব জীবনেও নৈতিকতার উন্নতি ঘটে। আর কোনো মানুষের নৈতিকতার উন্নতি ঘটলে, দুনিয়াতে যেমনি পাবে সম্মান ও মর্যাদা তেমনি পরকালেও পাবে সুখ শান্তি।

নিচে নামাযের কতিপয় নৈতিক বিষয়ের বর্ণনা করা হলো :

পরিষ্কার পরিচ্ছন্নতা

নামায আদায়কারীকে পরিষ্কার পরিচ্ছন্ন ও পবিত্র থাকতে হয়। সকালে ঘুম থেকে উঠে একজন মুমিন যখন নামায আদায় করবে তখন তাকে অবশ্যই ওয়ু করতে হয়। আর নামাযের পূর্বশর্তসমূহের একটি হলো পবিত্রতা অর্জন করা যেমন : আল্লাহ তাআলা বলেন :

وَأَنْ كُنْتُمْ جُنُبًا فَاطَّهَّرُوا ۗ

“তোমরা অপবিত্র হলে পবিত্রতা অর্জন কর।” (সূরা মায়েরা : ৬)

নামাযের আগে রাসুলুল্লাহ (স.) মিসওয়াক করতে নির্দেশ দিয়েছেন। যথানিয়মে দাঁত পরিষ্কার করলে মুখে দুর্গন্ধ থাকে না। রোগের আশংকা থেকে নিরাপদ থাকা যায়। তিনি বলেন : “আমার উম্মতের উপর কষ্টকর না হলে আমি তাদেরকে প্রতি নামাযে মিসওয়াক করার নির্দেশ দিতাম।” (ইবনে মাজাহ)।

নামায আদায় করতে হলে দৈনিক পাঁচবার ওয়ু করতে হয় যা শরীরের বিশেষ অঙ্গকে পরিষ্কার পরিচ্ছন্ন রাখতে সহায়তা করে। এটা নাক, মুখ, দাঁত ও পোশাক পরিচ্ছন্ন পরিষ্কার রাখার অতুলনীয় কৌশলও বটে। যদি মুসল্লির শরীর, জামাকাপড় ইত্যাদি পরিষ্কার পরিচ্ছন্ন থাকে তাহলে অন্য মুসল্লির কষ্ট হয় না। বরং সুন্দর ও সুস্থ মন নিয়ে একে অপরের সাথে দাঁড়াতে স্বাচ্ছন্দ্যবোধ করে। পরিষ্কার পরিচ্ছন্নতার এ শিক্ষা নামায থেকেই পাওয়া যায়।

কাজ : শিক্ষার্থীরা দলে বিভক্ত হয়ে প্রত্যেক দল পরিষ্কার পরিচ্ছন্নতা অর্জনে সালাতের ভূমিকা বিষয়ক একটি অনুচ্ছেদ তৈরি করে শ্রেণিতে উপস্থাপন করবে।

সময়ানুবর্তিতা :

নামায কঠোর নিয়মানুবর্তিতা ও সময়নিষ্ঠা শিক্ষা দেয়। একজন মু'মিন ব্যক্তিকে দৈনিক পাঁচবার নির্ধারিত সময়ে নামায আদায় করতে হয়। এতে সে সময়ের প্রতি সচেতন হয়। একটি নির্দিষ্ট সময়ে জামাআতে নামায অনুষ্ঠিত হয়। কোনো ব্যক্তি সময়মতো জামাআতে নামায আদায় করতে না পারলে সে জামাআতের সাওয়াব হতে বঞ্চিত হবে। কিছু সময় পরই নামায আদায় করতে হয় বলে সময়কে শিথিল করা যায় না। বরং সবসময়ই নামাযের আহবানে সাড়া দেওয়ার জন্য মু'মিন ব্যক্তিকে প্রস্তুত থাকতে হয়। পবিত্র কুরআনে আল্লাহ তাআলা বলেন :

إِنَّ الصَّلَاةَ كَانَتْ عَلَى الْمُؤْمِنِينَ كِتَابًا مَّوْضُوعًا

“নির্ধারিত সময়ে যথাযথভাবে নামায আদায় করা মু'মিনদের জন্য অবশ্য কর্তব্য।” (সূরা নিসা : ১০৩)

প্রতিদিন পাঁচবার নির্ধারিত সময়ে জামাআতে নামায আদায় করা মু'মিন বান্দাকে সময়নিষ্ঠ হতে এবং সময়ের প্রতি গুরুত্ব উপলব্ধি করতে উদ্বুদ্ধ করে। সে অকারণে সময় নষ্ট করে না। সমাজের অপরাপর লোকের সাথে সময়মতো কর্তব্য কাজে অভ্যস্ত হয়।

এতে সে জীবনের সব কাজেই সময়নিষ্ঠ ও দায়িত্বশীল হয়ে উঠে। আজকের শিশু আগামী দিনে জাতির কর্ণধার। প্রত্যেক মুসলিম দৈনিক পাঁচ ওয়াক্ত নামায আদায়ের মাধ্যমে সময়নিষ্ঠ ও কর্তব্যপরায়ণ হলে সে অবশ্যই একটি জাতির অমূল্য মানব সম্পদে পরিণত হবে। সময়মতো নামায আদায় করার মাধ্যমে একজন মুসলিম সন্তান তার কর্মস্থলে যথাসময়ে কর্তব্য পালনের শিক্ষা গ্রহণ করবে। সে কোনো কাজ আগামী দিনের জন্য ফেলে রাখবে না। বরং যথাসময়ে কঠোর পরিশ্রমে ঐ কাজ সম্পন্ন করবে। দেশের সেনাবিভাগ কঠোর সময়ানুবর্তিতার দিকে মনোনিবেশ করে। এ বিভাগে কর্তব্যরত সৈনিকগণ নির্ধারিত সময়ে বিউগল বেজে উঠলে শয্যা ত্যাগ করে নির্দিষ্ট ইউনিফর্ম পরিধান করে নির্দিষ্ট প্রশিক্ষণ বা কাজে অংশগ্রহণ করতে হয়। দেশ রক্ষা ও শত্রুদের সম্ভাব্য আক্রমণের মোকাবিলায় জন্যই সৈন্যদেরকে এরূপ শৃঙ্খলা ও সময়ানুবর্তিতা শিক্ষা দেয়া হয়ে থাকে। অথচ তাদের জীবনে এরূপ দুঃসময় নাও আসতে পারে। কিন্তু মুসলিমগণ অবিরত তাদের কর্তব্য পালনে নিয়োজিত। তাদের চারদিকে ছড়িয়ে থাকা অসৎ ও অশুভ শক্তির বিরুদ্ধে তাদের সর্বদা প্রচেষ্টা চালিয়ে যেতেই হবে। মহান আল্লাহ দৈনিক পাঁচবার তাঁর মু'মিন বান্দাকে আযানের মাধ্যমে নামাযের আহবান জানান। এ আহবানে আল্লাহর সৈনিকগণ দৌড়ে আসবে এবং প্রমাণ করবে, সব সময় ও সকল অবস্থায় তারা আল্লাহর হুকুম পালনে প্রস্তুত।

কাজ : “সময়ানুবর্তিতাই মানুষের ইহজীবনে সম্মান বাড়ায়”- এ বিষয়ে শিক্ষার্থীরা দলে বিভক্ত হয়ে বিতর্কের আয়োজন করবে।

শৃঙ্খলা :

শৃঙ্খলা মানে সুনির্দিষ্ট নিয়মনীতি। সামাজিক জীব হিসেবে মানুষের জীবনে শৃঙ্খলার গুরুত্ব অপরিসীম। রাস্তাঘাটে যানবাহন চালনায় চালককে যেমন একটি বিশেষ নিয়ম মানতে হয়। আর এই নিয়মের ব্যতিক্রম হলেই দুর্ঘটনার সম্ভাবনা থাকে। তেমনি মানুষের জীবনও একটি সুনির্দিষ্ট নিয়মনীতির অধীনে আবদ্ধ। বিশৃঙ্খলভাবে জীবন পরিচালনা করলে বিশাল ক্ষতির সম্মুখীন হতে পারে। আর যদি সুশৃঙ্খলভাবে জীবন পরিচালনা করে তাহলে নিজে যেমন উপকৃত হবে তেমনি সমাজের অন্য ব্যক্তিও নিরাপদে থাকবে। আর শৃঙ্খলার এই শিক্ষা নামায থেকেই পাওয়া যায়।

নামাযে একাকী হোক আর জামাআতবদ্ধ হোক বান্দাকে এক কিবলার দিকেই মুখ ফিরাতে হয়। একই সময় আযান হয়। একই সময়ে নির্দিষ্ট নামায আদায়ের জন্য একই ইমামের পেছনে সারিবদ্ধভাবে দাঁড়াতে হয়। এভাবে নামায আদায়ের ফলে মু'মিনের মাঝে শৃঙ্খলাবোধ, নেতার প্রতি আনুগত্যবোধ গড়ে ওঠে। সমাজে কোনো সমস্যা দেখা দিলে, সকলে মিলেমিশে মীমাংসা করার শিক্ষা নামাযের মাধ্যমে লাভ করা যায়।

কাজ : নামায আদায়ের মাধ্যমে একজন মানুষ তার কর্মস্থলেও সুশৃঙ্খল হয়, এ বিষয়ে শিক্ষার্থীরা দলে বিভক্ত হয়ে আলোচনা করবে।

একাত্মতা :

আল্লাহর সান্নিধ্য লাভের অন্যতম উপায় হচ্ছে একাত্মতার সাথে নামায আদায় করা। নামাযের মাধ্যমে বান্দা আল্লাহর নিকট তার আবেদন নিবেদন পেশ করে তৃপ্তি লাভ করতে পারে। আর আল্লাহ তাআলাও বান্দার আবেদন গ্রহণ করে থাকেন। তাহলে বান্দাকে অবশ্যই বিনয়ের সহিত নামাযে দাঁড়াতে হবে। যেমন, কুরআন মাজিদে আল্লাহ তাআলা বলেন :

“তোমরা আল্লাহর উদ্দেশ্যে বিনীতভাবে দাঁড়াবে।” (সূরা বাকারা : ২৩৮)

নামায অবস্থায় বান্দার মন এদিক ওদিক ছোটাছুটি করে অথচ নামাযি টেরও পায় না। কারণ, মানব মন কল্পনার রাজ্যে বিচরণ করতে অভ্যস্ত। গভীর মনোযোগের সাথে কোনো কাজে নিয়োজিত না হলে মন স্থির থাকে না। তাছাড়া শয়তান হচ্ছে মানুষের প্রকাশ্য শত্রু। সে বান্দার সকল ইবাদত বিশেষত নামায নষ্ট করার জন্য বিভিন্ন বিষয় মনের মধ্যে হাজির করে দেয়। তাই বান্দার মন নামাযে ঠিক থাকে না। এ জন্যই বান্দাকে খুশ খুশু (বিনয় ও সহিষ্ণু) ও মনের স্থিরতার সাথে নামায আদায় করতে হবে। যেমন : পবিত্র কুরআনে আছে, “মু'মিনগণ অবশ্যই সফলকাম হয়েছে, যারা নিজেদের নামাযে বিনয়ী।” (সূরা মুমিনুন : ১, ২)

কাজ : ‘একাত্মতা হচ্ছে নামায কবুল হওয়ার একমাত্র উপায়।’ শিক্ষার্থীরা দলে বিভক্ত হয়ে এ বিষয়ে আলোচনা করবে।

নিয়মানুবর্তিতা :

নামায মানুষকে নিয়মানুবর্তিতার প্রশিক্ষণ দিয়ে থাকে । যে প্রশিক্ষণের মধ্যে মানবজাতির কল্যাণ নিহিত । এ প্রশিক্ষণের মাধ্যমে মানুষ যা অর্জন করে তা নিচে বর্ণনা করা হলো :

১. মানুষ তার প্রভুর কর্তব্য পালনে অভ্যস্ত হয় ।
২. সমাজে কে অনুগত আর কে বিদ্রোহী নামায তা নির্ধারণ করে দেয় ।
৩. মানুষকে ইসলামের পরিপূর্ণ আদর্শ মানব হিসেবে গড়ে তোলে এবং তাকে ইসলামের উপর সুদৃঢ় থাকতে সাহায্য করে ।
৪. ইহা বান্দার চরিত্র শক্তিকে আরও দৃঢ় করে ।

নামায মানব চরিত্রের দুর্বলতা দূর করে । সাত বছর বয়সে ছেলেমেয়েদের নামাযের তাগিদ দিতে বলা হয়েছে । এতে তারা শিথিলতা করলে দশ বছর বয়সে তাদের প্রহার করে নামাযে অভ্যস্ত করে তোলার নির্দেশ রয়েছে । নামায আদায়ের দায়িত্ব হতে কেউ রেহাই পায় না । নামাযের সময় হলে সকল মু'মিন ব্যক্তি সর্বাবস্থায় নামায আদায় করতে বাধ্য ।

যে ব্যক্তি নিয়মনীতি মেনে, সময়নিষ্ঠ হয়ে একাত্তার সাথে নামায আদায় করবে, সে অবশ্যই হবে একজন দায়িত্ব সচেতন, সুশৃঙ্খল ও ন্যায়পরায়ণ ব্যক্তি । এমন ব্যক্তি সমাজে শৃঙ্খলা ও ন্যায়বিচার প্রতিষ্ঠায় বিশেষ ভূমিকা রাখতে সক্ষম হবে ।

কাজ : নামাযের নিয়মানুবর্তিতায় শিক্ষার্থীরা জীবনে কী কী পরিবর্তন আনবে? শিক্ষার্থীরা প্রত্যেকেই নিজ নিজ খাতায় লিখবে এবং শ্রেণির কাজ হিসেবে শিক্ষককে দেখাবে ।

সাম্য :

জামাআতে নামায আদায়কারী মুসল্লিগণ মসজিদে একত্র হয়ে একই কাতারে দাঁড়িয়ে কাঁধে কাঁধ মিলিয়ে একই উদ্দেশ্যে ও লক্ষ্যে আল্লাহর সামনে দণ্ডায়মান হয় । সকল মুজাদিই ইমামের প্রতি আনুগত্য প্রকাশ করে থাকে । তখন ধনী-গরিব, আমীর-ফকীর, শাসক-শাসিত, ছোট বড় ভেদাভেদ থাকে না । মসজিদে ইমাম মুয়াযযিন ব্যতীত অন্য কারো জন্য স্থান নির্ধারিত থাকে না । এটি ইসলামি ভ্রাতৃত্ব ও সাম্যবাদের মূর্ত প্রতীক । সমাজে পরস্পর পরস্পরকে সাহায্য সহযোগিতা করে । সামাজিক যে কোনো সমস্যা সমাধানে একতাবদ্ধ হয়ে এগিয়ে আসে এবং শান্তিপূর্ণ ও গ্রহণযোগ্য সমাধান দিতে সক্ষম হয় ।

সাম্য ও ভ্রাতৃত্ববোধের এ শিক্ষা একজন মুমিনকে সমাজের অন্য ধর্মাবলম্বীদের প্রতি সহানুভূতিশীল, দায়িত্বশীল ও সহযোগিতার মনোভাব গড়ে তোলে । এতে সমাজে ছোট-বড়, ঘনী-গরিব শ্রেণিষ্মম্য ইত্যাদি দূর হয় এবং অতুলনীয় সাম্য প্রতিষ্ঠিত হয় । আর এর ফলেই সমাজে কোনো রকম কলহ-বিবাদ থাকতে পারে না । বরং প্রতিষ্ঠিত হবে একটি আদর্শ সমাজ ।

অনুশীলনমূলক প্রশ্ন

শূন্যস্থান পূরণ কর :

১. পবিত্র থাকলে সুস্থ থাকে ।
২. পবিত্রতা ও অপবিত্রতার মানদণ্ড হচ্ছে ।
৩. ভালোভাবে ওয়ু করলে মন থাকে ।
৪. আল্লাহর নিকট বান্দার আনুগত্য প্রকাশের শ্রেষ্ঠ মাধ্যম হচ্ছে..... ।
৫. নিশ্চয়ই হচ্ছে মানুষের প্রকাশ্য শত্রু ।

বাম পাশ থেকে শব্দ বা বাক্যাংশ নিয়ে ডান পাশের সাথে মিল কর :

বাম পাশ	ডান পাশ
১ . তায়াম্মুমের	ফরয চারটি
২ . সালাতের আরকান	গোসল করা মুস্তাহাব
৩ . ওয়ুর	ফরয তিনটি
৪ . সালাতে সুরা	সাতটি
৫ . সতর ঢেকে	ফাতিহা পড়া ওয়াজিব

সংক্ষিপ্ত উত্তর প্রশ্ন :

- ১ . ইবাদত কত প্রকার ও কী কী ? প্রত্যেক প্রকারের সংক্ষিপ্ত পরিচয় দাও ।
- ২ . তায়াম্মুম বলতে কী বুঝ ?
- ৩ . সালাতে একাগ্রতা বলতে কী বোঝায় ?

বর্ণনামূলক প্রশ্ন :

- ১ . পবিত্র থাকার উপায় ও প্রয়োজনীয়তা আলোচনা কর ।
- ২ . সালাত আদায়ের নিয়ম বর্ণনা কর ।
- ৩ . বাস্তবজীবনে সময়ানুবর্তিতার গুরুত্ব আলোচনা কর ।

বহুনির্বাচনি প্রশ্ন :

১. ইবাদত কত প্রকার ?

- ক) দুই খ) তিন
গ) চার ঘ) পাঁচ ।

২. ইবাদতের মুখ্য উদ্দেশ্য হচ্ছে –

- ক. আল্লাহর সন্তুষ্টি অর্জন
খ. রাসুলের সন্তুষ্টি অর্জন
গ. সাহাবীদের সন্তুষ্টি অর্জন
ঘ. তাবিঈদের সন্তুষ্টি অর্জন ।

৩. কোন ইবাদতের মাধ্যমে মানবদেহে ময়লা থাকে না ?

- ক) হজ খ) যাকাত
গ) সাওম ঘ) সালাত ।

নিচের অনুচ্ছেদটি পড় এবং ৪ ও ৫ নম্বর প্রশ্নের উত্তর দাও ।

রিসাম ষষ্ঠ শ্রেণির ছাত্র । সে আযান শুনে তাড়াতাড়ি ওয়ু করে মসজিদে গেল । জামাআত গুরুর আগে তার বন্ধু রিসাদ তাকে বললো, তোমার গোড়ালির পেছনের অংশ শুকনো ।

৪. এমতাবস্থায় রিসামের করণীয় হচ্ছে –

- i. পুনরায় ওয়ু করা
ii. শুকনো অংশটুকু ধৌত করা
iii. রিসাদের কথায় গুরুত্ব না দেওয়া ।

নিচের কোনটি সঠিক ?

- ক) i
খ) ii
গ) iii
ঘ) i, ii ।

৫. রিসামকে ওয়ু সম্পর্কে সচেতন করে দেওয়ায় রিসাদ কী লাভ করবে ?

- ক) পুণ্য
খ) জান্নাত
গ) জান্নাতের ফল
ঘ) জান্নাতের সুবাস ।

সৃজনশীল প্রশ্ন :

১. শোয়াইব ও মুয়ীয একই অফিসে চাকরি করেন। আযান হলেই শোয়াইব মসজিদে যায়। সে তার কর্মস্থলে কর্তব্যপরায়ণ ও সময়নিষ্ঠ হিসেবে পরিচিত। তার কর্মকাণ্ডে মুগ্ধ হয়ে তার সহকর্মী মুয়ীয বললো, 'নিশ্চয়ই নামাজ মানুষকে অশ্রীল ও খারাপ কাজ থেকে বিরত রাখে।'

ক. ইবাদত শব্দের অর্থ কী ?

খ. নাজাসাত বর্জনীয় কেন ?

গ. কোন ইবাদত শোয়াইবকে তার কর্মস্থলে প্রশংসিত করেছে ? ব্যাখ্যা কর।

ঘ. মুয়ীযের সর্বশেষ উক্তিটি বিশ্লেষণ কর।

২. দিয়া প্রতিদিন খুব সকালে ঘুম থেকে ওঠে। সালাত আদায় করে এবং পাঠে মনোনিবেশ করে। বার্ষিক পরীক্ষায় সে ভালো ফলাফল করেছে। দিশা আলসেমি করে দেরিতে ঘুম থেকে ওঠে এবং নিয়মিত সালাত আদায় করে না। এজন্য বাবা-মা প্রায়ই বলে যে দিশা ফজরের নামায না পড়ার ফলে সকালে পড়ালেখার জন্য যথেষ্ট সময় পায় না। বার্ষিক পরীক্ষায়ও দিশা সন্তোষজনক ফলাফল অর্জন করতে পারে নি।

ক. সালাত শব্দের অর্থ কী ?

খ. পবিত্রতা মানুষের মধ্যে কী প্রভাব বিস্তার করে ব্যাখ্যা কর।

গ. কোন গুণটি দিয়ার জীবনে ভালো ফলাফল অর্জনে ভূমিকা রেখেছে ? ব্যাখ্যা কর।

ঘ. দিশার ব্যর্থতার কারণ ইসলামের আলোকে বিশ্লেষণ কর।

তৃতীয় অধ্যায়

কুরআন ও হাদিস শিক্ষা

কুরআন মাজিদ হলো মহান আল্লাহর পবিত্র বাণী। আর মহানবি হযরত মুহাম্মদ (স.)-এর বাণী, কর্ম ও মৌন সম্মতিকে বলা হয় হাদিস। কুরআন মাজিদ ও হাদিস শরিফ হলো ইসলামের প্রধান দুটি উৎস। মহানবি (স.) বলেছেন, আমি তোমাদের নিকট দুটি জিনিস রেখে যাচ্ছি যা আঁকড়ে ধরলে (মেনে চললে) তোমরা কখনো পথভ্রষ্ট হবে না। এ দুটি হলো আল্লাহর কিতাব (আল-কুরআন) ও তাঁর রাসুলের সুন্নাহ (আল-হাদিস)।

এ অধ্যায় শেষে শিক্ষার্থী

- আল-কুরআনের পরিচয় বর্ণনা করতে পারবে।
- তাজবিদ ও মাখরাজ আয়ত্ত করে বিশুদ্ধভাবে কুরআন পাঠ করতে সক্ষম হবে।
- কুরআনের নির্ধারিত পাঁচটি সূরা অর্থসহ মুখস্থ বলতে ও মূল বক্তব্য ব্যাখ্যা করতে পারবে।
- নির্ধারিত পাঁচটি সূরার পটভূমি (শানে নুযূল) ব্যাখ্যা করতে পারবে।
- মুনাযাতমূলক (প্রার্থনামূলক) তিনটি আয়াত অর্থসহ বলতে পারবে।
- হাদিসের পরিচয় এবং নৈতিক গুণাবলি বিষয়ক দুটি হাদিস অর্থসহ বর্ণনা করতে পারবে।
- প্রার্থনামূলক দুটি হাদিস অর্থসহ ব্যাখ্যা করতে পারবে।
- হাদিসের আলোকে নৈতিক ও মানবিক মূল্যবোধের পরিচয় বর্ণনা করতে পারবে।

পাঠ ১

কুরআনের পরিচয়

পরিচয়

কুরআন মাজিদ সর্বশেষ ও সর্বশ্রেষ্ঠ আসমানি কিতাব। এটি মহান আল্লাহর বাণী। মানব জাতির হেদায়াতের জন্য আল্লাহ তা'আলা শেষ নবি হযরত মুহাম্মদ (স.)-এর ওপর এ কিতাব নাযিল করেন। আল্লাহ তা'আলার পরিচয়, তাঁর গুণাবলি, ইমান ও ইসলামের সকল বিষয় এতে বর্ণনা করা হয়েছে। এতে রয়েছে জ্ঞান-বিজ্ঞানের সারকথা। কোন পথে চললে মানুষ সফলতা লাভ করবে তাও এতে বলে দেওয়া হয়েছে।

এটি মহান আল্লাহর পবিত্র বাণী। আজ পর্যন্ত এটি অবিকৃত রয়েছে। কেউ এর একটি নুকতা, অক্ষর, শব্দ বা হরকতও পরিবর্তন করতে পারে নি। আর ভবিষ্যতেও পারবে না। কেননা, এর সংরক্ষক স্বয়ং আল্লাহ তা'আলা।

কুরআন মাজিদ অবতরণ

আল-কুরআন সর্বশেষ নবি ও রাসুল হযরত মুহাম্মদ (স.)-এর উপর অবতীর্ণ হয়েছে। এটি 'লাওহে মাহফুয'- বা সংরক্ষিত ফলকে লিপিবদ্ধ রয়েছে।

আমাদের প্রিয়নবি হযরত মুহাম্মদ (স.) আরবদেশের মক্কা নগরে জন্মগ্রহণ করেন। সেখানকার লোকজন ছিল মূর্তিপূজক। তাদের মধ্যে প্রায়ই মারামারি, কাটাকাটি ও কলহ-বিবাদ লেগেই থাকত। মহানবি (স.) এসব পছন্দ করতেন না। তিনি ভাবতেন যে, সকল মানুষের একজন সৃষ্টিকর্তা রয়েছেন। তাঁর দেখানো পথে চললে সমাজে কোনোরূপ অশান্তি থাকবে না। এজন্য তিনি হেরা গুহায় ধ্যানমগ্ন থাকতেন। চল্লিশ বছর বয়সে তিনি নবুয়তপ্রাপ্ত হন। আল্লাহ তা'আলা জিবরাইল (আ.) ফেরেশতার মাধ্যমে তাঁর নিকট আল-কুরআন নাযিল করেন। এ সময় আল কুরআনের সুরা আলাকের প্রথম পাঁচটি আয়াত নাযিল হয়। পরবর্তীকালে প্রয়োজন অনুসারে কুরআনের নানা আয়াত নাযিল করা হয়। এভাবে মহানবি (স.)-এর ওপর ২৩ বছরে পবিত্র কুরআন সম্পূর্ণরূপে নাযিল হয়।

আল-কুরআনের বৈশিষ্ট্য

আল-কুরআন সর্বশেষ আসমানি কিতাব। আল্লাহ তা'আলা সর্বমোট ১০৪ (একশত চার) খানা আসমানি কিতাব নাযিল করেছেন। এগুলোর মধ্যে ১০০ (একশত) খানা ছোট কিতাব। এগুলোকে বলা হয় সহিফা। আর ৪ (চার) খানা বড়। এগুলো হলো- তাওরাত, যাবুর, ইনজিল ও কুরআন। আল-কুরআন হলো সর্বশেষ আসমানি গ্রন্থ। এরপর আর কোনো কিতাব আসবে না।

কুরআন মাজিদ সর্বশ্রেষ্ঠ গ্রন্থ। এতে দীনের যাবতীয় বিষয় বর্ণনা করা হয়েছে। মানুষের জীবনে যেসব সমস্যার উদ্ভব হয়ে থাকে তার সমাধানের ব্যাপারে এতে নির্দেশনা রয়েছে। পূর্ববর্তী আসমানি কিতাবসমূহের মূল শিক্ষাও এতে বর্ণিত হয়েছে। সুতরাং আল-কুরআন সর্বশ্রেষ্ঠ কিতাব।

আল-কুরআন আল্লাহ তা'আলার বাণী। এর ভাব ও ভাষা অনন্য ও অপূর্ব। এটি মহানবি (স.)-এর সবচেয়ে বড় মুজিয়া। কেউই এর ক্ষুদ্রতম সুরার সমতুল্য কিছু রচনা করতেও সক্ষম হয় নি এবং ভবিষ্যতেও হবে না।

আল-কুরআনের গুণগুণ

আল-কুরআন জ্ঞানসমূহের ভাণ্ডারস্বরূপ। এতে রয়েছে আল্লাহ তা'আলার পরিচয়, তাঁর গুণাবলির বর্ণনা, তাঁর ক্ষমতা ও নিয়ামতসমূহের বর্ণনা। আল-কুরআনে মানব সৃষ্টির অবস্থা বর্ণনা করা হয়েছে। সৌরজগৎ, আসমান-জমিন, নক্ষত্ররাজি, পাহাড় পর্বত সবকিছু সম্পর্কেই এতে উল্লেখ করা হয়েছে। পূর্ববর্তী জাতিসমূহের ঘটনা, নবি-রাসুলগণের বিবরণ, পুণ্যবান ও পাপীদের অবস্থা ইত্যাদিও আল-কুরআনে বর্ণনা করা হয়েছে।

আল-কুরআনে নানা রকম বিধি-বিধান ও আইন-কানুন বর্ণিত হয়েছে। এটি সত্য ও মিথ্যার পার্থক্যকারী। কীভাবে চললে মানুষ দুনিয়া ও আখিরাতে শান্তি লাভ করবে এর দিকনির্দেশনাও আল-কুরআনে দেওয়া আছে। আল-কুরআন সর্বশেষ ও সর্বশ্রেষ্ঠ আসমানি কিতাব। এতে দীনের সকল কিছুর জ্ঞান সন্নিবেশিত আছে। আল-কুরআনের জ্ঞান অর্জন করা আমাদের সকলের একান্ত কর্তব্য। সুতরাং আমরা আল-কুরআন পড়ব এবং এর নানাবিধ জ্ঞান অর্জন করব।

পাঠ ২ কুরআন তিলাওয়াত

পরিচয়

তিলাওয়াত আরবি শব্দ। এর অর্থ পাঠ করা, পড়া, আবৃত্তি করা ইত্যাদি। পবিত্র কুরআন পাঠ করাকে কুরআন তিলাওয়াত বলা হয়।

আল কুরআন আরবি ভাষায় নাযিল হয়েছে। সুতরাং একে আরবিতেই পড়তে হবে। এজন্য আরবি হরফ বা বর্ণসমূহ চিনে তিলাওয়াত করা শিখতে হবে। এভাবে আরবিতে সুন্দর করে স্পষ্ট উচ্চারণে আল-কুরআন পাঠ করাকে কুরআন তিলাওয়াত বলে।

উল্লেখ্য, কুরআন শব্দটির মূল অর্থ পঠিত। অর্থাৎ যা পাঠ করা হয়েছে। সারা বিশ্বে আল-কুরআনই সবচেয়ে বেশি পাঠ (তিলাওয়াত) করা হয়। এজন্যই একে কুরআন বলা হয়। মুসলমানগণ দৈনিক পাঁচবার সালাতে কুরআন তিলাওয়াত করেন। এছাড়া আমরা ভিন্নভাবেও কুরআন তিলাওয়াত করে থাকি।

কুরআন তিলাওয়াতের গুরুত্ব

কুরআন মাজিদ তিলাওয়াতের গুরুত্ব অনেক। এটি আমাদের পবিত্র ধর্মগ্রন্থ। এতে মানুষের কল্যাণের দিকনির্দেশনা প্রদান করা হয়েছে। সুতরাং আমাদের উচিত বেশি বেশি কুরআন তিলাওয়াত করা। কুরআন তিলাওয়াত করলে আমরা আল্লাহ তা'আলার আদেশ-নিষেধ জানতে পারব। বুঝে শুনে কুরআন তিলাওয়াত করা উত্তম।

আমাদের প্রিয়নবি (স.) এবং তাঁর সাহাবিগণ প্রতিদিন কুরআন তিলাওয়াত করতেন, কুরআনের শিক্ষা অনুযায়ী আমল করতেন। কুরআন তিলাওয়াত শিক্ষা করা অত্যন্ত জরুরি। কেননা সালাতে (নামাযে) কুরআন পড়তে হয়। আর কুরআন তিলাওয়াত ছাড়া সালাত শুদ্ধ হয় না। সুতরাং আমরা গুরুত্ব সহকারে কুরআন তিলাওয়াত শিখব এবং প্রতিদিন তিলাওয়াত করব।

কুরআন তিলাওয়াতের ফযিলত

কুরআন তিলাওয়াতের ফযিলত (মাহাত্ম্য) অনেক বেশি। কুরআন মাজিদ তিলাওয়াত করা হলো নফল ইবাদতের মধ্যে সর্বোত্তম ইবাদত। কুরআন তিলাওয়াত করলে আল্লাহ তা'আলা খুশি হন। যে ঘরে কুরআন পড়া হয় সে ঘরে আল্লাহ পাকের রহমত নাযিল হয়। মহানবি (স.)-এর হাদিসে আছে, পবিত্র কুরআনের প্রতিটি হরফের পরিবর্তে দশটি করে নেকি লেখা হয়। সুতরাং বোঝা গেল যে, কুরআন তিলাওয়াত অত্যন্ত ফযিলতপূর্ণ কাজ। আমরা সবাই বেশি বেশি কুরআন তিলাওয়াত করব।

নাযিরা তিলাওয়াত

আল-কুরআন দেখে দেখে পড়াকে নাযিরা তিলাওয়াত বলে। কুরআন মাজিদ দেখে পড়াও উত্তম ইবাদত। কুরআন মাজিদ দেখে দেখে অথবা মুখস্থ যেভাবেই পাঠ করা হোক তাতে পুণ্য রয়েছে। কুরআন পাঠ মনে প্রশান্তি আনে। অন্তর-আত্মা পরিশুদ্ধ হয়। কিয়ামতের দিন কুরআন আল্লাহর নিকট তাদের জন্য সুপারিশ করবে যারা পৃথিবীর জীবনে কুরআন মাজিদ তিলাওয়াত করতো।

পাঠ ৩ তাজবিদ

তাজবিদ

তাজবিদ শব্দের অর্থ উত্তম বা সুন্দর করা। আল-কুরআনের আয়াতসমূহকে উত্তমভাবে বা সুন্দর ও শুদ্ধ করে পড়াকে তাজবিদ বলা হয়। অর্থাৎ আল-কুরআনের প্রতিটি হরফকে মাখরাজ ও সিফাত অনুসারে বিশুদ্ধভাবে তিলাওয়াত করাকে তাজবিদ বলে।

আরবি হরফ কোনোটি মোটা করে পড়তে হয়, আবার কোনোটি চিকন করে পড়তে হয়। উচ্চারণের এ বিশেষ অবস্থাকে বলা হয় সিফাত। যেমন-ت(তা) এবং ط(ত্বয়া) হরফ দুটির উচ্চারণের স্থান একই। কিন্তু এদের সিফাত ভিন্ন। এ দুটো বর্ণের মধ্যে ط(ত্বয়া)-কে মোটা করে পড়তে হয় এবং ت(তা)-কে চিকন করে পড়তে হয়। আবার মাখরাজ হলো উচ্চারণের স্থান। যেমন- ة এবং ح এখানে হরফ দুটিকে ভিন্ন ভিন্ন স্থান থেকে উচ্চারণ করতে হয়। এভাবে মাখরাজ ও সিফাত ঠিক রেখে সুন্দর করে কুরআন তিলাওয়াত করাই তাজবিদ।

তাজবিদের গুরুত্ব

তাজবিদ অনুযায়ী কুরআন পড়া ওয়াজিব বা আবশ্যিক। তাজবিদ অনুসারে কুরআন না পড়লে গুনাহ হয়। এতে অনেক সময় আল-কুরআনের অর্থ পরিবর্তন হয়ে যায়। আর অশুদ্ধ তিলাওয়াতের ফলে সালাতও পূর্ণাঙ্গ হয় না। যেমন- সুরা ইখলাসে এসেছে- قُلْ هُوَ اللَّهُ أَحَدٌ- বলুন (হে নবি)! তিনি আল্লাহ; একক ও অদ্বিতীয়। এখানে قُلْ শব্দের অর্থ- বলুন। আর যদি ق (ক্বাফ)-কে ভুল মাখরাজ থেকে উচ্চারণ করে বলা হয় قُلْ তাহলে অর্থ বিকৃত হয়ে যায়। কেননা قُلْ শব্দের অর্থ খাও বা ভক্ষণ কর। ফলে আল-কুরআনের অর্থের বিকৃতি ঘটে। যা কোনোভাবেই জায়েয নয়। তাজবিদ সহকারে শুদ্ধ ও সুন্দর করে কুরআন তিলাওয়াতের গুরুত্ব উল্লেখ করে আল্লাহ তা'আলা বলেন- وَرَتِّلِ الْقُرْآنَ تَرْتِيلًا-

অর্থ : আপনি কুরআন আবৃত্তি করুন ধীরে ধীরে ও সুস্পষ্টভাবে। (সুরা মুয্যাম্মেল : ৪)

তাজবিদ সহকারে কুরআন পড়া আল্লাহ পাকের নির্দেশ। আর শুদ্ধরূপে কুরআন শিক্ষার মাহাত্ম্য অনেক। রাসুলুল্লাহ (স.) বলেছেন- وَعَلِّمَهُ الْقُرْآنَ وَعَلِّمَهُ- 'তোমাদের মধ্যে সে ব্যক্তি উত্তম যে নিজে কুরআন শিক্ষা করে এবং অপরকে তা শিক্ষা দেয়।'

সুতরাং আমরা তাজবিদ সহকারে নিয়মিত কুরআন তিলাওয়াত করব।

পাঠ ৪

মাখরাজ

পরিচয়


মাখরাজ শব্দের অর্থ বের হওয়ার স্থান, উচ্চারণের স্থান। আরবি হরফসমূহ মুখের যে স্থান থেকে উচ্চারিত হয় সে স্থানকে মাখরাজ বলা হয়।

আরবি হরফ (বর্ণ) মোট ২৯টি। এগুলো মুখের মোট ১৭টি স্থান থেকে উচ্চারিত হয়। এ ১৭টি স্থানকে বলা হয় মাখরাজ। মাখরাজ মোট ১৭টি।

১৭টি মাখরাজ আবার মুখের ৫টি স্থানে অবস্থিত। যথা- (১) কণ্ঠনালি বা হলক, (২) জিহ্বা, (৩) উভয় ঠোঁট, (৪) নাসিকামূল এবং (৫) মুখের খালি জায়গা বা জাওফ।

নিম্নে ছক আকারে কোন স্থানে কয়টি মাখরাজ অবস্থিত তা দেখানো হলো :

মুখের স্থান	মাখরাজ সংখ্যা
১. জাওফ বা মুখের খালি জায়গা	০১ টি
২. হলক বা কণ্ঠনালি	০৩ টি
৩. জিহ্বা	১০ টি
৪. উভয় ঠোঁট	০২ টি
৫. নাসিকামূল	০১ টি




মাখরাজের বিস্তারিত বিবরণ

১. প্রথম মাখরাজ হলো জাওফ। জাওফ হলো মুখের ভিতরের খালি জায়গা। এ স্থান থেকে ০৩টি হরফ উচ্চারিত হয়। যথা :

ক. আলিফ (ا) যখন এর পূর্বের হরফে যবর থাকে। যেমন : بِا

খ. জযম বিশিষ্ট ওয়াও (و) যখন এর পূর্বের বর্ণে পেশ হয়। যেমন- بُو

গ. জযম বিশিষ্ট ইয়া (ي) যখন এর পূর্বের হরফে যের হয়। যেমন- ى



এ হরফ তিনটি মুখের খালি স্থান থেকে বাতাসের ওপর উচ্চারিত হয়। এতে জিহ্বা, দাঁত, ঠোঁট, কণ্ঠনালি কোনো কিছুরই ব্যবহার হয় না। এগুলোকে মাদের হরফ বলা হয়। অর্থাৎ এগুলো পড়ার সময় এক আলিফ পরিমাণ দীর্ঘ করে পড়তে হয়।


২. কণ্ঠনালির নিম্নভাগ থেকে উচ্চারিত হয় দু'টি হরফ। এ দুটি হলো- হামযা (ه) ও হা (ه)। যেমন : هـ-أ

কণ্ঠনালির নিম্নভাগ



৩. কণ্ঠনালির মধ্যভাগ থেকে উচ্চারিত হয় ২টি হরফ। এ দুটি হলো- হা (ح) ও আইন (ع)। যেমন- ح-ع

কণ্ঠনালির মধ্যভাগ



৪. কণ্ঠনালির উপরিভাগ থেকে উচ্চারিত হয় ২টি হরফ। এরা হলো- খা (خ) ও গাইন (ع)। যেমন-
 - ع


কণ্ঠনালির উপরিভাগ



উপরিউক্ত ছয়টি হরফ কণ্ঠনালি বা হলক নামক স্থান হতে উচ্চারিত হয়। এ জন্য এ ৬টি হরফকে হরফে হলকি বা কণ্ঠবর্ণ বলা হয়।

৫. পঞ্চম মাখরাজ হলো জিহ্বার গোড়া এবং তার বরাবর উপরের তালু। এ স্থান থেকে একটি হরফ উচ্চারিত হয়। এটি হলো কাফ (ق) যেমন- ق

জিহ্বার গোড়া এবং তার
 বরাবর উপরের তালু



৬. জিহ্বার গোড়ার সামান্য উপরের অংশ এবং এর বরাবর উপরের তালু। এ স্থান থেকে কাফ (ك) হরফটি উচ্চারিত হয়। যেমন- ك

জিহ্বার গোড়ার সামান্য উপরের অংশ এবং এর
 বরাবর উপরের তালু



৭. জিহ্বার মধ্যভাগ এবং এর সোজা উপরের তালু। এ মাখরাজ থেকে তিনটি হরফ উচ্চারিত হয়।


এগুলো হলো জিম (ج), শিন (ش), ইয়া (ي)। যেমন- أَشْ-أَج-أَيُّ

জিহ্বার মধ্যভাগ এবং এর সোজা
উপরের তালু



৮. অষ্টম মাখরাজ হলো জিহ্বার পার্শ্বভাগ ও উপরের পাটির দাঁতের মাড়ি। এ দুয়ের সংযোগে উচ্চারিত হয় দোয়াদ (ض) হরফটি।

জিহ্বার পার্শ্বভাগ ও উপরের
পাটির দাঁতের মাড়ি



এ হরফটি উচ্চারণে জিহ্বার পার্শ্বভাগকে ডান দিক অথবা বাম দিকের উপরের দাঁতের মাড়ির সাথে লাগিয়ে উচ্চারণ করা যায়। যেমন- أَضُّ

৯. জিহ্বার অগ্রভাগের পাশ ও সামনের উপরের দাঁতের গোড়ার দিকের তালুর সাথে মিলে উচ্চারিত হয় একটি হরফ। এটি হলো- লাম (ل)। যেমন- أَلُّ

জিহ্বার অগ্রভাগের পাশ ও সামনের
উপরের দাঁতের গোড়ার দিকের তালু



১০. জিহ্বার অগ্রভাগ ও তার বরাবর উপরের তালু। এ মাখরাজ থেকে উচ্চারিত হয় নুন (ن) হরফ।

যেমন- أَنْ

জিহ্বার অগ্রভাগ ও তার বরাবর
উপরের তালু



১১. জিহ্বার অগ্রভাগের পিঠ এবং সোজা ওপরের তালু। এখান থেকে উচ্চারিত হয় রা (ر)। যেমন- أُرْ


জিহ্বার অগ্রভাগের পিঠ এবং সোজা
উপরের তালু



১২. জিহ্বার অগ্রভাগ এবং সামনের ওপরের দাঁতের গোড়া। এখান থেকে উচ্চারিত হয় তিনটি হরফ।

এগুলো হলো তা (ت), দাল (د), ত্বয়া (ط)। যেমন- أَط - أَد - أَت

জিহ্বার অগ্রভাগ এবং সামনের
উপরের দাঁতের গোড়া




১৩. জিহ্বার অগ্রভাগ ও সামনের নিচের দুই দাঁতের মাথা এবং উপরের দাঁতের সামান্য অংশ মিলে উচ্চারিত হয় মোট ৩টি হরফ। এগুলো হলো- যা (ز), সিন (س), ছোয়াদ (ص)। যেমন- أَزْ - أَصْ - أَسْ

জিহ্বার অগ্রভাগ ও সামনের
নিচের দুই দাঁতের মাথা এবং
উপরের দাঁত



১৪. জিহ্বার অগ্রভাগ ও সামনের উপরের বড় দুই দাঁতের মাথা। এখান হতে উচ্চারিত হয় ছা (ث), যাল (ظ) - أَذْ - أَثْ - أَظْ। যেমন- (ذ), যোয়া (ظ)।


জিহ্বার অগ্রভাগ ও সামনের
উপরের বড় দুই দাঁতের মাথা



উপরিউক্ত দশটি (৫নং থেকে ১৪ নং পর্যন্ত) মাখরাজ জিহ্বার সাথে সংশ্লিষ্ট।

১৫. নিচের ঠোঁটের ভেতরের অংশ বা ভিজা অংশ এবং সামনের উপরের দুই দাঁতের মাথা। এ মাখরাজ থেকে উচ্চারিত হয় ফা (ف)। যেমন- أَفْ

নিচের ঠোঁটের ভেতরের অংশ বা
ভিজা অংশ এবং সামনের উপরের
দুই দাঁতের মাথা




১৬. দুই ঠোঁট । এখান থেকে উচ্চারিত হয় তিনটি হরফ । যথা-


ক. বা (ب) উচ্চারিত হয় নিচের ঠোঁটের ভেতরের অংশ থেকে । যেমন- أَبٌ

খ. মিম (م) উচ্চারিত হয় ঠোঁটের বাইরের বা শুক্ক অংশ থেকে । যেমন- أُمٌّ

গ. ওয়াও (واو) এ হরফ উচ্চারণে দুই ঠোঁট সরাসরি মিলিত হয় না । বরং উভয় ঠোঁট ডান ও বাম পাশ থেকে গোল হয়ে অর্ধফোটা ফুলের মত মধ্যস্থলে ছিদ্র রেখে উচ্চারিত হয় । যেমন- أَوْ



১৭. শেষ মাখরাজ হলো নাসিকামূল । এখান থেকে গুল্লাহসমূহ উচ্চারিত হয় । যেমন- জযমযুক্ত নুনকে কখনও কখনও গোপন করে নাসিকামূল থেকে উচ্চারণ করা হয় । তাশদিদযুক্ত নুনের মাখরাজও এটিই । যেমন- مِنْ شَرٍّ - إِنَّ -



তাজবিদের অত্যন্ত গুরুত্বপূর্ণ পাঠ হলো মাখরাজ । হরফ (বর্ণ) সমূহকে নিজ নিজ মাখরাজ (উচ্চারণস্থল) থেকে উচ্চারণ করা আবশ্যিক । সুতরাং আমরা হফরগুলোর মাখরাজ শিখব ও নিয়মিত অনুশীলন করব ।

কাজ : শিক্ষার্থীরা

ক. আরবি ২৯ টি বর্ণ লিখে একটি পোস্টার তৈরি করবে ।

খ. ১৭টি মাখরাজের একটি তালিকা তৈরি করবে ।

নতুন শব্দ পরিচয়

- লাওহে মাহফুয - সংরক্ষিত ফলক ।
- হেদায়াত - দিকনির্দেশনা । সত্য দীনের প্রতি দিকনির্দেশনা প্রদান ।
- হরফ - বর্ণ ।
- নুকতা - আরবি বর্ণসমূহের উপরে নিচে বা মধ্যে ব্যবহৃত বিন্দু বা ফোঁটাকে নুকতা বলে ।
 যেমন- ن - ب - ت
- হরকত - যবর, যের, পেশকে হরকত বলে ।
- আয়াত - আল-কুরআনের এক একটি বাক্যকে বলা হয় আয়াত ।
- জিবরাঈল (আ.) - প্রধান ফেরেশতাগণের একজন । তিনি আল্লাহ তা'আলার বাণী নিয়ে নবি-রাসুলগণের নিকট আসতেন ।
- মুজিয়া - অলৌকিক ঘটনা বা বস্তু । নবি-রাসুলগণের দ্বারা প্রকাশিত অলৌকিক ঘটনা ও বস্তুকে মুজিয়া বলা হয় ।
- নাযিল - অবতীর্ণ ।
- কালাম - বাণী ।
- সাহাবা - হযরত মুহাম্মদ (স.)-এর সাথীগণ । যাঁরা মহানবি (স.)-কে ইমানসহ দেখেছেন এবং ইমানের সাথে মৃত্যুবরণ করেছেন তাঁরা হলেন সাহাবা ।
- নফল - ঐচ্ছিক, ফরযের অতিরিক্ত ।
- জায়েয - বৈধ, অবৈধের বিপরীত ।

অর্থ ও পটভূমিসহ কুরআনের কতিপয় সুরা

পাঠ ৫

সুরা আল-ফাতিহা (سُورَةُ الْفَاتِحَةِ)

আল কুরআনের সর্বপ্রথম সুরা হলো আল-ফাতিহা। ফাতিহা শব্দের অর্থ ভূমিকা, মুখবন্ধ, দ্বার উন্মোচনকারী ইত্যাদি। যেহেতু এ সুরার মাধ্যমে কুরআনুল কারিম শুরু করা হয়, সেজন্য এ সুরার নাম আল-ফাতিহা। একে ফাতিহাতুল কিতাব বা ফাতিহাতুল কুরআনও বলা হয়। অর্থাৎ কিতাব বা কুরআনের ভূমিকা।

এ সুরাটি মাক্কী সুরা। অর্থাৎ রাসুল (সা.)-এর হিজরতের পূর্বে এ সুরাটি মক্কা নগরীতে অবতীর্ণ হয়। পূর্ণাঙ্গ সুরা হিসেবে এ সুরাই প্রথম অবতীর্ণ হয়েছে। এর আয়াত সংখ্যা সর্বমোট ৭টি। সুরা আল ফাতিহা কুরআনের সবচেয়ে গুরুত্বপূর্ণ সুরা। এর বহু নাম রয়েছে। এগুলোর মধ্যে উল্লেখযোগ্য হলো-

১. সুরাতুল হামদ (প্রশংসার সুরা); এ সুরায় আল্লাহ তা'আলার প্রশংসা করা হয়েছে।
২. উম্মুল কুরআন (কুরআনের জননী); এ সুরা পবিত্র কুরআনের সার-সংক্ষেপস্বরূপ।
৩. সুরাতুস সালাত (সালাতের সুরা); সালাতের শুরুতে এ সুরা পাঠ করা অপরিহার্য। এ সুরা ব্যতীত সালাত শুদ্ধ হয় না।
৪. সুরাতুশ শিফা (রোগমুক্তির সুরা); এ সুরার মাধ্যমে রোগ থেকে মুক্তি পাওয়া যায়।
৫. সুরাতুদ্ দোয়া (দোয়া বা প্রার্থনামূলক সুরা); এ সুরার মাধ্যমে আল্লাহর নিকট প্রার্থনা নিবেদন করা হয়।

শব্দার্থ

الْحَمْدُ	- সকল প্রশংসা	نَعْبُدُ	- আমরা ইবাদত করি
رَبِّ	- রব, প্রতিপালক	نَسْتَعِينُ	- আমরা সাহায্য প্রার্থনা করি
الْعَالَمِينَ	- সমগ্র সৃষ্টিজগৎ, জগৎসমূহ	اهْدِنَا	- আমাদের পথ দেখাও
مَالِكٍ	- মালিক, অধিপতি	صِرَاطٍ	- পথ, রাস্তা
يَوْمِ الدِّينِ	- বিচার দিবস, কর্মফল দিবস	اَنْعَمْتَ	- তুমি অনুগ্রহ করেছ
إِيَّاكَ	- শুধু তোমরাই		

অনুবাদ

بِسْمِ اللَّهِ الرَّحْمَنِ الرَّحِيمِ ۝

দয়াময়, পরম দয়ালু আল্লাহর নামে ।

الْحَمْدُ لِلَّهِ رَبِّ الْعَالَمِينَ ۝

১. সকল প্রশংসা জগৎসমূহের প্রতিপালক আল্লাহরই ।

الرَّحْمَنِ الرَّحِيمِ ۝

২. যিনি দয়াময়, পরম দয়ালু ।

مَالِكِ يَوْمِ الدِّينِ ۝

৩. যিনি বিচার দিনের মালিক ।

إِيَّاكَ نَعْبُدُ وَإِيَّاكَ نَسْتَعِينُ ۝

৪. আমরা শুধু তোমারই ইবাদত করি, শুধু তোমারই সাহায্য চাই ।

إِهْدِنَا الصِّرَاطَ الْمُسْتَقِيمَ ۝

৫. আমাদের সরল পথ দেখাও ।

صِرَاطَ الَّذِينَ أَنْعَمْتَ عَلَيْهِمْ ۝

৬. তাদের পথ, যাদের প্রতি তুমি অনুগ্রহ করেছ ।

غَيْرِ الْمَغْضُوبِ عَلَيْهِمْ وَلَا الضَّالِّينَ ۝

৭. তাদের পথ নয়, যারা অভিশপ্ত ও পথভ্রষ্ট ।

ব্যাখ্যা

সূরা আল-ফাতিহা আল কুরআনের সবচেয়ে গুরুত্বপূর্ণ সূরা । এ সুরায় সম্পূর্ণ কুরআনের সারসংক্ষেপ বর্ণনা করা হয়েছে । এর প্রথম তিনটি আয়াতে আল্লাহ তা'আলার প্রশংসা বর্ণনা করা হয়েছে । শেষ তিনটি আয়াতে আল্লাহ তা'আলার নিকট মানুষের মুনাজাত ও প্রার্থনার বিষয় বর্ণনা করা হয়েছে । আর মধ্যবর্তী আয়াতে আল্লাহ তা'আলার প্রশংসা ও দোয়া একত্রে উল্লেখ করা হয়েছে ।

আল্লাহ তা'আলা সকল প্রশংসা ও কৃতজ্ঞতা পাওয়ার যোগ্য । কেননা তিনিই সকল কিছুর সৃষ্টিকর্তা । তিনিই বিশ্বজগতের মালিক ও প্রতিপালক । সৃষ্টিজগতের সবকিছুই তাঁর রহমত ও করুণায় লালিত-পালিত হয় । তাঁর নিয়ামত সকলেই ভোগ করে । তাছাড়া তিনি শুধু ইহকালের মালিক নন, বরং তিনি পরকালেরও মালিক । কিয়ামত, হাশর, মিয়ান, জান্নাত-জাহান্নাম সবকিছুই তাঁর অধীন । শেষ বিচারের দিনে তিনিই একমাত্র বিচরক । তিনিই নিজ ক্ষমতায় পুণ্যবানদের পুরস্কার ও পাপীদের শাস্তি দেবেন । সুতরাং সকল প্রশংসা ও ইবাদত একমাত্র তাঁরই প্রাপ্য । এতে তাঁর কোনো অংশীদার নেই ।

এই সুরার প্রথম তিন আয়াতে আল্লাহ তা'আলার সীমাহীন কুদরত ও ক্ষমতার কথা বলা হয়েছে এবং মধ্যবর্তী আয়াতে বলা হয়েছে যে, মানুষ শুধু তাঁরই ইবাদত করবে এবং তাঁরই নিকট সাহায্য চাইবে। কেননা তিনিই ইবাদতের যোগ্য। আর তিনি ব্যতীত সাহায্যকারী কেউ নেই।

এ সুরার শেষ তিন আয়াতে আল্লাহ তা'আলার নিকট মানুষের প্রার্থনা ও মুনাজাত বর্ণিত হয়েছে। যেহেতু মহান আল্লাহই সবকিছুর স্রষ্টা এবং নিয়ন্ত্রক। সুতরাং সঠিক পথ একমাত্র তিনিই দেখাতে পারেন। তিনিই ভালো জানেন কোন পথ সঠিক আর কোন পথ ভ্রান্ত। অতএব, মানুষের উচিত তাঁর নিকট সত্যপথের সন্ধান প্রার্থনা করা। যে পথ আল্লাহর প্রিয় বান্দাগণ, নবি-রাসূলগণ অনুসরণ করেছেন সে পথ প্রদর্শনের জন্য আল্লাহর নিকট মুনাজাত করা। আর যে পথে অভিশপ্ত, পথভ্রষ্টরা পরিচালিত হয়েছে সে পথ থেকে আশ্রয় প্রার্থনা করা।

নৈতিক শিক্ষা

আল্লাহ তা'আলা একক, অদ্বিতীয় ও সকল কিছুর মালিক। বিশ্বজগতের সকল প্রশংসা তাঁরই প্রাপ্য। তিনিই মানুষকে সরল সঠিক পথের সন্ধান দেন। সুতরাং আমরা সকাল সন্ধ্যায় তাঁর প্রশংসা করব। সবসময় তাঁর ইবাদত করব। আর আমাদের সকল সঠিক পথের সন্ধান দানের জন্য তাঁর নিকটই প্রার্থনা জানাব। সাথে সাথে পথভ্রষ্ট ও অন্যায়কারীদের আচরণ অনুসরণ থেকে আমরা বিরত থাকব।

কাজ : শিক্ষার্থীরা পাশের বন্ধুকে সুরা ফাতিহা অর্থসহ শোনাবে।

পাঠ ৬

সুরা আন-নাস (سُورَةُ النَّاسِ)

আল-কুরআনের সর্বশেষ সুরা হচ্ছে সুরা আন-নাস। এটি পবিত্র কুরআনের ১১৪তম সুরা। এ সুরাটি মদিনায় অবতীর্ণ হয়। এর আয়াত সংখ্যা ৬টি।

এ সুরায় **النَّاسُ** (আন-নাস) শব্দটি মোট পাঁচবার ব্যবহৃত হয়েছে। সুরায় ব্যবহৃত এ **النَّاسُ** শব্দ থেকেই এ সুরার নামকরণ করা হয়েছে। সুরা আল-ফাতিহায় আল্লাহ তা'আলার প্রশংসা করা হয়েছে। তারপর তাঁর নিকট সরল পথের সন্ধান চাওয়া হয়েছে। অতঃপর কুরআনের অন্যান্য সুরায় মানুষকে সঠিক পথের সন্ধান দেয়া হয়েছে। কিন্তু শয়তান মানুষকে সঠিকপথ থেকে বিরত রাখতে চায়। তাই সবশেষে এ সুরায় আল্লাহ পাকের নিকট শয়তান থেকে আশ্রয় চাওয়া হয়। এভাবে কুরআনের প্রথম থেকে শেষ পর্যন্ত সামঞ্জস্য বজায় রাখা হয়েছে।

শব্দার্থ

قُلْ	- আপনি বলুন; তুমি বল	شَرٌّ	- অনিষ্ট, ক্ষতি
أَعُوذُ	- আমি আশ্রয় চাই, আমি আশ্রয় প্রার্থনা করি, আমি স্মরণে নেই	الْوَسْوَاسِ	- কুমন্ত্রণা
رَبِّ	- রব, প্রতিপালক	الْخَنَاسِ	- আত্মগোপনকারী শয়তান
النَّاسِ	- মানুষ, মানবজাতি	صُدُورِ	- বক্ষসমূহ, অন্তরসমূহ
مَلِكِ	- মালিক, অধিপতি	الْجِنَّةِ	- জিন
إِلَهِ	- মাবুদ, উপাস্য	يُوسُوسُ	- সে কুমন্ত্রণা দেয়

অনুবাদ

بِسْمِ اللَّهِ الرَّحْمَنِ الرَّحِيمِ ۝

দয়াময়, পরম দয়ালু আল্লাহর নামে ।

قُلْ أَعُوذُ بِرَبِّ النَّاسِ ۝

১. আপনি বলুন, আমি আশ্রয় চাই মানুষের প্রতিপালকের নিকট ।

مَلِكِ النَّاسِ ۝

২. মানুষের অধিপতির নিকট ।

إِلَهِ النَّاسِ ۝

৩. মানুষের মাবুদের নিকট ।

مِنْ شَرِّ الْوَسْوَاسِ الْخَنَاسِ ۝

৪. আত্মগোপনকারী শয়তানের কুমন্ত্রণার অনিষ্ট থেকে ।

الَّذِي يُوسُوسُ فِي صُدُورِ النَّاسِ ۝

৫. যে কুমন্ত্রণা দেয় মানুষের অন্তরে

مِنَ الْجِنَّةِ وَالنَّاسِ ۝

৬. জিন এবং মানুষের মধ্য থেকে ।

ব্যাখ্যা

সূরা আন-নাস এর আয়াতসমূহে দুই প্রকারের আলোচনা রয়েছে। প্রথম তিন আয়াতে মহান আল্লাহর তিনটি গুণের কথা উল্লেখ করা হয়েছে। এগুলো হলো রব, মালিক ও ইলাহ। অর্থাৎ আল্লাহ তা'আলাই মানুষের রব, মালিক ও ইলাহ। তিনি ব্যতীত আর কেউ এ তিনটি গুণের অধিকারী নয়। মানুষ হলো তাঁর বান্দা। সুতরাং মানুষের উচিত সর্বাবস্থায় আল্লাহর দিকে ফিরে যাওয়া। এভাবে সূরার প্রথম অংশে আল্লাহ তা'আলার তিনটি গুণের উল্লেখ করে তাঁর নিকট আশ্রয় প্রার্থনা করা হয়েছে।

সূরার দ্বিতীয় অংশে শয়তানের কুমন্ত্রণা থেকে বেঁচে থাকার জন্য মহান আল্লাহর আশ্রয় কামনা করা হয়েছে। শয়তান মানুষের প্রকাশ্য দুষমন। সে গোপনে, প্রকাশ্যে, ঘুমন্ত অবস্থায়, জাগ্রত অবস্থায় সবসময় মানুষকে কুমন্ত্রণা দিয়ে থাকে। তার কাজই হলো কুমন্ত্রণা দিয়ে মানুষের অন্তরকে বিপদগামী করা। মানুষ যেন আল্লাহ তা'আলাকে ভুলে যায়, তাঁর ইবাদত না করে ইত্যাদি কুমন্ত্রণা শয়তান দিয়ে থাকে। শয়তান শুধু জিনই নয় বরং মানুষের মধ্যেও শয়তান রয়েছে। মানুষ শয়তানও অন্যকে প্রতারিত করে, দীন থেকে দূরে সরিয়ে নেয়। এসব শয়তান থেকে আল্লাহ তা'আলার আশ্রয় ব্যতীত বেঁচে থাকা সম্ভব নয়। এ জন্য এ সূরায় শয়তানের সকল কুমন্ত্রণা ও অনিষ্ট থেকে বেঁচে থাকার জন্য আল্লাহ তা'আলার নিকট আশ্রয় প্রার্থনা শিক্ষা দেওয়া হয়েছে।

নৈতিক শিক্ষা

আল্লাহ তা'আলা আমাদের প্রতিপালক। তিনিই আমাদের মাবুদ। আমাদের সকল কিছুই তাঁর দান। তিনিই সমগ্র বিশ্বজগতের প্রকৃত অধিপতি। সুতরাং তাঁর আদেশ-নিষেধ আমরা সবসময় মেনে চলব। আর শয়তানের কুমন্ত্রণা থেকে বেঁচে থাকব। কেননা শয়তান মানুষকে অন্যায়, অনৈতিক ও অশীল কাজের দিকে পরিচালনা করে। ফলে শয়তানের কুমন্ত্রণা থেকে বেঁচে থাকতে পারলে অনৈতিক কাজ থেকেও বেঁচে থাকা যাবে।

কাজ : শিক্ষার্থী পাশের বন্ধুকে সূরা নাসের অর্থ ও নৈতিক শিক্ষা শোনাবে।

পাঠ ৭

সূরা আল-ফালাক (سُورَةُ الْفَلَقِ)

সূরা আল-ফালাক আল-কুরআনের ১১৩তম সূরা। এটি মদিনায় অবতীর্ণ হয়েছে। এ সূরার আয়াত সংখ্যা ৫টি। এ সূরার প্রথম আয়াতের শেষ শব্দ হলো الْفَلَق (ফালাক)। এ শব্দ থেকেই এ সূরার নাম সূরা আল-ফালাক রাখা হয়েছে।

সূরা আল-ফালাক ও সূরা আন নাস এর মধ্যে গভীর সম্পর্ক রয়েছে। এ সূরা দুটিতে বিভিন্ন জিনিসের অনিষ্ট থেকে আল্লাহ তা'আলার নিকট আশ্রয় প্রার্থনা করা হয়েছে। এ সূরা দুটি নাযিলের কারণ নিম্নরূপ :

একবার লাবীদ ইবনে আসিম নামক এক ইয়াহুদি রাসুলুল্লাহ (স.) উপর জাদু করে। এ কাজে সে তার কন্যাদের সাহায্য নেয়। তারা গোপনে রাসুল (স.)-এর একটি পবিত্র চুল সংগ্রহ করে এবং তাতে এগারটি গিরা দিয়ে জাদু করে। ফলে রাসুল (স.) অসুস্থ হয়ে পড়েন। জাদুর কারণে রাসুলুল্লাহ (স.)-এর কষ্ট হতে থাকে। এমতাবস্থায় আল্লাহ তা'আলা এ সূরা দুটি নাযিল করেন। এ সূরা দুটিতে ১১টি আয়াত রয়েছে। প্রতিটি আয়াত পড়ে প্রতিটি গিরাতে ফুঁক দিলে জাদুর প্রভাব নষ্ট হয়ে যায়। রাসুল (স.) সম্পূর্ণ সুস্থ হয়ে ওঠেন।

শব্দার্থ

الْفَلَقِ	- প্রভাত, উষা	وَقَبَّ	- গভীর হওয়া, আচ্ছন্ন হওয়া
مِنْ	- হতে, থেকে	النَّفَّاثَاتِ	- ফুঁক দানকারী নারীগণ, ফুৎকারকারীগণ।
خَلَقَ	- তিনি সৃষ্টি করেছেন	العُقَدِ	- গ্রন্থিসমূহ, গিরাসমূহ
عَاسِقٍ	- রাতের অন্ধকার	حَاسِدٍ	- হিংসাকারী, হিংসুক
إِذَا	- যখন	حَسَدًا	- সে হিংসা করল

অনুবাদ

بِسْمِ اللّٰهِ الرَّحْمٰنِ الرَّحِیْمِ ۝

দয়াময়, পরম দয়ালু আল্লাহর নামে ।

قُلْ اَعُوْذُ بِرَبِّ الْفَلَقِ ۝

১. বলুন, আমি আশ্রয় প্রার্থনা করি প্রভাতের প্রতিপালকের নিকট ।

مِنْ شَرِّ مَا خَلَقَ ۝

২. তিনি যা সৃষ্টি করেছেন তার অনিষ্ট থেকে ।

وَمِنْ شَرِّ غَاسِقٍ اِذَا وَقَبَ ۝

৩. রাতের আঁধারের অনিষ্ট থেকে, যখন তা গভীর হয় ।

وَمِنْ شَرِّ النَّفَّاثَاتِ فِي الْعُقَدِ ۝

৪. এবং অনিষ্ট থেকে ঐ সমস্ত নারীর, যারা ঐহিত্তে ফুৎকার দেয় ।

وَمِنْ شَرِّ حَاسِدٍ اِذَا حَسَدَ ۝

৫. এবং হিংসুকের অনিষ্ট থেকে, যখন সে হিংসা করে ।

ব্যাখ্যা

এ সুরায় আল্লাহ তা'আলার নিকট অনিষ্টকর বস্তু থেকে আশ্রয় চাওয়ার নির্দেশনা প্রদান করা হয়েছে । এর প্রথম আয়াতে উম্মার রব আল্লাহর নিকট আশ্রয় প্রার্থনা করা হয়েছে । মূলত আল্লাহ পাক সকল শক্তির উৎস । বিশ্বজগতের সবকিছুই তিনি সৃষ্টি করেছেন । তিনিই রাতকে দিনে এবং দিনকে রাতে রূপান্তর করেন । তিনিই সকাল, সন্ধ্যা, উষা ইত্যাদির আগমন ঘটান । সকল প্রকার অনিষ্ট থেকে তিনিই রক্ষা করেন । এজন্য সুরার প্রথমেই আল্লাহ তা'আলার নিকট আশ্রয় প্রার্থনা করা হয়েছে ।

এর পরবর্তী আয়াতগুলোতে বিভিন্ন বিষয়ের অনিষ্ট বা ক্ষতি থেকে আশ্রয় চাওয়া হয়েছে । আল্লাহ তা'আলা পৃথিবীর সবকিছুরই স্রষ্টা । এসব সৃষ্টির মধ্যে অনেক হিংস্র, বিষাক্ত ও অনিষ্টকর সৃষ্টিও রয়েছে । এগুলো মানুষের পরীক্ষার জন্য সৃষ্টি করা হয়েছে । এগুলোর অনিষ্ট থেকে রক্ষাকর্তা হলেন মহান আল্লাহ । গভীর রাতে নানারূপ বিপদাপদ ঘটতে পারে । যেমন- জিন, শয়তান, চোর-ডাকাত, শত্রুর আক্রমণ ইত্যাদি । এসবের অনিষ্ট থেকেও রক্ষাকর্তা মহান আল্লাহ । তাছাড়া জাদুকর নর-নারী ও হিংসুকের হিংসা থেকে আশ্রয়দাতাও আল্লাহ তা'আলা । আয়াতগুলোতে উল্লিখিত সমুদয় বিষয় থেকে আল্লাহ তা'আলার নিকট আশ্রয় কামনা করা হয়েছে ।

নৈতিক শিক্ষা

আল্লাহ তা'আলা আমাদের প্রভু। তিনিই সকল কিছুর উপর পূর্ণ ক্ষমতাবান। সুতরাং সকল বিপদে আপদে আমরা তাঁরই নিকট সাহায্য চাইব। সব ধরনের অনিষ্ট থেকে তাঁর নিকট আশ্রয় প্রার্থনা করব। সাথে সাথে হিংসা, জাদু-টোনা, অপরের ক্ষতিসাধন ইত্যাদি কাজ থেকে আমরা নিজেরা বিরত থাকব।

পাঠ ৮

সূরা আল-হুমাযাহ (سُورَةُ الْهُمَزَةِ)

সূরা আল-হুমাযাহ আল কুরআনের ১০৪ নম্বর সূরা। এ সূরাটি পবিত্র মক্কায় অবতীর্ণ হয়েছে। এর আয়াত সংখ্যা সর্বমোট ৯টি। এ সূরার প্রথম আয়াতে ব্যবহৃত শব্দ হুমাযাহ অনুসারে এ সূরার নামকরণ করা হয়েছে। আমরা এ সূরাটি অর্থসহ মুখস্থ করব। এবং এ সূরার শিক্ষা অনুযায়ী আমল করব।

শব্দার্থ

وَيْلٌ	- দুর্ভোগ, ধ্বংস	كَلَّا	- কখনো নয়
كُلٌّ	- প্রত্যেক, সকল	لَيُنَبِّذَنَّ	- অবশ্যই সে নিষ্কিঞ্চ হবে
هُمَزَةٌ	- গোপনে নিন্দাকারী	الْحَطْمَةَ	- হুতামা, একটি জাহান্নামের নাম
لُمَزَةٌ	- সম্মুখে নিন্দাকারী	مَا أَدْرَاكَ	- আপনি কি জানেন?
جَمَعَ	- সে জমা বা একত্র করেছে, সে সঞ্চয় করেছে।	نَارٌ	- আগুন
مَالًا	- মাল, ধন-সম্পদ	تَطَّلِعُ	- সে গ্রাস করবে
عَدَّدَهُ	- সে গণনা করেছে	الْأَفِيدَةَ	- হৃদয়সমূহ, অন্তরসমূহ
يَحْسَبُ	- সে ধারণা করে, সে হিসাব করে।	مُؤَصَّدَةٌ	- পরিবেষ্টিত
أَخْلَدَهُ	- সে অমর করেছে, সে চিরস্থায়ী করেছে।	عَمَدٍ	- স্তম্ভ, খুঁটি
-	-	مُمَدَّدَةٌ	- দীর্ঘায়িত, প্রলম্বিত।

অনুবাদ

بِسْمِ اللَّهِ الرَّحْمَنِ الرَّحِيمِ ۝

দয়াময়, পরম দয়ালু আল্লাহর নামে ।

وَيَلِّ لِكُلِّ هُمَزَةٍ لُّمَزَةٍ ۝

১. দুর্ভোগ প্রত্যেকের, যে পেছনে ও সামনে লোকের নিন্দা করে ।

الَّذِي جَمَعَ مَالًا وَعَدَّدَهُ ۝

২. যে অর্থ জমায় ও তা বারবার গণনা করে ।

يَحْسَبُ أَنَّ مَالَهُ أَخْلَدَهُ ۝

৩. সে ধারণা করে যে, তার অর্থ তাকে চিরস্থায়ী করে রাখবে ।

كَلَّا لَيُنْبَذَنَّ فِي الْحُطَمَةِ ۝

৪. কখনও না; সে অবশ্যই হুতামায় নিক্ষিপ্ত হবে ।

وَمَا أَذْرَاكَ مَا الْحُطَمَةُ ۝

৫. আর আপনি কি জানেন, হুতামা কী?

نَارُ اللَّهِ الْمَوْقُودَةُ ۝

৬. এটি আল্লাহর প্রজ্বলিত আগুন ।

الَّتِي تَطَّلِعُ عَلَى الْأَفْئِدَةِ ۝

৭. যা অন্তরসমূহ গ্রাস করবে ।

إِنَّهَا عَلَيْهِمْ مُّوَصَّدَةٌ ۝

৮. নিশ্চয়ই এটি তাদের পরিবেষ্টন করে রাখবে ।

فِي عَمَدٍ مُمَدَّدَةٍ ۝

৯. দীর্ঘায়িত স্তম্ভসমূহে ।

শানে নুযুল

উমাইয়া ইবন খালফ, ওলীদ ইবন মুগিরা ও আখনাস ইবন শুরায়ক মহানবি (স.) ও মুমিনদের গিভত করত এবং তাদের অর্থলিপ্সা ছিল প্রবল । তাদের এই অপকর্মের ভয়াবহ পরিণতির কথা উল্লেখ করে মহান আল্লাহ এই সুরা অবতীর্ণ করেন ।

ব্যাখ্যা

সুরা আল-হুমাযাহকে দুটি অংশে ভাগ করা যায় । প্রথম তিন আয়াত নিয়ে প্রথম অংশ এবং শেষ ছয়টি আয়াত নিয়ে দ্বিতীয় অংশ । প্রথম অংশে তিনটি জঘন্য গুনাহের পরিচয় তুলে ধরা হয়েছে । দ্বিতীয় অংশে এসব গুনাহের শাস্তির কথা বলা হয়েছে ।

এ সুরায় বর্ণিত গুনাহ বা পাপকাজগুলো হলো-

ক. হুমায়াহ বা পশ্চাতে বা গোপনে কারো নিন্দা করা। একে গিবতও বলা হয়। এটি অত্যন্ত খারাপ কাজ। আল্লাহ তা'আলা আল-কুরআনের অন্য আয়াতে গিবত করাকে মৃত ভাইয়ের গোশত খাওয়ার সমান বলে উল্লেখ করেছেন।

খ. লুমায়াহ বা সামনাসামনি কারো নিন্দা করা। গোপনে নিন্দা করার মত এটাও অত্যন্ত গর্হিত কাজ। এর ফলে মানুষ অপমানিত হয়। অনেক সময় মানুষের মধ্যে ঝগড়া-ফাসাদ ও মারামারির সৃষ্টি হয়।

গ. ধন-সম্পদ জমা করা ও বারবার তা গণনা করা। একে এককথায় অর্থলিঙ্গা বা আয়ের লোভ বলা যায়। ধন-সম্পদের প্রতি লোভী হলে মানুষ নানা অবৈধ পথে উপার্জন করতে থাকে। সে কুপণ হয়ে পড়ে। গরিব-দুঃখীদের অধিকার আদায় করে না। যাকাত, হজ ইত্যাদি ফরয ইবাদতও পালন করে না। বরং সে সম্পদ জমা করতে থাকে এবং ধারণা করে যে, এসব ধন-সম্পদ তাকে চিরস্থায়ী করে রাখবে।

এ সুরার দ্বিতীয় অংশে উল্লিখিত তিনটি জঘন্য কাজের শাস্তির কথা বর্ণনা করা হয়েছে। গিবত, পরনিন্দা ও অর্থলিঙ্গা তিনটিই খারাপ কাজ। এগুলো কবির গুনাহ। এ জন্য আখিরাতে মানুষকে জবাবদিহি করতে হবে। অর্থ মানুষকে অমর করে রাখবে এ ধারণাও ঠিক নয়। বরং সকল মানুষকেই মরতে হবে। তারপর হাশরের ময়দানে আল্লাহ তা'আলা প্রত্যেকের হিসাব নেবেন। যারা দুনিয়াতে এ তিনটি জঘন্য কাজ করে আখিরাতে তাদের কঠিন শাস্তি দেওয়া হবে। তাদের স্থান হবে হুতামা নামক জাহান্নামে। হুতামার আগুনে ঐ সকল ব্যক্তির অঙ্গ-প্রত্যঙ্গ জ্বলবে। এমনকি তাদের হৃদয় বা অন্তরও ঐ আগুনে পুড়বে। কোনো কিছুই আগুনের গ্রাস থেকে রেহাই পাবে না।

নৈতিক শিক্ষা

সুরা হুমায়াহ এর নৈতিক শিক্ষা খুবই গুরুত্বপূর্ণ। এখানে তিনটি মারাত্মক গুনাহের বা পাপকাজের কথা উল্লেখ করা হয়েছে। এগুলো হলো গিবত তথা পশ্চাতে বা গোপনে কারো নিন্দা করা, সামনাসামনি নিন্দা করা ও অর্থলিঙ্গা। এ তিনটিই নীতিহীন কাজ, অনৈতিক কাজ। উত্তম চরিত্রবান লোক এসব কাজ করতে পারে না। বরং নীতিবান হতে হলে এসব দোষ থেকে মুক্ত থাকতে হবে। অতএব, আমরাও এসব দোষ থেকে বেঁচে থাকব। কখনো কারো নিন্দা করব না। আর অর্থের প্রতি লোভ করব না। বরং আল্লাহ তা'আলা যে ধন-সম্পদ দিয়েছেন তার উপর সন্তুষ্ট থাকব এবং প্রয়োজনমতো খরচ করব।

পাঠ ৯

সূরা আল-আসর (سُورَةُ الْعَصْرِ)

সূরা আল-আসর আল-কুরআনের ১০৩ নম্বর সূরা। এটি মক্কা শরিফে অবতীর্ণ। এর আয়াত সংখ্যা মাত্র ৩টি। এ সূরার প্রথমে আল্লাহ তা'আলা আসর বা মহাকালের শপথ করেছেন। এজন্য এ সূরার নাম রাখা হয়েছে আল-আসর। পবিত্র কুরআনের ছোট সুরাসমূহের মধ্যে এটি অন্যতম। তবে এ সূরার তাৎপর্য অত্যন্ত ব্যাপক। ইমাম শাফিঈ (র) বলেছেন, 'যদি মানুষ কেবল এ সূরাটি নিয়ে চিন্তা করত, তবে এটাই তাদের জন্য যথেষ্ট ছিল' (ইবনে কাসির)। অর্থাৎ এ সূরার অর্থ ও তাৎপর্য বুঝতে পারলে মানুষ দুনিয়া ও আখিরাতে কল্যাণের পথ লাভ করত। সুতরাং আমরা এ সূরাটি অর্থসহ শিখব। অতঃপর এর তাৎপর্য শিক্ষা করব এবং তদনুযায়ী আমল করব।

শব্দার্থ

وَ	- শপথ, কসম।	الَّذِينَ	- যারা
الْعَصْرِ	- সময়, যুগ, কাল, মহাকাল।	آمَنُوا	- তারা ইমান এনেছে।
إِنَّ	- নিশ্চয়ই, অবশ্যই	وَعَمِلُوا	- তারা আমল করেছে।
الْإِنْسَانَ	- মানুষ	الصَّالِحَاتِ	-
خُسْرٍ	- ক্ষতি।	وَتَوَاصَوْا	- তারা পরস্পরকে উপদেশ দিয়েছে।
إِلَّا	- ব্যতীত, ছাড়া	الْحَقِّ	- সত্য।
		الصَّبْرِ	- ধৈর্য।

অনুবাদ

بِسْمِ اللَّهِ الرَّحْمَنِ الرَّحِيمِ ○

দয়াময়, পরম দয়ালু আল্লাহর নামে।

وَ الْعَصْرِ ○

১. মহাকালের শপথ।

إِنَّ الْإِنْسَانَ لَفِي خُسْرٍ ○

২. নিশ্চয়ই মানুষ ক্ষতিগ্রস্ত।

إِلَّا الَّذِينَ آمَنُوا وَعَمِلُوا الصَّالِحَاتِ وَتَوَاصَوْا بِالْحَقِّ وَتَوَاصَوْا بِالصَّبْرِ ○

৩. কিন্তু তারা নয়, যারা ইমান আনে ও সৎকর্ম করে এবং পরস্পরকে সত্যের উপদেশ দেয় ও ধৈর্যের উপদেশ দেয়।

শানে নুযুল

ওলীদ ইবন মুগিরা, 'আস ইবন ওয়াইল, আসওয়াদ ইবন মুত্তালিব প্রমুখ মুশরিক বলত যে, মুহাম্মদ (স.) অবশ্যই ক্ষতির মধ্যে রয়েছে। এ পরিপ্রেক্ষিতে (তাদের কথার অসারতা প্রমাণ করে) আল্লাহ তা'আলা সুরাটি নাযিল করেন।

ব্যাখ্যা

সুরা আল-আসরের প্রথম আয়াতেই আল্লাহ তা'আলা সময় বা মহাকালের শপথ করেছেন। মানুষের জীবনে সময় অত্যন্ত মূল্যবান। কেননা দুনিয়ার জীবন ক্ষণস্থায়ী। এ সময়ের মধ্যেই মানুষকে আখিরাতের জন্য প্রস্তুতি গ্রহণ করতে হয়। সুতরাং সময়ের সদ্ব্যবহার করতে হবে। যারা দুনিয়াতে সময়ের সদ্ব্যবহার করবে এবং নেক আমল করবে পরকালে তারাই সফলতা লাভ করবে। তাই সময়ের শপথ করে মহান আল্লাহ মানবজাতিকে সতর্ক করে দিয়েছেন।

দ্বিতীয় আয়াতে আল্লাহ তা'আলা মানুষের স্বাভাবিক অবস্থার কথা বলেছেন। তিনি বলেছেন, নিশ্চয়ই মানবজাতি ক্ষতিগ্রস্তদের অন্তর্ভুক্ত। কেননা তারা সময়ের সদ্ব্যবহার করে না, আল্লাহ তা'আলার আদেশ-নিষেধ মেনে চলে না। যারা এরূপ মনগড়াভাবে জীবনযাপন করবে তারা সবাই ক্ষতিগ্রস্ত।

তৃতীয় ও শেষ আয়াতে আল্লাহ তা'আলা ক্ষতি থেকে বাঁচার জন্য চারটি আমলের কথা উল্লেখ করেছেন। অর্থাৎ মানব জাতির মধ্যে যারা এ চারটি কাজ করবে তারা ক্ষতিগ্রস্ত হবে না। বরং তারা সফলতা লাভ করবে। আর যারা দুনিয়াতে এ কাজগুলো করবে না তারা অবশ্যই ক্ষতিগ্রস্ত হবে। এ কাজগুলো হলো ইমান আনা, সৎকর্ম করা, সত্যের উপদেশ দেওয়া ও ধৈর্যধারণের উপদেশ দেওয়া।

এ কাজগুলোর প্রথম দুটি কাজ ব্যক্তিগত। অর্থাৎ প্রথমে ইমান আনতে হবে। তাওহিদ, রিসালাত ও আখিরাতের প্রতি বিশ্বাস স্থাপন করতে হবে। এরপর দ্বিতীয় কাজ হলো ভালো কাজ করা। আল্লাহ তা'আলা যেসব কাজ করতে আদেশ করেছেন তা পালন করতে হবে। আর তিনি যেসব কাজ থেকে নিষেধ করেছেন তা থেকে বিরত থাকতে হবে। এভাবে সকল ক্ষেত্রে আল্লাহ তা'আলার আনুগত্য করার নামই নেক কাজ।

চারটি কাজের মধ্যে শেষের কাজ দুটি সামাজিক। অর্থাৎ একা একা এ কাজ দুটি করা যাবে না। এর প্রথমটি হলো- সমাজের মানুষকে সত্যের উপদেশ দেওয়া। অর্থাৎ মানুষকে সত্যপথের দিকে ডাকা। তাদেরকে নেক কাজে উৎসাহিত করা, অন্যায় কাজ থেকে তাদের বিরত রাখা ইত্যাদি। সামাজিক দায়িত্বের শেষটি হলো মানুষকে ধৈর্যধারণের উপদেশ দেওয়া। বিপদ-আপদ, দুঃখ-কষ্ট আল্লাহ তা'আলারই দান। এগুলোর মাধ্যমে তিনি মানুষকে পরীক্ষা করেন। সুতরাং এসব ক্ষেত্রে হতাশ ও নিরাশ হওয়া যাবে না। বরং ধৈর্যধারণ করতে হবে এবং আল্লাহ তা'আলার নিকট সাহায্য প্রার্থনা করতে হবে। এভাবে পরস্পরকে ধৈর্যধারণের উপদেশ দেওয়া অত্যন্ত গুরুত্বপূর্ণ কাজ।

নৈতিক শিক্ষা

আমরা সবাই সফলতা লাভ করতে চাই। কেউই ক্ষতিগ্রস্ত হতে চাই না। সুতরাং আমরা ইমান আনব এবং নেক কাজ করব। কোনো প্রকার অন্যায়-অত্যাচার ও অনৈতিক কাজ করব না। সাথে সাথে আমরা আমাদের বন্ধু-বান্ধব, ভাই-বোন, আত্মীয়-স্বজন, পাড়া-প্রতিবেশী সবাইকে সত্য ও সুন্দরের দিকে আহ্বান করব। সবাইকে উত্তম চরিত্রবান ও নীতিবান হতে উৎসাহ দেব। বিপদে আপদে ধৈর্যধারণ করব। হতাশ হয়ে কখনো অন্যায় ও অনৈতিক কাজ করব না।

কাজ : ক্লাসের সব শিক্ষার্থী দুই দলে ভাগ হয়ে যাবে। একদল সুরা আসর অর্থসহ মুখস্থ বলবে। অন্যদল এ সুরার ব্যাখ্যা ও নৈতিক শিক্ষা সম্পর্কে বলবে। একইভাবে দ্বিতীয় দল প্রথম কাজটি এবং প্রথম দল পরের কাজটি করবে।

পাঠ ১০

অর্থসহ মুনাজাতের তিনটি আয়াত

পৃথিবীতে চলার জন্য আমাদের নানা জিনিসের প্রয়োজন। এসব জিনিস পাওয়ার জন্য আমরা বহু কষ্ট করি। আল্লাহ তা'আলার দয়া ব্যতীত কোনো কিছুই আমরা লাভ করতে পারি না। মহান আল্লাহ আমাদের রব। তিনিই সবকিছু আমাদের দান করেন। দুনিয়া-আখিরাতের সমস্ত নিয়ামত আল্লাহ তা'আলারই দান। সুতরাং কোনো কিছু পাওয়ার জন্য আল্লাহ তা'আলার নিকটই প্রার্থনা করা উচিত। আল্লাহ তা'আলার নিকট প্রার্থনাকেই মুনাজাত বলা হয়। আল্লাহ তা'আলা স্বয়ং আমাদের মুনাজাত করার জন্য শিক্ষা দিয়েছেন। আল-কুরআনে মুনাজাতমূলক বহু আয়াত রয়েছে। এর মধ্যে মাত্র তিনটি আয়াত নিম্নে উল্লেখ করা হলো। আমরা এসব আয়াত শিখব ও অর্থ জানব। এরপর এগুলোর মাধ্যমে মহান আল্লাহর নিকট প্রার্থনা করব।

আয়াত-১

○ رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ

অর্থ : হে আমাদের প্রতিপালক! আমাদের দুনিয়াতে এবং আখিরাতে কল্যাণ দাও। আর আমাদের আগুনের শাস্তি থেকে রক্ষা কর। (সুরা বাকারা : ২০১)

দুনিয়ার জীবনই মানুষের শেষ নয়। এরপর রয়েছে আখিরাত। আখিরাত হলো চিরস্থায়ী। এর গুরু আছে কিন্তু শেষ নেই। এ দুটি জীবনে কল্যাণ লাভ করাই হলো প্রকৃত সফলতা। দুনিয়ার জীবনে আমরা সুখ-শান্তি চাই। আর আখিরাতে চাই মুক্তি ও সফলতা। পরকালে জাহান্নামের শাস্তি থেকে রক্ষা পাওয়া হলো সবচেয়ে বড় সফলতা। আল্লাহ তা'আলার হাতেই রয়েছে এ সমস্ত কল্যাণ ও সফলতা। আল্লাহ তা'আলা এগুলো মানুষকে দান করেন। এজন্য আমরা তাঁর কাছেই প্রার্থনা জানাব। উপরোক্ত আয়াতে আল্লাহ তা'আলা মানুষকে এ শিক্ষাই প্রদান করেছেন। দুনিয়া ও আখিরাতের সমস্ত কল্যাণ লাভের জন্য এ দোয়াটি খুবই গুরুত্বপূর্ণ।

আয়াত-২

رَبِّ اَرْحَمُهُمَا كَمَا رَبَّيْتَنِي صَغِيرًا ۝

অর্থ : হে আমার প্রতিপালক! তুমি তাদের প্রতি দয়া কর। যেভাবে শৈশবে তারা আমাকে লালন-পালন করেছেন। (সুরা বনী ইসরাঈল : ২৪)

মাতাপিতা সন্তানের অতি আপনজন। তাঁরা অত্যন্ত আদর-স্নেহে সন্তানকে লালন-পালন করেন। নিজে না খেয়ে সন্তানকে খাওয়ান। নিজেরা কষ্ট করে সন্তানকে আরাম-আয়েশে রাখেন। বিশেষ করে শৈশবকালে তাঁরা আমাদের খুব যত্নের সাথে প্রতিপালন করেন। শিশুকালে সকল মানুষই অসহায় থাকে। নিজে নিজে দাঁড়াতে পারে না, খেতে পারে না, চলাফেরা করতে পারে না। এমনকি কথাবার্তাও বলতে পারে না। মাতাপিতাই এ সময় মানুষের সবচেয়ে বড় অবলম্বন। তাঁরাই এ সময় সন্তানকে মায়া-মমতা দিয়ে বড় করে তোলেন। অতএব, আমাদের সকলের কর্তব্য মাতাপিতার আনুগত্য করা। তাঁদের কথা মেনে চলা। তাঁদের জন্য আল্লাহ তা'আলার নিকট দোয়া করা। এ আয়াতে মহান আল্লাহ মাতাপিতার জন্য দোয়া করার বাক্য শিক্ষা দিয়েছেন। আমরা এ আয়াত অর্থসহ শিখব। অতঃপর আন্তরিকভাবে এ আয়াত পড়ে মহান আল্লাহর নিকট আমাদের মাতা-পিতার জন্য দোয়া করব। তাহলে আল্লাহ তা'আলা তাঁদের কল্যাণ ও রহমত দান করবেন।

আয়াত-৩

رَبِّ زِدْنِي عِلْمًا ۝

অর্থ : হে আমার প্রতিপালক! আমাকে জ্ঞানে সমৃদ্ধ কর। (সুরা ত্ব-হা : ১১৪)

উক্ত আয়াতে জ্ঞান বৃদ্ধির জন্য মুনাজাত করার কথা বলা হয়েছে। জ্ঞানার্জন করা প্রত্যেক মুসলমানের জন্য ফরয। কেননা শিক্ষা ও জ্ঞানের মাধ্যমে আমরা আল্লাহ তা'আলাকে চিনতে পারি। তাঁর বিধান ও বাণী জানতে পারি। জ্ঞানার্জনের মাধ্যমে আমরা মানুষের মত মানুষ হই। জীবনে উন্নতি লাভের জন্যও জ্ঞানার্জন করা জরুরী। সুতরাং আমরা ভালো করে লেখাপড়া শিখব। জ্ঞানার্জনে কোনোরূপ অবহেলা করব না। আর সাথে সাথে আমাদের জ্ঞান বৃদ্ধি করে দেওয়ার জন্য আল্লাহ তা'আলার নিকট মুনাজাত করব। কেননা মহান আল্লাহই সবকিছুর মালিক। তিনিই মানুষকে জ্ঞান দান করেন। অতএব, জ্ঞান বৃদ্ধির জন্য তাঁর নিকটই প্রার্থনা করতে হবে।

কাজ : শিক্ষার্থীরা সম্মিলিতভাবে দু'হাত তুলে মুনাজাতমূলক আয়াত তিনটি অর্থসহ মুখস্থ বলবে।

পাঠ ১১

হাদিস

হাদিস (الْحَدِيثُ) আরবি শব্দ । এর অর্থ কথা, বাণী ইত্যাদি । মহানবি হযরত মুহাম্মদ (স.)-এর বাণী, কাজ ও অনুমোদনকে হাদিস বলা হয় । অর্থাৎ আমাদের প্রিয়নবি (স.) যা কিছু বলতেন তা-ই হাদিস । তিনি যে সমস্ত কাজ করেছেন তাও হাদিস । আর যে সমস্ত কাজ সাহাবিগণ তাঁর সামনে করেছেন । কিন্তু তিনি তাদের নিষেধ করেন নি বরং ঐ সমস্ত কাজে মৌনসম্মতি দিয়েছেন এগুলোও হাদিস । হাদিসের অপর নাম হলো সুন্নাহ ।

সাহাবিগণ রাসুল (স.)-এর সবরকম হাদিসই সংরক্ষণ করতেন । রাসুল (স.) কিছু বললে সাথে সাথে তাঁরা তা মুখস্থ করতেন । নবি কারিম (স.) যে কাজ যেভাবে করতেন সাহাবিগণও তা ঠিক তেমনিভাবে আদায় করতেন । অতঃপর নিজ পরিবার-পরিজন, বন্ধু-বান্ধবগণের নিকট এগুলো পৌঁছে দিতেন । এভাবে মহানবি (স.)-এর জীবদ্দশায় হাদিস সংরক্ষণ করা হয় । নবি কারিম (স.)-এর ইত্তিকালের পর সাহাবিগণ মজলিস করে হাদিস শিক্ষা দিতেন । দূর-দূরান্ত থেকে লোকজন তাঁদের নিকট হাদিস শিখতে আসতেন । পরবর্তীতে মুহাদ্দিসগণ রাসুলুল্লাহ (স.)-এর সকল হাদিস লিপিবদ্ধ করে রাখেন । তাঁরা হাদিসের বহু কিতাব সংকলন করেন । এভাবে আমরাও নবি কারিম (স.)-এর হাদিস লাভ করি ।

হাদিসের গুরুত্ব

ইসলামে হাদিসের স্থান অত্যন্ত উর্ধ্ব । ইসলামি জীবনব্যবস্থার দ্বিতীয় উৎস হলো হাদিস । আর এর প্রথম উৎস হলো আল-কুরআন । সুতরাং ইসলামে আল-কুরআনের পরই হাদিসের স্থান । হাদিস হলো আল-কুরআনের ব্যাখ্যাস্বরূপ । আল কুরআনে আল্লাহ তা'আলা মানুষকে নানা নির্দেশ দিয়েছেন । অতঃপর নবি কারিম (স.) হাদিসের মাধ্যমে তা মানুষের নিকট বিশ্লেষণ করেছেন । নিচের উদাহরণটি পড়লে আমরা স্পষ্টভাবে বিষয়টি বুঝতে পারব । যেমন- আল-কুরআনে সালাত আদায়ের নির্দেশ দেওয়া হয়েছে । কিন্তু কীভাবে আমরা সালাত আদায় করব তা বলে দেওয়া হয় নি । একাকী পড়ব না-কি সকলে মিলে পড়ব, কত রাকআত পড়ব, কোন সময় পড়ব, রুকু-সিজদা কীভাবে করব ইত্যাদি কিছুই কুরআনে স্পষ্টভাবে উল্লেখ নেই । এগুলো আমরা হাদিসের মাধ্যমে পাই । রাসুলুল্লাহ (স.) এসব নিয়ম-কানুন আমাদের বলে দিয়েছেন । তিনি নিজে সালাত আদায় করে আমাদের হাতে-কলমে শিক্ষা দিয়েছেন । রাসুলুল্লাহ (স.)-এর হাদিস না থাকলে আমরা তা কখনোই জানতে পারতাম না । সুতরাং কুরআনের পরই হাদিস অত্যন্ত গুরুত্বপূর্ণ ।

হযরত মুহাম্মদ (স.) ছিলেন আল্লাহ তা'আলার প্রেরিত রাসুল । তিনি ছিলেন মানব জাতির জন্য আদর্শ । তাঁর মাধ্যমেই আমরা আল্লাহ তা'আলার পরিচয় লাভ করি । তিনি আল্লাহ তা'আলার নির্দেশেই আমাদের সৎপথ প্রদর্শন করেছেন । তিনি মানুষকে সৎকাজের আদেশ দিতেন । মন্দকাজ থেকে বিরত থাকতে বলতেন । তাঁর এসব আদেশ-নিষেধই হলো হাদিস ।

পবিত্র হাদিস আমাদের জন্য অত্যন্ত গুরুত্বপূর্ণ । মহান আল্লাহ বলেছেন, 'রাসুল তোমাদের যা দেন তা তোমরা গ্রহণ কর । আর যা নিষেধ করেন তা থেকে বিরত থাক ।' (সূরা আল-হাশর : ৭)

অতএব, রাসুল (স.)-এর হাদিস আমরা পাঠ করব । তার অর্থ বুঝব এবং সে অনুযায়ী আমল করব । তাঁর আদেশগুলো মেনে চলব এবং নিষেধগুলো থেকে বিরত থাকব ।

পাঠ ১২

অর্থসহ নৈতিক গুণাবলি বিষয়ক দু'টি হাদিস

নীতি ও নৈতিকতা মানবজীবনের জন্য অপরিহার্য। নীতি হলো কথায় ও কাজে সৎ, সুন্দর ও মার্জিত ব্যবহার করা। কোনোরূপ অন্যায় অত্যাচার ও অশালীন কাজ-কর্ম না করা। নীতিহীন মানুষ পশুর সমান। যে ব্যক্তি চলাফেরা ও কথাবার্তায় নীতির অনুসরণ করে না, সমাজের সকলে তাকে ঘৃণা করে। অন্যদিকে নীতিবান মানুষকে সবাই ভালোবাসে। সকলে তাকে শ্রদ্ধা করে, সম্মান করে। আমাদের প্রিয়নবি হযরত মুহাম্মদ (স.) ছিলেন সর্বোত্তম নীতির অধিকারী। তিনি সদাসর্বদা নীতি ও আদর্শের অনুশীলন করতেন। উত্তম চরিত্র ও নীতির জন্য শত্রুরাও তাঁর প্রশংসা করত।

হাদিসসমূহে আমরা দেখতে পাই মহানবি (স.) উম্মতগণকেও নীতি-নৈতিকতা শিক্ষা দিয়েছেন। নিম্নে দুটি নীতিমূলক হাদিস উল্লেখ করা হলো। আমরা এগুলো মুখস্থ করব, এর অর্থ জানব। আমরা এ নীতিমূলক হাদিস অনুযায়ী আমল করব।

হাদিস-১

لَا دِينَ لِمَنْ لَا عَهْدَ لَهُ - (مسند ديلمی)

অর্থ: যে ব্যক্তি অঙ্গীকার পালন করে না তার কোনো দীন নেই অর্থাৎ সে প্রকৃত দীনদার নয়। (মুসনাদে দায়লামি)

শিক্ষা

অঙ্গীকার পালন করা নীতি-নৈতিকতার অন্যতম গুরুত্বপূর্ণ অংশ। আমরা নানা সময় নানারূপ ওয়াদা ও অঙ্গীকার করে থাকি। এসব অঙ্গীকার ও প্রতিশ্রুতি রক্ষা করা অত্যন্ত জরুরি। কেননা ওয়াদা বা প্রতিশ্রুতি রক্ষা না করলে মানুষের মধ্যে অবিশ্বাস সৃষ্টি হয়। পরস্পর মারামারি ও অশান্তির জন্ম হয়। সুতরাং সামাজিক শান্তির জন্য অঙ্গীকার রক্ষা করা আবশ্যিক। ইসলামে অঙ্গীকার রক্ষা করার প্রতি গুরুত্ব আরোপ হয়েছে। মহানবি (স.) নিজে সর্বদা অঙ্গীকার রক্ষা করে চলতেন। অঙ্গীকার ভঙ্গ করা প্রকৃত দীনদার ব্যক্তির লক্ষণ নয়। অর্থাৎ যে ব্যক্তি পরিপূর্ণ দীনদার সে সবসময় প্রতিশ্রুতি রক্ষা করে চলবে। সে কখনো অঙ্গীকার ভঙ্গ করবে না। অতএব, আমরা কখনো অঙ্গীকার ভঙ্গ করব না। বরং জীবনের সকল প্রতিশ্রুতি পূরণ করতে চেষ্টা করব। তাহলে আমরা প্রকৃত দীনদার হতে পারব।

হাদিস-২

وَأَيُّكُمْ وَالْكَذِبَ فَإِنَّ الْكُذِبَ يَهْدِي إِلَى الْفُجُورِ وَإِنَّ الْفُجُورَ يَهْدِي إِلَى النَّارِ (متفق عليه)

অর্থ: তোমরা মিথ্যা থেকে বেঁচে থাক। কেননা মিথ্যা (মানুষকে) পাপের দিকে নিয়ে যায়। আর পাপ জাহান্নাম পর্যন্ত পৌঁছে দেয়। (বুখারি ও মুসলিম)

শিক্ষা

মিথ্যা হলো সত্যের বিপরীত। প্রকৃত কথা বা কাজকে গোপন করাকে মিথ্যা বলা হয়। মিথ্যাবাদীকে কেউ বিশ্বাস করে না। কেউ তাকে ভালোবাসে না। মিথ্যাবাদীকে কেউ সাহায্য সহযোগিতাও করে না। মহানবি (স.) ছিলেন চরম সত্যবাদী। তিনি জীবনে কোনোদিন মিথ্যা কথা বলেন নি। তিনি মানুষকে সত্য কথা বলার জন্য নির্দেশ দিয়েছেন এবং

মানুষকে মিথ্যা ত্যাগ করতে বলেছেন। কেননা মিথ্যা হলো সকল পাপের মূল। মিথ্যা মানুষকে পাপের দিকে নিয়ে যায়। কোনো পাপ কাজ করে মিথ্যা বললে অনেক সময় তা ধরা যায় না। ফলে মানুষ পুনরায় পাপ করতে থাকে। কিন্তু আল্লাহ তা'আলা সবকিছু দেখেন ও জানেন। তাঁর নিকট মিথ্যা বলা যায় না। বরং দুনিয়ার সব পাপের তিনি হিসাব রাখেন। হাশরের ময়দানে তিনি এ সবার বিচার করবেন।

যেহেতু মিথ্যা মানুষকে পাপের দিকে নিয়ে যায়। আর পাপের শাস্তি হলো জাহান্নাম। সুতরাং আমরা মিথ্যা বলা পরিহার করব। সদাসর্বদা সত্যকথা বলব। তাহলে জাহান্নামের শাস্তি থেকে রক্ষা পাব।

কাজ : শিক্ষার্থীরা দুই দলে ভাগ হয়ে যাবে। একদল নৈতিক গুণাবলি বিষয়ক হাদিস দুইটি অর্থসহ মুখস্থ বলবে। অন্যদল হাদিস দুইটির শিক্ষা সম্পর্কে বলবে। আবার প্রথম দল উক্ত হাদিসের শিক্ষা এবং দ্বিতীয় দল হাদিস দুইটি অর্থসহ মুখস্থ বলবে।

পাঠ ১৩

অর্থসহ প্রার্থনামূলক দু'টি হাদিস

মহানবি হযরত মুহাম্মদ (স.) ছিলেন মানবজাতির মহান শিক্ষক। তিনি মানুষকে সবধরনের কল্যাণের পথে পরিচালনা করতেন। মানুষ কীভাবে চললে দুনিয়া ও আখিরাতের কল্যাণ লাভ করবে তাও তিনি দেখিয়ে গেছেন। উম্মতের কল্যাণের জন্য তিনি বহু মুনাজাত শিক্ষা দিয়েছেন। এসব মুনাজাত হাদিস শরিফে লিপিবদ্ধ রয়েছে। নিম্নে মুনাজাতমূলক দুটি হাদিস উল্লেখ করা হলো। আমরা এ হাদিস দুটি অর্থসহ মুখস্থ করব এবং এগুলোর দ্বারা আল্লাহ তা'আলার নিকট দোয়া করব।

হাদিস-১

اللَّهُمَّ اغْفِرْ لِي ذُنُوبِي وَخَطِيئِي وَعَمْدِي (طبرانی)

অর্থ : হে আল্লাহ! আমার পাপসমূহ, ভুল-ত্রুটিগুলো এবং ইচ্ছাকৃত অপরাধসমূহ ক্ষমা করে দাও। (তবারানি)

আমরা কথাবার্তা, চলাফেরায় নানারূপ পাপ কাজ করে ফেলি। ছোট-বড়, ইচ্ছাকৃত-অনিচ্ছাকৃত এসব পাপ আখিরাতে আমাদের শাস্তির কারণ হবে। অতএব, এগুলো থেকে আল্লাহ তা'আলার নিকট ক্ষমা চাওয়া দরকার। কেননা মহান আল্লাহই একমাত্র ক্ষমা করার মালিক। সুতরাং আমরা সবসময় এ হাদিসের মাধ্যমে ভুলত্রুটি ও পাপের জন্য আল্লাহর নিকট ক্ষমা চাইব।

হাদিস-২

اللَّهُمَّ إِنِّي أَسْأَلُكَ عِلْمًا نَافِعًا رِزْقًا طَيِّبًا (ابن ماجة)

অর্থ : হে আল্লাহ! আমি তোমার নিকট উপকারী বিদ্যা এবং পবিত্র (হালাল) রিযিক চাই। (ইবন মাজাহ) খাদ্য ও জ্ঞান মানুষের জন্য অত্যন্ত গুরুত্বপূর্ণ। ইসলামে হালাল ও পবিত্র খাদ্য গ্রহণ করার জন্য নির্দেশ দেওয়া হয়েছে। আর উপকারী বিদ্যা অর্জন করাও জরুরি। এ উভয় জিনিসের জন্যই মহান আল্লাহর নিকট প্রার্থনা করতে হবে। এ হাদিসের মাধ্যমে প্রিয়নবি (স.) আমাদেরকে আল্লাহ তা'আলার নিকট এ দুটি জিনিস প্রার্থনা করার নিয়ম শিক্ষা দিয়েছেন। আমরা এ দোয়াটি মুখস্থ করব ও এর মাধ্যমে মুনাজাত করব।

কাজ : শিক্ষার্থী উভয় হাত তুলে নিজেদের মঙ্গলের জন্য প্রার্থনা করবে এবং প্রার্থনায় এই পাঠের হাদিস ২টি অর্থসহ বলবে।

পাঠ ১৪

হাদিস : নৈতিক ও মানবিক মূল্যবোধ

জীবনের সকল ক্ষেত্রে মনুষ্যত্ব ও নীতি-আদর্শের শিক্ষাকে ধরে রাখার চেষ্টা ও চেতনাই হলো নৈতিক ও মানবিক মূল্যবোধ। আদর্শ সমাজ গঠনের জন্য এ মূল্যবোধের প্রয়োজন অত্যন্ত বেশি। নৈতিক ও মানবিক মূল্যবোধ মানুষকে উত্তম চরিত্রবান করে গড়ে তোলে। ফলে মানুষ সমাজে সম্মান ও মর্যাদা লাভ করে। সকলে এ আদর্শ অনুশীলন করলে সমাজে শান্তি প্রতিষ্ঠিত হয়।

অন্যদিকে সমাজে নৈতিক ও মানবিক মূল্যবোধ না থাকলে সে সমাজে শান্তি থাকে না। দুর্নীতি, সন্ত্রাস, চুরি-ডাকাতি, ছিনতাই, প্রতারণা ইত্যাদি ছড়িয়ে পড়ে। মানুষের মধ্যে দয়া, মায়াময়, ঐক্য, ভালোবাসা ইত্যাদি সদগুণাবলির চর্চা থাকে না। মানুষ পরস্পরকে অবিশ্বাস ও সন্দেহ করে। ফলে সমাজে নানা অরাজকতা ও অশান্তির সৃষ্টি হয়।

মহানবি (স.)-এর হাদিস নৈতিক ও মানবিক মূল্যবোধ প্রতিষ্ঠায় খুবই গুরুত্বপূর্ণ ভূমিকা পালন করে থাকে। আমরা পূর্বপাঠে হাদিসের পরিচয় লাভ করেছি। হাদিসের মাধ্যমে আমরা প্রিয়নবি (স.)-এর বাণী ও কর্ম সম্পর্কে জানতে পারি। তিনি মানুষের সাথে কিরূপ আচরণ করতেন তা জানতে পারি। তার উত্তম চরিত্রের কথা জানতে পারি। তিনি আমাদের জন্য কি দিকনির্দেশনা দিয়ে গেছেন তাও আমরা হাদিস পড়ে জানতে পারি।

হাদিস শরিফে প্রিয়নবি (স.) আমাদের নানাবিধ নৈতিক ও মানবিক আচরণের নির্দেশ দিয়েছেন। দয়া, ক্ষমা, সাম্য, মৈত্রী, ভ্রাতৃত্ব, ভালোবাসা, পরস্পর সহযোগিতা ইত্যাদি গুণাবলি অনুশীলনের জন্য উৎসাহিত করেছেন। আবার মিথ্যা বলা, প্রতারণা করা, চুরি-ডাকাতি করা, গালি-গালাজ করা, ঠাট্টা-বিদ্রূপ করা ইত্যাদি খারাপ কাজ করতে আমাদের নিষেধ করেছেন। হিংসা-বিদ্বেষ, গর্ব-অহংকার, খোশামোদ-তোষামোদ ইত্যাদিও খারাপ অভ্যাস। এগুলো মানবিক আদর্শের বিপরীত। এগুলো নৈতিক মূল্যবোধকে ধ্বংস করে। এগুলো থেকেও বিরত থাকার জন্য মহানবি (স.) আমাদের নির্দেশ দিয়েছেন। তিনি বলেছেন-

رَبِّكُمْ وَالْحَسَدَ فَإِنَّ الْحَسَدَ يَأْكُلُ الْحَسَنَاتِ عَمَا يَأْكُلُ النَّارُ الْحَطَبَ

অর্থ : তোমরা হিংসা থেকে বিরত থাকবে। কেননা আগুন যেমন কাঠকে পুড়িয়ে দেয় হিংসাও তেমনি নেক আমলসমূহকে ধ্বংস করে দেয়। (আবু দাউদ)

সংগুণাবলির অনুশীলন ও অসং গুণাবলি থেকে বেঁচে থাকার মাধ্যমে আমরা উত্তম চরিত্রবান হতে পারি। এগুলো আমাদের নৈতিক ও মানবিক মূল্যবোধ রক্ষায়ও সাহায্য করে। এভাবে হাদিসের শিক্ষা আমাদের নৈতিক ও মানবিক মূল্যবোধসম্পন্ন মানুষ হিসেবে গড়ে তোলে।

হাদিস শরিফে মহানবি হযরত মুহাম্মদ (স.)-এর জীবনচরিত ও উত্তম চরিত্রের আদর্শ বর্ণিত আছে। আমাদের প্রিয়নবি (স.) ছিলেন সর্বোত্তম চরিত্রের অধিকারী। আল্লাহ তা'আলা স্বয়ং রাসুলুল্লাহ (স.)-কে বলেছেন-

وَأَنَّكَ لَعَلَى خُلُقٍ عَظِيمٍ অর্থ : নিশ্চয়ই আপনি মহান চরিত্রের অধিকারী। (সুরা ক্বালাম : ৪) মহানবি (স.) ছিলেন সর্বোত্তম মানুষ। তিনি সবসময় নৈতিক ও মানবিক গুণাবলি অনুসরণ করতেন। তাঁর একটি উপাধি ছিল আল-আমিন। আল-আমিন অর্থ বিশ্বাসী, বিশ্বস্ত, সত্যবাদী। তিনি সবসময় সত্যকথা বলতেন। কথা ও কাজে সততা অবলম্বন করতেন। কেউ কোনোকিছু আমানত বা গচ্ছিত রাখলে তিনি তা মালিকের নিকট যথাযথভাবে ফেরত দিতেন। তিনি কখনো মিথ্যা বলতেন না, ওয়াদা ভঙ্গ করতেন না, বিশ্বাসঘাতকতা করতেন না। ফলে তাঁর শত্রুরাও তাঁকে আল-আমিন বা বিশ্বাসী নামে ডাকত।

এভাবে দেখা যায়, সবধরনের সংগুণ রাসুলুল্লাহ (স.)-এর চরিত্রে বিদ্যমান ছিল। তিনি ছিলেন ক্ষমাশীল, দয়ালবান, অতিথিপরায়ণ, মিষ্টভাষী। তিনি অন্যায় ও অশ্লীল কাজ কখনো করতেন না। অশালীন চলাফেরা ও কথাবার্তা তাঁর থেকে কখনো প্রকাশিত হয় নি। সারা জীবন তিনি মানুষকে উত্তম চরিত্র সম্পর্কে হাতে-কলমে শিক্ষা দিয়েছেন। রাসুলের (স.) এ আদর্শ নৈতিক ও মানবিক মূল্যবোধ রক্ষার উজ্জ্বল প্রমাণ। প্রিয়নবি (স.) এর চরিত্র অনুসরণ করলে কখনোই নৈতিক ও মানবিক মূল্যবোধ লঙ্ঘিত হবে না। বরং এর দ্বারা আমরা প্রকৃত মানুষ হিসেবে গড়ে উঠতে পারব। আমাদের মধ্য থেকে দুর্নীতি ও পশুত্ব দূরীভূত হবে। রাসুলের (স.) জীবনাদর্শ হাদিস শরিফে সুন্দরভাবে সংরক্ষিত রয়েছে। এগুলো মানুষের জন্য দিকনির্দেশনা স্বরূপ। আমরা হাদিস পড়ে এগুলো জানব এবং সে অনুযায়ী আমল করব।

অনুশীলনমূলক প্রশ্ন

শূন্যস্থান পূরণ কর :

১. মাখরাজ হলো স্থান ।
২. জাওফ হলো ভিতরের খালি জায়গা ।
৩. সুরা আল ফালাক পবিত্র কুরআনের তম সুরা ।
৪. সুরা আল হুমাযাকে অংশে ভাগ করা যায় ।
৫. হাদিসের অপর নাম হলো ।

বাম পাশ থেকে শব্দ বা বাক্যাংশ নিয়ে ডান পাশের সাথে মিল কর :

বাম পাশ	ডান পাশ
১. পবিত্র কুরআনের প্রতিটি হরফে	ফাতিহাতুল কিতাবও বলা হয় ।
২. তাজবিদ অনুযায়ী কুরআন	সহযোগিতা করে না ।
৩. আল কুরআনকে	দশটি নেকি পাওয়া যায় ।
৪. মিথ্যাবাদীকে কেউ সাহায্য	সমাজে অশান্তি সৃষ্টি হয় ।
৫. অবিশ্বাস ও সন্দেহের কারণে	পড়া আল্লাহ তাআলার নির্দেশ ।

সংক্ষিপ্ত উত্তর প্রশ্ন :

১. আল কুরআনের সংক্ষিপ্ত পরিচয় দাও ।
২. মাখরাজ বলতে কী বোঝায় ?
৩. হাদিসের সংক্ষিপ্ত পরিচয় দাও ।

বর্ণনামূলক প্রশ্ন :

১. বিস্বন্ধ কুরআন পাঠে তাজবিদের ভূমিকা আলোচনা কর ।
২. সুরা আল ফাতিহার পটভূমি ও শিক্ষা আলোচনা কর ।
৩. হাদিসের আলোকে নৈতিক ও মানবিক মূল্যবোধের পরিচয় দাও ।

৫. এই অভ্যাস ফিরোজ সাহেবকে চূড়ান্তভাবে কোন দিকে নিয়ে যাবে ?

- ক. পাপের দিকে
- খ. বাগড়ার দিকে
- গ. অকল্যাণের দিকে
- ঘ. জাহান্নামের দিকে

সৃজনশীল প্রশ্ন :

১. আব্দুর রহিম সুললিত কণ্ঠের অধিকারী । তিনি অশুদ্ধভাবে তাড়াতাড়ি কুরআন তিলাওয়াত করেন । অপরপক্ষে তার সহপাঠী-আব্দুল করিমের কণ্ঠস্বর সুমধুর নয় । কিন্তু তিনি দেখে ধীরে ধীরে ও সুস্পষ্টভাবে তিলাওয়াত করার আশ্রাণ চেষ্টা করেন ।

ক. আল কুরআনের সর্ব প্রথম সুরা কোনটি ?

খ. 'হে আমার প্রতিপালক ! আমাকে জ্ঞানে সমৃদ্ধ কর' আয়াতটি বুঝিয়ে লেখ ।

গ. আব্দুর রহিমের তিলাওয়াতে শরিয়তের কোন বিধানটি পালন হয় নি ? ব্যাখ্যা কর ।

ঘ. আব্দুল করিমের কুরআন তিলাওয়াতের পদ্ধতিটি পাঠ্যবইয়ের আলোকে বিশ্লেষণ কর ।

২. সাদিয়া ও নাদিয়া একই অফিসে চাকরি করেন । তাদের উর্ধ্বতন কর্মকর্তা উভয়কে দুইটি কাজ ভাগ করে দেন । ফলে তারা উভয়ে উক্ত কাজ যথাসময়ে সমাপ্ত করার প্রতিজ্ঞা করেন । সাদিয়া নির্ধারিত সময়ে কাজ শেষ করলে কর্তৃপক্ষ খুশি হয়ে পদোন্নতি প্রদান করেন । কিন্তু নাদিয়া যথাসময়ে কাজ শেষ করতে না পারায় তিরস্কারের শিকার হন । ফলে নাদিয়া সাদিয়াকে হিংসা করতে শুরু করলে সাদিয়া বলেন, 'পরহিংসা নরক বাস, যুগে যুগে সর্বনাশ' ।

ক. হাদিস শব্দের অর্থ কী ?

খ. "নিশ্চয়ই মানুষ ক্ষতিগ্রস্ত" কথাটি বুঝিয়ে লেখ ।

গ. সাদিয়ার কর্মে কী প্রকাশ পেয়েছে ? পাঠ্যবইয়ের আলোকে ব্যাখ্যা কর ।

ঘ. নাদিয়ার কর্মকাণ্ডের পরিণাম সংশ্লিষ্ট হাদিসের আলোকে বিশ্লেষণ কর ।

চতুর্থ অধ্যায় আখলাক

মহান আল্লাহ মানুষকে পৃথিবীতে সৃষ্টির সেরা হিসেবে পাঠিয়েছেন। মানুষের এই শ্রেষ্ঠত্বের মর্যাদা বজায় রাখতে হলে প্রয়োজন সুন্দর আচার আচরণ। এটি শুধু মানুষের সাথেই সীমাবদ্ধ নয়। বরং জীবজন্তু, পশুপাখি, গাছপালা ও পরিবেশের সাথেও সুন্দর আচরণ প্রয়োজন। মানুষের এই সুন্দর ও প্রশংসনীয় আচরণকে আখলাক বলে।

এই অধ্যায় পাঠ শেষে শিক্ষার্থী -

- আখলাকের ধারণা বর্ণনা করতে পারবে
- সদাচরণের ধারণা ও কতিপয় সদাচরণের গুরুত্ব ইসলামের দৃষ্টিতে ব্যাখ্যা করতে পারবে।
- সদাচরণের ধারণা বর্ণনা করতে পারবে।
- কতিপয় অসদাচরণের ধারণা এবং এগুলো পরিহারের উপায় ব্যাখ্যা করতে পারবে।
- ধূমপান ও মাদকাসক্তির ধারণা ও কুফল বর্ণনা করতে পারবে।
- বাস্তব জীবনে সদাচরণে আগ্রহী হবে, অসদাচরণ থেকে নিজেকে বিরত রাখতে উদ্বুদ্ধ হবে এবং নিকটতম ব্যক্তিদেরকেও বিরত থাকতে অনুপ্রাণিত করবে।
- ধূমপান ও মাদকাসক্তিজনিত সামাজিক ক্ষতি এবং স্বাস্থ্য ঝুঁকি এড়িয়ে চলতে আগ্রহী হবে।



মানুষ সামাজিক জীব। পরিবার এবং সমাজবদ্ধ হয়ে বাস করে। মানুষের দৈনন্দিন কাজকর্মের মাধ্যমে যেসব আচার-ব্যবহার, চাল-চলন এবং স্বভাবের প্রকাশ ঘটে সেসবের সমষ্টিই আখলাক। কখনও আখলাক (আচরণ) প্রশংসনীয় হয় আবার কখনো নিন্দনীয় হয়। প্রশংসনীয় আচরণকে আখলাকে হামিদা বা সচ্চরিত্র বলে। আর নিন্দনীয় আচরণকে আখলাকে যামিমা বলে।

আখলাকে হামিদা বা প্রশংসনীয় আচরণগুলো হলো সত্যবাদিতা, পিতামাতার প্রতি উত্তম ব্যবহার, শিক্ষকদের সম্মান করা, আত্মীয়স্বজন, প্রতিবেশী সহপাঠীদের সাথে সদাচরণ, বড়দের প্রতি শ্রদ্ধা ও ছোটদের প্রতি স্নেহ ইত্যাদি।

আখলাকে যামিমা বা নিন্দনীয় আচরণগুলো হলো মিথ্যা কথা বলা, পরনিন্দা করা, আমানতের খিয়ানত করা, গালি দেওয়া, আত্মীয়তার সম্পর্ক ছিন্ন করা ইত্যাদি। প্রতিটি মানুষের আখলাকে হামিদা অর্জন ও আখলাকে যামিমা বর্জন করা উচিত। আমরা আখলাকে হামিদা অর্জন করব এবং আখলাকে যামিমা বর্জন করব।

পাঠ ১ আখলাকে হামিদাহ

আখলাকে হামিদা বা প্রশংসনীয় আচরণ মানুষের জীবনে খুবই প্রয়োজন। সুন্দর আচরণের মাধ্যমে মানুষে মানুষে বন্ধুত্ব তৈরি হয়। সুসম্পর্ক ও সৌহার্দ্য ভাব বজায় থাকে। পারস্পরিক লেনদেন সহজতর হয়। জীবন হয়ে উঠে মধুময়। তাই সচ্চরিত্রের গুরুত্ব সম্পর্কে মহানবি(স.) বলেন, “কিয়ামতের দিন দাঁড়ি-পাল্লায় সবচেয়ে ভারী জিনিস হবে মুমিনের উত্তম চরিত্র।” (তিরমিযি) মহানবি(স.) আরও বলেছেন, “তোমাদের মধ্যে ঐ ব্যক্তি আমার নিকট সবচেয়ে প্রিয় যার চরিত্র উত্তম।” (বুখারি, মুসলিম)।

মহান আল্লাহ মানুষকে অসংখ্য নিয়ামত দান করেছেন। এগুলোর মধ্যে সচ্চরিত্র একটি উত্তম নিয়ামত। সচ্চরিত্র শিক্ষার জন্য সর্বোত্তম আদর্শ হচ্ছেন আমাদের প্রিয়নবি হযরত মুহাম্মদ (স.)। পরিপূর্ণ সচ্চরিত্রের প্রতীক ছিলেন তিনি। এ সম্পর্কে আল্লাহ বলেন—

لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ

অর্থ : “তোমাদের জন্য আল্লাহর রাসুলের জীবনে রয়েছে উত্তম আদর্শ।” (সুরা আহযাব, আয়াত : ২১)

মহানবি(স.)-এর চরিত্রের মধ্যে সদাচরণের গুণগুলো পরিপূর্ণভাবে প্রতিফলিত হয়েছে। এ সম্পর্কে রাসুল(স.) ঘোষণা করেন :

بُعِثْتُ بِدَعْوَى مَكَارِمِ الْأَخْلَاقِ

অর্থ : “আমি উত্তম চারিত্রিক গুণাবলি পরিপূর্ণ করার উদ্দেশ্যেই প্রেরিত হয়েছি।” (ইবনে মাযাহ)

আমাদের জন্য মহানবি(স.)-এর সমগ্র জীবনই উত্তম অনুকরণীয় আদর্শ। আমরা মহানবি(স.)-এর জীবন অনুসরণ করে নিজেদের জীবনকে সুন্দর করে গড়ে তুলব।

কাজ : শিক্ষার্থীরা শ্রেণিকক্ষে কয়েকটি দলে ভাগ হয়ে ভালো অভ্যাস ও মন্দ অভ্যাসের তালিকা বা চার্ট তৈরি করে শিক্ষককে দেখাবে।

পাঠ ২

সত্যবাদিতা (الصِّدْقُ)

সত্যবাদিতার আরবি প্রতিশব্দ হলো সিদক (صِدْقٌ)। এর অর্থ হলো সততা, সত্যবাদিতা, সত্যকথা বলা, সত্য সাক্ষ্য দেওয়া ইত্যাদি। বাস্তব বা প্রকৃত ঘটনা যথাযথ প্রকাশ করাকে সত্যবাদিতা বলে। যে ব্যক্তির মধ্যে এ মহৎগুণ আছে তাকে বলে সাদিক (صَادِقٌ) বা সত্যবাদী। যে সত্য কথা বলে তাকে সবাই ভালোবাসে ও সম্মান করে। সত্যবাদী দুনিয়াতে যেমন সম্মানের অধিকারী হন তেমনিভাবে আখিরাতেও পরম সুখ লাভ করবেন। আমাদের প্রিয় নবি (স.) বাল্যকাল থেকে সকলের নিকট সত্যবাদী এবং বিশ্বাসী হিসাবে প্রসিদ্ধ ছিলেন। তাই সবাই তাকে আল-আমিন বলে ডাকতেন এবং সম্মান করতেন। তিনি জীবনে মিথ্যা কথা বলেন নি। প্রাণের শত্রুও তাকে মিথ্যাবাদী বলতে পারে নি। যে সত্য কথা বলে না তাকে কেউ বিশ্বাস করে না। মহানবি হযরত মুহাম্মদ (স.) সত্যবাদিতা সম্পর্কে বলেন-

الصِّدْقُ يُنْجِي “অর্থাৎ, সত্য মানুষকে মুক্তি দেয়” (ফতহুল কাবির)

সত্যবাদিতার উপকারিতা সম্পর্কে নবি করিম (স.) আরও বলেন, “তোমাদের অবশ্যই সত্যবাদী হওয়া উচিত। কেননা সত্যবাদিতা মানুষকে পুণ্যের পথে পরিচালিত করে, আর পুণ্য বেহেশতের পথে পরিচালিত করে।” পবিত্র কুরআনুল কারিমে সত্যবাদীকে জান্নাত (বেহেশত) দানের কথা বলা হয়েছে।

يَوْمَ يُنْفَعُ الصَّادِقِينَ صِدْقُهُمْ ؕ

অর্থাৎ “এইতো সে দিন- যে দিন সত্যবাদীগণকে তাদের সত্যবাদিতা বিশেষ উপকার দেবে।” (আল মায়িদা, আয়াত : ১৯) তাদের জন্য রয়েছে পরম সুখময় জান্নাত।

আমাদের বড়পীর হযরত আব্দুল কাদির জিলানি (রা.)-এর জীবনে সত্যবাদিতা সম্পর্কে একটি বাস্তব উদাহরণ পাওয়া যায়। তখন তিনি অল্পবয়স্ক বালক। শিক্ষা গ্রহণের জন্য তিনি বাগদাদ রওনা হলেন। গমনের সময় মা তাঁকে সর্বদা সত্য কথা বলার আদেশ করেন। পশ্চিমধ্যে একদল ডাকাত তাদের কাফেলার উপর হামলা করে। ডাকাত দল একে একে কাফেলার সকলকে তল্লাশি চালায়। তল্লাশির সময় বালক আব্দুল কাদিরকে জিজ্ঞাসা করল যে, হে বালক, তোমার কাছে কিছু আছে কি? তিনি নির্ভয়ে উত্তর দিলেন, “চল্লিশটি স্বর্ণমুদ্রা আছে।” তাঁর কথা যাচাইয়ের জন্য ডাকাত সর্দার ধমক দিয়ে বলল, “কোথায় স্বর্ণমুদ্রা? আমাদের তা দেখাও। তিনি জামার আঙ্গিনের মধ্যে সেলাই করা অবস্থায় ডাকাতদের তা বের করে দেখালেন। ডাকাতরা তাঁর সততা দেখে অবাক হয়ে বলল, এরূপ লুকানো স্বর্ণমুদ্রা আমরা খুঁজে পেতাম না, তুমি কেন বললে? তিনি বললেন, “আপনারা জিজ্ঞেস করায় আমি সত্য কথা বলে দিয়েছি। কারণ আমার মা আমাকে সর্বদা সত্য কথা বলতে বলেছেন।”

ডাকাতরা বালক আব্দুল কাদিরের সততায় মুগ্ধ হয়ে নিজেদের পাপকর্ম সম্পর্কে অনুশোচনা করল। তারা ডাকাতি ছেড়ে দিয়ে সৎ পথে চলার প্রতিজ্ঞা করল। সত্যবাদিতা এভাবেই মানুষকে মুক্তি ও কল্যাণের পথ দেখায়।

আমাদের প্রতিজ্ঞা : সদা সত্য কথা বলব।

[শিক্ষক ছাত্র-ছাত্রীদের এরূপ আরও ছোট ঘটনা বলে শুনাবে এবং তাদেরকে এরূপ আরও ছোট ছোট ঘটনা বলার জন্য উদ্বুদ্ধ করবে।]

কাজ : যদি বালক আব্দুল কাদের সত্য গোপন করত তাহলে কী ক্ষতি হতে পারত। শিক্ষার্থীরা শ্রেণিকক্ষে খাতায় লিখে দেখাবে।

পাঠ ৩

পিতামাতার প্রতি কর্তব্য

সুন্দর এই পৃথিবীতে পিতামাতা আমাদের সবচেয়ে আপনজন। আমাদের জীবনে তাদের অবদান সবচেয়ে বেশি। জন্মের সময় আমরা ছিলাম অসহায়। আমরা নিজেদের প্রয়োজনের কথাও বলতে পারতাম না। পিতামাতা বুক ভরা স্নেহমমতা দিয়ে লালন পালন করে আমাদের বড় করে তোলেন। অসুখ-বিসুখে দিন রাত কষ্ট করে সেবাযত্ন করেন। সুশিক্ষার ব্যবস্থা করেন। পিতামাতা আমাদের জন্য আল্লাহর সেরা দান। তারা সর্বদা আমাদের কল্যাণ কামনা করেন। পিতামাতার চেয়ে আপনজন পৃথিবীতে আর কেউ নেই। সুতরাং এরূপকল্যাণ কামী পিতামাতার প্রতি আমাদেরও কিছু কর্তব্য রয়েছে।

কর্তব্য

পিতামাতার আদেশ-নিষেধ পালন সন্তানের জন্য ওয়াজিব (কর্তব্য)। সেইসাথে পিতামাতার সেবা-যত্ন করাও আমাদের কর্তব্য। এ সম্পর্কে পবিত্র কুরআনে আল্লাহ বলেন—

وَقَضَىٰ رَبُّكَ أَلَّا تَعْبُدُوا إِلَّا إِيَّاهُ وَبِالْوَالِدَيْنِ إِحْسَانًا ۗ

অর্থ: “তোমার প্রতিপালক নির্দেশ দিয়েছেন যে, তোমরা তাকে ছাড়া অন্য কারও ইবাদত করবে না এবং পিতামাতার সাথে সর্বোত্তম আচরণ করবে।” [সূরা বনি ইসরাইল : ২৩]

পিতামাতা বৃদ্ধ হলে সন্তান তাদেরকে অধিকতর সেবা-যত্ন করবে। তাদেরকে ধমক দেবে না বা মনে কষ্ট পায় এরূপ কোনো কথা বা কাজ করবে না। তাদের সাথে উত্তম ও সম্মানজনক ভাষায় কথা বলবে। এ সম্পর্কে আল্লাহ বলেন—

إِمَّا يَنْتَعِنَنَّ عِنْدَكَ الْكِبَرَ أَحَدُهُمَا أَوْ كِلَاهِمَا فَلَا تَقُلْ لَهُمَا أَوْفٌ وَلَا تَحْزَنْهُمَا ۗ وَقُلْ لَهُمَا قَوْلًا كَرِيمًا ۝

অর্থ: ‘যদি পিতামাতার একজন অথবা উভয়ে তোমার নিকট বার্ধক্যে উপনীত হন, তবে তাদের প্রতি তুমি বিরজিসূচক শব্দ ‘উহ’ উচ্চারণ কর না এবং তাদেরকে ধমক দিও না। তাদের সাথে উত্তম সম্মানজনক ভাষায় কথা বলো।’ (বনি ইসরাইল, আয়াত-২৩)

তাদের উদ্দেশ্যে সর্বদা আল্লাহর নিকট আমাদের এই দোয়া করা উচিত—

رَبِّ اِرْحَمَهُمَا مَعِيَ رَبِّيَّانِي صَغِيرًا ۝

অর্থ : হে আমার প্রতিপালক, তুমি আমার পিতামাতার প্রতি তেমনি সদয় হও! যেমনিভাবে তাঁরা আমাকে শৈশবে আদর-যত্নে লালন পালন করেছেন। (বনি ইসরাইল, আয়াত : ২৪)

পিতামাতার ভরণ-পোষণের দায়িত্ব পালন করা সন্তানের উপর কর্তব্য। এ সম্পর্কে মহান আল্লাহ বলেন—

قُلْ مَا اَنْفَقْتُمْ مِنْ خَيْرٍ فَلِلْوَالِدَيْنِ وَالْاَقْرَبِينَ

অর্থ : “বলুন তোমরা যে সম্পদ ব্যয় কর, তা তোমাদের পিতামাতা ও নিকটাত্মীয়দের জন্য ব্যয় করবে।” (সুরা বাকারা, আয়াত : ২১৫)

পিতা-মাতার প্রতি সদ্যবহার করা আমাদের কর্তব্য।

এ সম্পর্কে মহানবি (স.)-এর বাণী :

الْجَنَّةُ تَحْتَ اُفْدَامِ الْاُمَّهَاتِ

অর্থ : “মায়ের পদতলে সন্তানের বেহেশত।” (আত-তারগিব)

মহানবি (স.) আরও বলেছেন, “পিতার সন্তুষ্টিতে আল্লাহর সন্তুষ্টি, পিতার অসন্তুষ্টিতে আল্লাহর অসন্তুষ্টি”।

পিতামাতার প্রতি যথাযথভাবে দায়িত্ব পালন করলে দুনিয়া ও আখিরাতে সফলতা লাভ করা যায়।

কাজ : শ্রেণিকক্ষে শিক্ষার্থীরা কয়েকটি দলে ভাগ হয়ে পিতামাতার প্রতি কী কী কর্তব্য রয়েছে তার একটি তালিকা তৈরি করবে।

পাঠ ৪

আত্মীয়স্বজনের প্রতি কর্তব্য

আত্মীয় শব্দটি এসেছে আত্মা থেকে। আত্মার সাথে সম্পর্কিত ব্যক্তিকে আত্মীয় বলে। যাদের সাথে জীবনের ঘনিষ্ঠতা গড়ে উঠে তারাই আত্মীয়। সমাজে ভাইবোন, চাচা-চাচী, মামা-মামী, শ্বশুর-শাশুড়ি এবং অন্যান্য নিকটস্থ বন্ধুবান্ধবকে আত্মীয় বলা হয়। যাদের সাথে আত্মার সম্পর্ক রয়েছে তারা আত্মীয়। এক কথায় আত্মার সাথে সম্পর্কিত জনকে আত্মীয় বলে। তারা খুব কাছের লোক, আপন মানুষ।

ইসলামি সমাজে পিতামাতার ন্যায় আত্মীয়স্বজনের প্রতিও আমাদের অনেক দায়িত্ব ও কর্তব্য আছে। আত্মীয়দের মধ্যে যারা বড় তাদের প্রতি শ্রদ্ধা ও সম্মান দেখানো এবং যারা ছোট তাদেরকে অবশ্যই আদর ও স্নেহ করতে হবে। আত্মীয়দের সাথে উত্তম ব্যবহার করতে হবে। আত্মীয়দের মধ্যে গরিব-ধনী নির্বিশেষে সকলের সাথে সৌজন্যমূলক সম্পর্ক বজায় রাখতে হবে। গরিব ও অভাবগ্রস্ত আত্মীয়দের প্রয়োজনীয় সাহায্য করতে হবে। এ সম্পর্কে আল্লাহর বাণী :

وَأَتَى الْمَالَ عَلَى حُبِّهِ ذَوَى الْقُرْبَى

অর্থ : “আল্লাহর ভালোবাসা লাভের জন্য নিকট আত্মীয়দের দান কর।” (সুরা বাকারা, আয়াত : ১৭৭)

আত্মীয়রা রোগাক্রান্ত হলে তাদের সেবায়ত্ন করতে হবে। বিপদে-আপদে খোঁজ-খবর নিতে হবে। আত্মীয়দের সাথে সদ্ব্যবহার করার জন্য স্বয়ং আল্লাহ তা’আলা নির্দেশ দিয়েছেন—

وَبِالْوَالِدَيْنِ إِحْسَانًا وَبِذِي الْقُرْبَى

অর্থ : “পিতামাতার সাথে সদ্ব্যবহার করবে এবং নিকট আত্মীয়দের সাথেও উত্তম আচরণ প্রদর্শন করবে।”

(সুরা নিসা, আয়াত-৩৬)

তিনি আরও বলেন—

إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَاءِ ذِي الْقُرْبَى

অর্থ : “মহান আল্লাহ ন্যায়বিচার কায়েম করতে, পরস্পরের প্রতি ইহুসান করতে ও আত্মীয়স্বজনের অধিকার আদায় করতে নির্দেশ দিচ্ছেন। আত্মীয়দের কোনোরূপ কষ্ট দেয়া যাবে না। আত্মীয়দের সাথে কোনোরূপ সম্পর্ক ছিন্ন করা যাবে না। (সুরা নাহল, আয়াত : ৯০)

এ মর্মে রাসুল (স.) বলেছেন :

لَا تَنْزِلُ الرَّحْمَةَ عَلَى قَوْمٍ يَكْفُرُونَ بِهَا وَيَمِينِهِمْ قَاطِعٌ رَحْمٌ

অর্থ : “যে সম্প্রদায়ের মধ্যে আত্মীয়তার সম্পর্ক ছিন্নকারী লোক থাকে সে সম্প্রদায়ের প্রতি আল্লাহর রহমত বর্ষিত হয় না।” (বয়হাকি)

কোনো অন্যায় বা অসৎ কাজে আত্মীয়কে সাহায্য করা যাবে না। বরং অন্যায় কাজ থেকে তাকে বিরত রাখাই দায়িত্ব। আত্মীয়দের সাথে ভালোবাসাপূর্ণ আচরণ করলে পৃথিবীতে লাভবান হওয়া যায়। নবি কারিম (স.) বলেছেন, “যে ব্যক্তি কামনা করে যে তার জীবিকা ও আয়ু বৃদ্ধি পাক, সে যেন আত্মীয়দের সাথে সুন্দর আচরণ করে।” (সহি বুখারি ও সহি মুসলিম)

আত্মীয়স্বজনের সাথে আমরা সকলে ভালো ব্যবহার করব। তাঁদের প্রাপ্য আদায় করব। তাদের দুঃখ-কষ্টে সাহায্য সহযোগিতা করব। তাদের সকল বৈধ কাজে সহযোগিতা করব।

কাজ : শিক্ষার্থীরা আত্মীয়দের সাথে কীভাবে সদাচরণ করা যায় তার একটি তালিকা তৈরি করবে।

পাঠ ৫

প্রতিবেশীর প্রতি কর্তব্য

মানুষ সামাজিক জীব। আমরা সমাজবদ্ধ হয়ে বাস করি। আমাদের আশেপাশে আরও অনেক লোক বসবাস করে। আমাদের চারপাশে আরও যারা বসবাস করে তারা সকলেই আমাদের প্রতিবেশী। আমাদের নবি হযরত মুহাম্মদ (স.) বলেছেন, “সামনে-পিছে, ডানে-বাঁয়ে চল্লিশ ঘর পর্যন্ত প্রতিবেশী।” স্থায়ী বা অস্থায়ীভাবে পাশাপাশি অবস্থানকারী কিংবা সাময়িকভাবে আশেপাশে অবস্থানকারীকে প্রতিবেশী বলা হয়। এমনকি চলার পথের সহযাত্রীদেরও প্রতিবেশী বলা যায়।

কর্তব্য

আমরা মুসলমান। আমাদের চারপাশে হিন্দু, বৌদ্ধ, খ্রিস্টান যারা বসবাস করে তারা সবাই আমাদের প্রতিবেশী। প্রতিবেশীদের সাথে সদ্যবহার ও সুন্দর আচরণ করা আমাদের কর্তব্য। এ প্রসঙ্গে রাসূল (স.)-এর বাণী :

خَيْرُ الْجِيرَانِ عِنْدَ اللَّهِ خَيْرُ مُمْ لِحَارِهِ

অর্থ : “আল্লাহর নিকট সেই প্রতিবেশী সর্বাপেক্ষা উত্তম, যে তার প্রতিবেশীর নিকট উত্তম।” (আল জামে’ সগির)
প্রতিবেশীকে বিপদে-আপদে সাহায্য সহযোগিতা করতে হবে। মহানবি (স) এ সম্পর্কে আরও বলেন,

“সেই ব্যক্তি আমার উপর প্রকৃত ইমান আনেনি যে আরামে রাত কাটায় অথচ তার প্রতিবেশী ক্ষুধার্ত।” (দারিমি)

অসুখে-বিসুখে প্রতিবেশীর খোঁজ-খবর নেয়া প্রয়োজন। প্রতিবেশীর দোষ-ত্রুটি খুঁজে বের করা উচিত নয়, তাদের মঙ্গল কামনা করা, কোনো প্রকার কষ্ট না দেয়া এবং অন্যায়-অত্যাচার না করা আমাদের মানবিক ও নৈতিক দায়িত্ব। এ বিষয়ে রাসুল (স.) বলেন –

لَا يَدْخُلُ الْجَنَّةَ مَنْ لَا يَأْمَنُ جَارَهُ بَوَائِقَهُ

অর্থ : “সে ব্যক্তি জান্নাতে প্রবেশ করবে না, যার প্রতিবেশী তার অত্যাচার ও অন্যায় আচরণ হতে নিরাপদ নয়।” (মুসলিম)

প্রতিবেশীদের একজনের হক অন্যজনের কাছে আমানতস্বরূপ। এ আমানতকে অবশ্যই হিফায়ত করতে হবে। প্রতিবেশী যে কেউ কিংবা যেমনই হোক, জাতি-ধর্ম-বর্ণ ও শ্রেণি নির্বিশেষে সকলকে সমান মর্যাদা দিতে হবে।

প্রতিবেশীকে প্রথমে সালাম দেয়া এবং খানা-পিনায় শরিক করাও প্রতিবেশীর কর্তব্যের মধ্যে शामिल। তাদের মাঝে উপহার উপঢৌকন বিনিময় করাও প্রতিবেশীর কর্তব্যের অন্তর্ভুক্ত। প্রতিবেশীকে কোনোরূপ ঘৃণা করা যাবে না এবং হীন ও নগণ্য মনে করা যাবে না। প্রতিবেশীর অধিকার সম্পর্কে মহানবি (স.) বলেন,

“প্রতিবেশীর হক হলো, সে যদি রোগাক্রান্ত হয় তাহলে তুমি তার সেবা করবে। সে মরে গেলে তার লাশের সঙ্গে কবরস্থান পর্যন্ত যাবে, কাফন দাফনে অংশগ্রহণ করবে। সে যদি অর্থ অভাবে পড়ে, তাহলে তুমি তাকে ঋণ দেবে, সে যদি নগ্নতা বা উলঙ্গতায় পড়ে, তাহলে তুমি তার লজ্জা আবৃত করবে। আর যদি কোনো কল্যাণ হয় তুমি তাকে মুবারকবাদ জানাবে। সে যদি কোনো বিপদে পতিত হয় তবে তুমি তার দুঃখের ভাগ নিবে, সহানুভূতি জানাবে। তোমার ঘর তার ঘর থেকে উঁচু বানিয়ে তাকে মুক্ত বায়ু থেকে বঞ্চিত করবে না। তোমার রান্নার পাত্রের বাতাস দিয়েও তাকে কষ্ট দিবে না। যদি তেমন অবস্থা হয়ই তাহলে তাকে এক চামচ খাবার পাঠিয়ে দিবে।” (তাবরানি)

প্রতিবেশী অভাবগ্রস্ত হলে, দরিদ্র বা শ্রমজীবী হলে তাদের সাথে সুন্দর আচরণ করতে হবে। তাদের পেশাকে সম্মান করতে হবে। সুখে-দুঃখে পাশে থাকতে হবে, সম্মানের সাথে তাদের সম্বোধন করতে হবে।

পাঠ ৬

বড়দের প্রতি শ্রদ্ধা ও ছোটদের প্রতি স্নেহ

মানব চরিত্রের একটি প্রশংসনীয় আচরণ হলো বড়দের প্রতি শ্রদ্ধা ও ছোটদের প্রতি স্নেহ করা। তিনিই একজন আদর্শ মানুষ যিনি বড়দের শ্রদ্ধা ও ছোটদের স্নেহ করেন। প্রিয় নবি (স.) বড়দের সম্মান করতেন এবং ছোটদের আদর করতেন। তিনি সর্বদা ছোটদের আবদার রক্ষা করার চেষ্টা করতেন।

বড়দের শ্রদ্ধা ও ছোটদের স্নেহ করার গুরুত্ব অপরিসীম। এর মাধ্যমে ছোটরা বড়দের শ্রদ্ধা ও সম্মান করতে শিখে এবং বড়রা ছোটদের স্নেহ করেন ও ভালোবাসেন। ফলে সমাজে এক মধুর পরিবেশ সৃষ্টি হয়। মহানবি (স.) বলেন—

لَيْسَ مِنَّا مَنْ لَمْ يَرْحَمْ صَغِيرَنَا وَلَمْ يُوقِرْ كَبِيرَنَا

অর্থ : “সে ব্যক্তি আমার উম্মতের মধ্যে গণ্য নয় যে ব্যক্তি ছোটদের স্নেহ করে না এবং বড়দের শ্রদ্ধা সম্মান করে না।” (তিরমিযি)

বড়দের সালাম প্রদান করা, তাদের প্রতি সম্মান প্রদর্শন করা, সৌজন্য বজায় রেখে কথাবার্তা বলা, প্রয়োজনে বড়দের কাজকর্মে সাহায্য সহযোগিতা করা, তাদের আদেশ উপদেশ মেনে চলা এবং বসা থাকলে উঠে তাদের বসার ব্যবস্থা করা নৈতিক ও মানবিক কর্তব্য।

বড়দের প্রতি সম্মান প্রদর্শন করলে পরকালে বিশেষ সাওয়াব অর্জিত হবে এবং জান্নাত লাভ সহজ হবে। ছোটদের আদর সোহাগ করা, তাদের ভালো কাজে উৎসাহ প্রদান করা বড়দের কর্তব্য। এতে ছোটদের মনের প্রসারতা বৃদ্ধি পায়।

প্রিয় নবি (স.) বলেছেন :

“কোনো বৃদ্ধকে যদি কোনো যুবক বার্ষিক্যে ও কারণে শ্রদ্ধা করে, তাহলে আল্লাহ তা'আলা ঐ যুবকের জন্য বৃদ্ধ অবস্থায় এমন ব্যক্তিকে নিযুক্ত করবেন যে তাকে শ্রদ্ধা করবে।” (তিরমিযি)

কাজ : শিক্ষার্থীরা চার-পাঁচজন করে দলে বিভক্ত হয়ে বড়দের প্রতি ছোটদের করণীয়গুলো পোস্টারে লিখে শ্রেণিতে উপস্থাপন করবে।

পাঠ ৭

সহপাঠীদের সাথে সদ্যবহার

মানুষ সামাজিক জীব। সমাজের বিভিন্ন লোকদের সাথে মিলেমিশে কাজকর্ম করতে হয়। আমরা যে স্কুল বা বিদ্যালয়ে পড়াশোনা করি, সেখানে আমাদের সাথে আরও অনেকে পড়াশোনা করে। বিদ্যালয়ে আমরা যাদের সাথে একই শ্রেণিতে লেখাপড়া করি তারা সকলেই আমাদের সহপাঠী। সহপাঠীদের সাথে আমাদের আন্তরিক ও মধুর সম্পর্ক রয়েছে। সহপাঠীরা আমাদের ভাইবোনের মত। স্কুলে আমরা একে অপরের সুবিধা-অসুবিধার প্রতি লক্ষ্য রাখি। স্কুলে আমাদের সহপাঠীদের কেউ অসুস্থ হলে সেবা করা আমাদের কর্তব্য। প্রয়োজনে ডাক্তারের নিকট নিয়ে যেতে সাহায্য করতে হবে। প্রয়োজনীয় দ্রব্যসামগ্রী যেমন- বই, খাতা, কলম, পেন্সিল, কারও না থাকলে তাকে দিয়ে সাহায্য করা উচিত। আমাদের সহপাঠীদের মধ্যে কারও মন খারাপ হলে, বিষণ্ণ বা চিন্তিত হলে তার বিষণ্ণতার ভাব দূর করার চেষ্টা করতে হবে। সহপাঠীদের সাথে উত্তম আচরণ করা উচিত। তাদেরকে উত্তম শব্দে সম্বোধন করতে হবে।

কাউকে খাটো করে কথা বলা থেকে বিরত থাকতে হবে, একে অপরকে মর্যাদা দিতে হবে। সহপাঠীদের সাথে কটুবাক্য ব্যবহার করা উচিত নয়। কারও মনে কষ্ট পেতে পারে এমন কোনো আচরণ থেকে বিরত থাকব। কেউ কোনো বিপদে পতিত হলে বিপদ দূর করার চেষ্টা করব। কারো ব্যথায় সান্ত্বনা দেব। কাউকে উপনামে ডাকব না। কারও পিছনে লাগবো না। দোষ-ত্রুটি ধরে লজ্জা দিব না।

সহপাঠীদের সুখে আমরা সুখি হই আবার কারও কোনো দুঃসংবাদ শুনলে আমরা ব্যথিত হই। ধৈর্য ধারণের পরামর্শ প্রদান করি। কখনো কোনো সুখবর পেলে আমরা তার আনন্দে শরিক হই।

সহপাঠীদের সাথে সদ্যবহার করলে বা সম্পর্ক থাকলে শ্রেণিকক্ষের পরিবেশ ভালো থাকে, বিদ্যালয়ের পরিবেশ সুন্দর হয়। সুশিক্ষার জন্য এটা খুব প্রয়োজন।

কাজ : শিক্ষার্থীরা ছোট ছোট দলে ভাগ হয়ে সহপাঠীদের প্রতি কর্তব্যের একটি তালিকা তৈরি করবে।

পাঠ ৮ আখলাকে যামিমা

আখলাকে যামিমার অর্থ হলো অসদাচার বা নিন্দনীয় আচরণ। এমন কতগুলো নৈতিক অবক্ষয়মূলক আচরণ যা মানুষকে হীন, নীচ, ইতরশ্রেণিভুক্ত ও নিন্দনীয় করে। মিথ্যাচার, গিবত, পরনিন্দা, গালি দেওয়া ইত্যাদি আখলাকে যামিমা বা নিন্দনীয় আচরণ। এগুলো বর্জন করতে হবে। মহান আল্লাহ পবিত্র কুরআনে এ ধরনের আচরণ করতে কঠোরভাবে নিষেধ করেছেন।

আল্লাহর বাণী :

وَلَا تَلْبِسُوا الْحَقَّ بِالْبَاطِلِ وَتَكْتُمُوا الْحَقَّ وَأَنْتُمْ تَعْلَمُونَ ۝

অর্থ : “তোমরা সত্যের সাথে অসত্যের মিশ্রণ ঘটিও না এবং তোমরা জেনে-শুনে সত্য গোপন করো না।” [সূরা বাকারা-৪২]

এ প্রসঙ্গে মহানবি (স.) বলেছেন, “কিয়ামতের দিন আল্লাহর কাছে ঐ ব্যক্তির সম্মান সবচেয়ে নিকৃষ্ট হবে যার অনিষ্টের ভয়ে লোকেরা তাকে পরিত্যাগ করে।” (বুখারি ও মুসলিম)

আমাদের প্রিয়নবি যাবতীয় নিন্দনীয় আচরণ থেকে পবিত্র ছিলেন, তিনি কখনও মিথ্যা কথা বলেন নি। কাউকে তিনি কখনও গালি দেন নি। ওয়াদা ভঙ্গ করেন নি, কারও সাথে প্রতারণা করেন নি।

আমরা রাসূল (স.)-এর এ সকল আদর্শ অনুসরণ করব।

আমাদের প্রতিজ্ঞা—

- আমরা কখনও মিথ্যা কথা বলব না।
- ওয়াদা ভঙ্গ করব না।
- প্রতারণা করব না।
- কারও গিবত করব না।

পাঠ ৯

মিথ্যাচার

মিথ্যা সকল পাপ কাজের জননী। প্রকৃত অবস্থা বা ঘটনাকে বিকৃত করে পরিবেশন করাকে মিথ্যাচার বলে। যে ব্যক্তি মিথ্যাকথা বলে বা প্রকৃত ঘটনাকে বিকৃতি ঘটায় তাকে মিথ্যাবাদী বলে।

মিথ্যা একটি জঘন্যতম অপরাধ। ইহা সকল পাপ কাজের মূল। মিথ্যা থেকে পাপ কাজের সূচনা হয়। প্রতারণা, প্রবঞ্চনা, অন্যের মাল অপহরণ, এ সকল অনৈতিক ও সমাজবিরোধী কর্মের মূলে রয়েছে মিথ্যাচার। যে সমাজে মিথ্যাচার বৃদ্ধি পায় সে সমাজ ক্রমে ক্রমে ধ্বংসের দিকে অগ্রসর হয়।

মিথ্যাচার একটি নিন্দনীয় আচরণ। মিথ্যাবাদীকে কেউ ভালোবাসে না। কেউ বিশ্বাস করে না। বিপদের সময় তাকে কেউ সাহায্য করতে এগিয়ে আসে না। সকলে তাকে ঘৃণা করে। তার কথাকে কেউ গুরুত্ব দেয় না। পরিণামে দুনিয়াতে তার জীবন দুর্বিষহ হয়ে ওঠে। মহান আল্লাহ তা'আলা তার উপর খুব অসন্তুষ্ট হন। আর তাই পরকালে তার স্থান হবে জাহান্নাম।

মহানবি (স.) এ বিষয়ে বলেন –

إِيَّامٌ وَالْكَذِبَ فَإِنَّ الْكُذِبَ يَهْدِي إِلَى الْفُجُورِ وَإِنَّ الْفُجُورَ يَهْدِي إِلَى النَّارِ

অর্থ: “আর তোমরা অবশ্যই মিথ্যা বলা থেকে বিরত থাকবে। কেননা মিথ্যা পাপ কাজের দিকে ধাবিত করে। আর পাপ কাজ জাহান্নামের পথে ধাবিত করে।” (বুখারি ও মুসলিম)

মিথ্যা বর্জন করা কর্তব্য। মিথ্যা পরিত্যাগ করলে সকল পাপ থেকে বাঁচা যায়। মিথ্যাবাদীর কাছ থেকে রহমতের ফেরেশতারাও দূরে সরে যান। মহানবি (স.) বলেছেন, “বান্দা যখন মিথ্যা কথা বলে, ফেরেশতারা তখন এর দুর্গন্ধের কারণে তার থেকে দূরে চলে যান।”

আমাদের প্রিয় নবি (স.) কখনও মিথ্যা কথা বলতেন না। তিনি স্বার্থের পরিপন্থী হলেও কখনও মিথ্যা বা প্রতারণার আশ্রয় নিতেন না।

একবার এক ব্যক্তি মহানবি (স.)-এর কাছে এসে বলল, ‘হে আল্লাহর রাসূল! আমি চুরি করি, মিথ্যা বলি এবং আরও অনেক অন্যায় কাজ করি। এমতাবস্থায় আমি কেমন করে এসব কাজ থেকে মুক্তি পাব?’ রাসূল (স.) বললেন, “তুমি মিথ্যা কথা বলা ছেড়ে দাও।” লোকটি রাসূল (স.)-এর কথা মেনে মিথ্যা পরিত্যাগ করার কারণে পাপ কাজ থেকে বিরত থাকতে সক্ষম হলো।

কাজ : শিক্ষার্থীরা কয়েকটি দলে ভাগ হয়ে সত্যের উপকারিতা এবং মিথ্যার অপকারিতার উপর একটি পোস্টার লিখে শ্রেণিকক্ষে উপস্থাপন করবে।

পাঠ ১০

গিবত বা পরনিন্দা

গিবত একটি সামাজিক অনাচার। কারও অগোচরে তার দোষত্রুটি অন্যের কাছে প্রকাশকে গিবত বলে। একে পরনিন্দাও বলা যায়। গিবত একটি ঘৃণিত ও জঘন্য কাজ। এটি কবির গুনাহ। ইহা থেকে বিরত থাকা প্রত্যেক মুসলমানের কর্তব্য। রাসুল (স.) বলেন, “গিবত কী তা কি তোমরা জান? লোকেরা উত্তরে বললো, আল্লাহ ও তাঁর রাসুলই ভালো জানেন। রাসুল (স.) বললেন, গিবত হলো তোমার ভাইয়ের সম্পর্কে তোমার এমন কথা বলা যা সে অপছন্দ করে। জিজ্ঞাসা করা হলো, আমি যা বলি তা যদি আমার ভাইয়ের মধ্যে থাকে, এটাও কি গিবত হবে? রাসুলুল্লাহ (স.) বললেন, তুমি যা বল তা যদি তার মধ্যে থাকে তাহলেই গিবত হবে। আর তুমি যা বল তা যদি তার মধ্যে না থাকে, তবে তা হবে ‘বুহতান’ বা অপবাদ। (মুসলিম)

গিবত একটি নিন্দনীয় কাজ। গিবতের মাধ্যমে মানুষে মানুষে ঘৃণা ও শত্রুতা সৃষ্টি হয়। এর মাধ্যমে সমাজ জীবনে ঝগড়া-ফ্যাসাদসহ নানা অশান্তি সৃষ্টি হয়।

পবিত্র কুরআনুল কারিমে গিবত করাকে মৃত ভাইয়ের গোসত খাওয়ার সাথে তুলনা করা হয়েছে।

আল্লাহর বাণী :

তোমরা একে অপরের পশ্চাতে নিন্দা করো না। তোমাদের মধ্যে কি কেউ মৃত ভাইয়ের গোসত খেতে চাইবে, নিশ্চয়ই তা তোমরা অপছন্দ করবে। (সূরা হুজুরাত, আয়াত : ১২)

গিবত করার মতো গিবত শোনাও পাপের কাজ। কেউ গিবত করলে তাকে গিবত থেকে বিরত রাখা কর্তব্য। তাহলে গিবতচর্চা সমাজ থেকে ক্রমে ক্রমে হ্রাস পাবে বা দূরীভূত হবে।

সর্বাবস্থায়ই গিবত বা পরনিন্দা হতে মুক্ত হতে হবে। কারণ কোনো অবস্থায়ই গিবত জায়য বা বৈধ নয়। কেউ যদি গিবত করে তবে তার ক্ষতিপূরণ দিতে হবে। যার গিবত করা হয়েছে তার থেকে অবশ্যই মাফ করিয়ে নিতে হবে। আর যদি সে মারা যায়, তার থেকে ক্ষমা চাওয়া সম্ভব না হয়, তবে আল্লাহর নিকট তার গুনাহু মাফের দোয়া করতে হবে। রাসুল (স.) বলেন, নিঃসন্দেহে গিবতের একটি ক্ষতিপূরণ হলো, তুমি যার গিবত বা কুৎসা রটনা করেছ তার জন্য এভাবে দোয়া করবে: হে আল্লাহ! তুমি আমার ও তার গুনাহু মাফ করে দাও।

এক মুসলমানের সম্পদ, জীবন ও সম্মান অপর মুসলমানের কাছে পবিত্র আমানত। গিবত অপর মুসলমান ভাইয়ের সম্মান নষ্ট করে বিধায় এটি ইসলামে হারাম।

গিবত ব্যভিচার থেকেও অধিকতর অপরাধ। রাসুল (স.) বলেছেন, “গিবত বা পরনিন্দা ব্যভিচার অপেক্ষাও গুরুতর অপরাধ।” (আল মুজাম্মুল আওশত)

কাজ : শিক্ষার্থীরা দলে বিভক্ত হয়ে কী কী কাজ গিবত বা পরনিন্দার মধ্যে পড়ে, তার একটি চার্ট তৈরি করে শ্রেণিতে উপস্থাপন করবে।

পাঠ ১১

গালি দেওয়া

কাউকে মন্দ নামে ডাকা, মন্দ কথা বলা, তিরস্কার করা, অশালীন বা অশ্লীল কথা বলা হলো গালি দেওয়া। কারও সম্পর্কে এরূপ বাক্য ব্যবহার করা যাতে তার হীনতা ও ঘৃণা প্রকাশ পায় তাও গালিস্বরূপ। কাউকে গালি দেওয়া বা মন্দ নামে ডাকা নিন্দনীয় কাজ। পবিত্র কুরআনে এ সম্পর্কে বলা হয়েছে, “ইমানের পর মন্দ নামে ডাকা গর্হিত কাজ।” (সুরা হুজুরাত, আয়াত-১১)

মানুষ সভ্যজাতি, তারা কাউকে গালি দিবে না। সমাজে একত্রে বসবাস করতে হলে পরস্পরের সাথে মতের অমিল থাকতে পারে। একে অপরের সাথে ভুল বুঝাবুঝিও হতে পারে। একের সাথে অন্যের কথা কাটাকাটি হতে পারে। কিন্তু তাতে একে অন্যকে অশালীন বা অশ্লীল কথা বলে গালি দেওয়া উচিত নয়। অশালীন কথা বলা নিতান্তই খারাপ কাজ। যে গালি দেয়, অশালীন কথা বলে, সে সমাজে ঘৃণিত। তাকে মানুষ পছন্দ করে না। সমাজে তার কোনো সমাদর থাকে না। তার সাথে কেউ বন্ধুত্বের সম্পর্ক স্থাপন করে না।

আমাদের প্রিয়নবি হযরত মুহাম্মদ (স.) গালি দিতে বা গালিগালাজ করতে নিষেধ করেছেন। তিনি বলেন—

سَبَابُ الْمُسْلِمِ فُسُوقٌ وَقِتَالُهُ كُفْرٌ

অর্থ : মুসলমানদের গালি দেওয়া পাপ এবং হত্যা করা কুফরি। (বুখারি ও মুসলিম)

কেউ যদি গালি দেয় তবে তার উত্তরে গালি দেয়া উচিত নয়।

একবার মহানবির কাছে এক ব্যক্তি এসে জিজ্ঞেস করলেন, “হে আল্লাহর রাসুল আমাকে আমার সম্প্রদায়ের এমন এক ব্যক্তি গালি দেয় যে আমার থেকে নীচু। এর প্রতিশোধ নিতে আমার কোনো বাধা আছে কি” রাসুল (স.) তাকে বললেন, “পরস্পর গালমন্দকারী উভয়েই শয়তান। তারা পরস্পরকে মিথ্যাবাদী বলে এবং একে অপরের দোষারোপ করে।” (বুখারি ও মুসলিম)

গালি সম্পর্কে আরও বলেছেন, পিতামাতাকে গালি দেওয়া মহাপাপ। সাহাবিগণ বললেন, “হে আল্লাহর রাসুল এমন কোনো নরাধম আছে যে আপন পিতামাতাকে গালি দেয়?” তিনি বললেন, “যে অপরের পিতামাতাকে গালি দেয় এবং অপরও তার পিতামাতাকে গালি দেয়।” (বুখারি ও মুসলিম)

হাদিস থেকে এটাই প্রমাণিত হয় যে, অন্যের পিতামাতাকে গালি দেয়া মানে নিজের পিতামাতাকে গালি দেওয়া। সমাজ গালিমুক্ত করতে গালির উত্তরে গালি দিব না, এতে গালমন্দকারী লজ্জিত ও অনুতপ্ত হবে। গালমন্দ ভালো কাজ নয়, গালমন্দের ন্যায় অশালীন কাজ হতে আমরা বিরত থাকব।

কাজ : শ্রেণিকক্ষে শিক্ষার্থীরা কয়েকটি ভাগ হয়ে গালির ক্ষতিকারক বা কুফলগুলোর একটি তালিকা তৈরি করবে।

পাঠ ১২

ধূমপান ও মাদকাসক্তি

এই অপরূপ সুন্দর পৃথিবীতে মানুষকে আল্লাহ সৃষ্টির সেরা হিসাবে সৃষ্টি করেছেন। মানুষের কল্যাণের জন্য পৃথিবীর যাবতীয় বস্তু সৃষ্টি করেছেন। তবে এর মধ্যে কিছু কিছু বস্তু মানুষের খাদ্য হিসাবে বৈধ বা হালাল করেছেন। আর যা মানুষের খাদ্য হিসাবে কল্যাণকর নয় তা অবৈধ ও হারাম করেছেন। এ প্রসঙ্গে আল্লাহর বাণী, “তোমরা উত্তম ও পবিত্র জিনিস খাও, যা আমি রিযিক হিসাবে দান করেছি।”

খাদ্য গ্রহণে আল্লাহ ও তার রাসুলের বিধিনিষেধ থাকে সত্ত্বেও মানুষ অসৎ সজ ও কুপ্ররোচনায় নানা ধরনের ক্ষতিকর, হারাম বা নিষিদ্ধ বস্তুর প্রতি আকৃষ্ট হয়। এতে তার নিজের, পরিবারের ও সমাজের বিরাট ক্ষতি হয়।

মাদকাসক্তি ও ধূমপান মানুষের জন্য ক্ষতিকর। এগুলো নেশাজাতীয় দ্রব্য। তাই এগুলো নিষিদ্ধ। এ প্রসঙ্গে রাসুল (স.) বলেছেন,

هَلَّا مُسْكِرٌ خَمْرٌ وَعَلَىٰ خَمْرٍ حَرَامٌ

অর্থ : “নেশাজাতীয় যেকোনো দ্রব্য মদ, আর যাবতীয় মদই হারাম।” (সহি মুসলিম)

ধূমপান

মানুষের ক্ষতিকর বদঅভ্যাসগুলোর মধ্যে ধূমপান অন্যতম। ছুঁকা, বিড়ি, চুয়ুট, সিগারেট, ধূমপানের মধ্যে পড়ে। এতে যেমন শারীরিক ক্ষতি হয় তেমনি অর্থেরও অপচয় হয়। অপব্যয়কারীকে আল্লাহ পছন্দ করেন না। অপব্যয়কারীকে আল্লাহ তা'আলা শয়তানের তাই বলে আখ্যা দিয়েছেন।

মহান আল্লাহ ঘোষণা করেছেন-

إِنَّ الْمُبْدِرِينَ كَانُوا إِخْوَانَ الشَّيَاطِينِ ط

অর্থ : নিশ্চয়ই অপব্যয়কারী শয়তানের ভাই। (বনি- ইসরাইল, আয়াত ২৭)

আল্লাহ আরও বলেছেন, “নিশ্চয়ই আল্লাহ তা'আলা অপব্যয়কারীকে ভালোবাসেন না।” ‘ধূম’ কোনো খাবারের মধ্যে পড়ে না। এটি ক্ষুধা বা তৃষ্ণাও মেটায় না। এর দ্বারা কোনো উপকার হয় না বরং এটা মারাত্মক শারীরিক ক্ষতিসাধন করে এবং এর দ্বারা প্রচুর অর্থের অপচয় হয়। এ অপব্যয় মেটাতে ধূমপায়ীরা নিজেদের পরিবারে অর্থের সংকট ঘটায়। আত্মীয়স্বজনের সাথে অসদাচরণ করে। এ অপব্যয়ের অর্থ সংকুলানের জন্য নানা ধরনের অবৈধ পথে পা বাড়ায়। ফলে সামাজিক অনাচার সৃষ্টি হয়। সমাজে অপরাধ প্রবণতা বেড়ে যায়। ধূমপানের আর একটি ক্ষতির দিক হলো এটা খুব খারাপ গন্ধ ছড়ায়, যা অপরের জন্য ক্ষতিকর। এটা মানবাধিকারেরও পরিপন্থী।

মহানবি (স.) বলেছেন , “মুখে দুর্গন্ধ নিয়ে যেন কেউ মসজিদে না যায় ।”

মুখে দুর্গন্ধ থাকলে মসজিদে অন্য নামাযির কষ্ট হয় । এমনভাবে যানবাহনে ও সভা-সমিতিতে অন্য মানুষ ধূমপায়ীদের মাধ্যমে কষ্ট পায় যা ইসলামে অবৈধ করেছে ।

বিশেষজ্ঞরা বলেন, “ধূমপানে বিষপান ।” কারণ এতে বিষ আছে । নিকোটিন জাতীয় বিষ যা ধীরে ধীরে মানুষকে মৃত্যুর দ্বারে পৌঁছে দেয় । ধূমপানের ফলে মানুষের শরীরে নানা রকমের অসুবিধার সৃষ্টি হয় । যেমন নিউমোনিয়া, শ্বাসকষ্ট, ব্রংকাইটিস, যক্ষ্মা, ফুসফুসের ক্যান্সার, গ্যাস্ট্রিক, ক্ষুধামন্দা, হৃদরোগ প্রভৃতি । ধূমপান পরিবেশকে নষ্ট করে । ধূমপানের সংস্পর্শে যারা আসে- মহিলা, শিশু, অধূমপায়ী সকলেই ক্ষতিগ্রস্ত হয় । পরীক্ষা করে দেখা গেছে দুটি সিগারেটে যে পরিমাণ নিকোটিন থাকে তা যদি কোনো মানুষের শরীরে ইনজেকশন দিয়ে ঢুকিয়ে দেয়া হয় তবে সে অবশ্যই মারা যাবে ।

ধূমপানের ফলে ইবাদতেও বিঘ্ন সৃষ্টি হয় । ধূমপায়ীর মুখের দুর্গন্ধে মুসল্লিদের ইবাদতেও বিঘ্ন সৃষ্টি হয় ।

মাদকাসক্তি

সাধারণত যে সকল খাদ্যবস্তু বা পানীয় মস্তিষ্কে বিকৃতি ঘটায়, জ্ঞান-বুদ্ধি লোপ করে দেয়, দেহ ও মনে বিরূপ প্রতিক্রিয়া সৃষ্টি করে, সেগুলো গ্রহণ করাকে মাদকাসক্তি বলে । মাদকাসক্তি একটি জঘন্য বদঅভ্যাস । এ সম্পর্কে মহানবি (স.) বলেছেন-

الْخَمْرُ كَثِيرَةٌ الْعَقْلُ

অর্থ : “যা জ্ঞান-বুদ্ধি লোপ করে দেয় তা মাদকদ্রব্য ।”

মহানবি (স.) আরও ঘোষণা করেন -

مَا أَسْكَرَ كَثِيرَةٌ فَقَلِيلُهُ حَرَامٌ

অর্থ : “যেই বস্তুর বেশি পরিমাণের মধ্যে মাদকাসক্তির কারণ রয়েছে, তার অল্প পরিমাণও হারাম ।”

নেশা সৃষ্টিকারী বস্তুগুলোর মধ্যে রয়েছে মদ, তাড়ি, আফিম, গাঁজা, ভাং, চরস, হাশিশ, মারিজুয়ানা, হেরোইন, মরফিন, কোকেন, প্যাথেড্রিন, সঞ্জীবনী সুরা, বিভিন্ন প্রকার এ্যালকোহল ইত্যাদি । ঔষধ হিসাবে এগুলোর কিছু কিছু ব্যবহার করা হয় । তবে নেশার উদ্দেশ্যে ব্যবহার করা নিষিদ্ধ ।

মহান আল্লাহ বলেছেন : “নিশ্চয়ই মদ, জুয়া, মূর্তিজুজা, ভাগ্য নির্ণয়ক তীর, অপবিত্র শয়তানের কাজ । তোমরা এসব থেকে দূরে থাকো । আশা করা যায় তোমরা সফলতা লাভ করবে ।” (সুরা আলমায়িদা, আয়াত : ৯০)

মাদক দ্রব্যের কুফল মানবজীবনে মারাত্মক বিপজ্জনক । যদিও সাময়িকভাবে মাদক আনন্দ দেয় বা শক্তি দেয় । কিন্তু এর ক্ষতিকর দিক খুবই সুদূরবিস্তৃত ও সর্বগ্রাসী । এ নেশার ফলে ব্যক্তি চুরি, ডাকাতি, ছিনতাই, মারামারি, হত্যাসহ নানা প্রকার সামাজিক অপরাধে জড়িয়ে পড়ে । এছাড়াও মাদকাসক্ত ব্যক্তি অপুষ্টি, বুচিহীনতা, শারীরিক শীর্ণতা, লিভার ও কিডনি নষ্ট, ওজন কমে যাওয়া, শ্বাসনালির ক্ষতি প্রভৃতি সমস্যায় ভোগে । কফ, কাশি, যক্ষ্মা ইত্যাদি রোগে দ্রুত

আক্রান্ত হয়।

মাদকাসক্তব্যক্তি নামায, রোযা এবং যাবতীয় ইবাদতের ব্যাপারে উদাসীন থাকে। সে সবসময় অসুস্থ থাকে। মাদকের নেশা তাদেরকে আল্লাহর স্মরণ থেকে দূরে রাখে, আর তাই তারা পরকালে মহাশাস্তি ভোগ করবে। মহানবি (স.) বলেছেন,

“মাদকাসক্ত ব্যক্তি জান্নাতে প্রবেশ করবে না।” (দারিমি)

কাজ : শিক্ষার্থীরা শ্রেণিকক্ষের বোর্ডে ধূমপানের অপকারিতাগুলোর একটি তালিকা তৈরি করবে।

অনুশীলনমূলক প্রশ্ন

শূন্যস্থান পূরণ কর :

- ১ . মহান আল্লাহ মানুষকে অসংখ্য দান করেছেন।
- ২ সাথে সম্পর্কিত ব্যক্তিকে আত্মীয় বলে।
- ৩ . মিথ্যা থেকে কাজের সূচনা হয়।
- ৪ . গিবতের মাধ্যমে মানুষের মাঝে ও সৃষ্টি হয়।
- ৫ . মুখে দুর্গন্ধ থাকলে অন্য নামাযির কষ্ট হয়।

বাম পাশ থেকে শব্দ বা বাক্যাংশ নিয়ে ডান পাশের সাথে মিল কর :

বাম পাশ	ডান পাশ
১ . যে সত্য কথা বলে	সন্তানের জন্য ওয়াজিব বা কর্তব্য
২ . পিতা-মাতার আদেশ নির্দেশ পালন করা	প্রতিবেশী
৩ . যে ব্যক্তি কামনা করে যে তার জীবন ও আয়ু বৃদ্ধি পাক	নিন্দনীয় কাজ
৪ . সামনে পিছে ডানে বামে চল্লিশ ঘর পর্যন্ত	সে যেন আত্মীয়দের সাথে সুন্দর আচরণ করে
৫ . গিবত একটি	তাকে সবাই ভালোবাসে ও সম্মান করে

সংক্ষিপ্ত উত্তর প্রশ্ন :

১. আখলাক বলতে কী বুঝ ?
২. গিবত বলতে কী বুঝ ?
৩. আত্মীয়স্বজনের অধিকার বলতে কী বোঝায় ?

বর্ণনামূলক প্রশ্ন :

১. সত্যবাদিতার একটি বাস্তব ঘটনা বর্ণনা কর ।
২. পিতা-মাতার অধিকারের উপর একটি নাতিদীর্ঘ রচনা লেখ ।
৩. ধূমপান ও মাদকাসক্তির কুফল বর্ণনা কর ।

বহুনির্বাচনি প্রশ্ন :

১. 'সিদ্ক' শব্দের অর্থ কী ?
ক) সাধুতা খ) সত্যবাদিতা
গ) যুক্তি ঘ) চরিত্র
২. 'আখলাকে যামিমা' হচ্ছে—
i. বড়দের শ্রদ্ধা করা
ii. কথা দিয়ে না রাখা
iii. কারো অনুপস্থিতিতে সমালোচনা করা

কোনটি সঠিক ?

- ক) i, ii
- খ) i, iii
- গ) ii, iii
- ঘ) i, iii

৩. সকল পাপের মূল কী ?

- ক. মিথ্যা খ. ধোঁকা
- গ. প্রতারণা ঘ. গিবত

৪. আখলাক কত প্রকার ?

- ক) দুই খ) তিন
- গ) চার ঘ) পাঁচ

নিচের অনুচ্ছেদটি পড় এবং ৫ ও ৬ নম্বর প্রশ্নের উত্তর দাও :

নাবিল ও জামিল সহপাঠী। জামিল অন্য সহপাঠীর মাধ্যমে জানতে পারল, নাবিল তার ঘড়িটি নিয়ে গেছে। নাবিলকে বিষয়টি জিজ্ঞেস করলে সে অস্বীকার করল।

৫. নাবিলের কাজটি কীসের অন্তর্ভুক্ত ?

- ক) ধ্বংসের খ) মিথ্যার
গ) গিবতের ঘ) চুরির

৬. নাবিল পরকালে লাভ করবে –

- i. জান্নাত ii. আরাফ iii). জাহান্নাম

কোনটি সঠিক ?

- ক) i খ) ii
গ) iii ঘ) i, ii, iii

সৃজনশীল প্রশ্ন

১। রাশেদের খালাতো ভাই মুরশেদ ও পাশের বাসার মাহমুদ ঢাকায় একই বাসায় থেকে ব্যবসা করেন। রাশেদের মা অসুস্থ হয়ে ঢাকা মেডিকেল হাসপাতালে ভর্তি হলো। অন্য লোকের সাহায্য-সহযোগিতা পাওয়া গেলেও মুরশেদ ও মাহমুদ কোনো খোঁজখবর নেয় নি।

- ক) 'আখলাকে হামিদা' অর্থ কী ?
খ) প্রতিবেশীর অধিকার বলতে কী বোঝায় ?
গ) মুরশেদের আচরণে কার অধিকার পালন হয় নি ? ব্যাখ্যা কর।
ঘ) মুরশেদের আচরণের পরিণতি ইসলামের দৃষ্টিতে আলোচনা কর।

২।



উপরোক্ত বয়স্ক পুনর্বাসন কেন্দ্রের প্রতিষ্ঠাতা বলেন, "বৃদ্ধাশ্রমে আশ্রিত অসহায় বয়স্ক মানুষদের কয়েকজনের মৃত্যুর খবর তাঁর সন্তানদের জানালেও তারা মা-বাবার মুখটা পর্যন্ত দেখতে আসে নি।"

সূত্র : দৈনিক কালের কণ্ঠ, ১৩ জুন ২০১২

ক. আখলাক শব্দের অর্থ কী ?

খ. 'সত্য মানুষকে মুক্তি দেয়' কথাটি বুঝিয়ে লেখ।

গ. উপরোক্ত বয়স্কদের প্রতি সন্তানদের আচরণে কী প্রকাশ পেয়েছে ? ব্যাখ্যা কর।

ঘ. উদ্দীপকে বর্ণিত বয়স্কদের প্রতি তাদের সন্তানদের আচরণের পরিণতি ইসলামের আলোকে বিশ্লেষণ কর।

পঞ্চম অধ্যায়

আদর্শ জীবন চরিত

আদর্শ জীবন বলতে বোঝায় যে জীবন অনুসরণ করলে জীবন সুন্দর ও সুগঠিত হয়। পৃথিবীতে এমন অনেক মহৎ ব্যক্তির আবির্ভাব ঘটেছে যাদের জীবন চরিত অন্যের জন্য আদর্শ। সুতরাং বাস্তব জীবনে এসব মনীষীর সমাজ সেবামূলক কাজ, অসাম্প্রদায়িক দৃষ্টিভঙ্গি, আত্মত্যাগ, ক্ষমা, পরমতসহিষ্ণুতা ও দেশপ্রেমসহ অন্যান্য গুণাবলি অনুসরণ ও অনুকরণ করলে সুন্দর সুশৃংখল ও সফল জীবন লাভ করা যায়।

এ অধ্যায় শেষে শিক্ষার্থী

- আদর্শ জীবন চরিতের বৈশিষ্ট্য ব্যাখ্যা করতে পারবে।
- ইসলামি মনীষীগণের জীবন চরিত বর্ণনা করতে পারবে।
- নির্বাচিত মনীষীগণের জীবন চরিতে প্রস্তুতি সমাজসেবা, সাম্য, গণতান্ত্রিক মূল্যবোধ, ভ্রাতৃত্ববোধ, সহমর্মিতা, পরমতসহিষ্ণুতা, সৌহার্দ্য, বিশ্বস্ততা, মানবিকতা, আধ্যাত্মিকতা, ত্যাগ, ক্ষমা, অসাম্প্রদায়িক দৃষ্টিভঙ্গি, ন্যায়বিচার, দানশীলতা, পরোপকারিতা, দেশপ্রেম, সুশাসন প্রতিষ্ঠা ইত্যাদি গুণাবলি, তাঁদের অবদান ও শিক্ষা ব্যাখ্যা করতে পারবে।

পাঠ ১

হযরত মুহাম্মদ (স.)-এর জীবনাদর্শ

আরবের অবস্থা

তাঁর জন্মের সময় আরবের সামাজিক অবস্থা ছিল ভয়াবহ ও জঘন্য। আরবের লোকেরা ছিল নানা পাপে লিপ্ত। মারামারি, কাটাকাটি, ঝগড়া-বিবাদ, চুরি, ডাকাতি, হত্যা, লুণ্ঠন, দুর্নীতি ও অরাজকতা করে তাদের জীবন চলত। তারা এক আল্লাহর পরিবর্তে বিভিন্ন দেবদেবীর পূজা করত। সমগ্র আরবদেশে বর্বরতা ও প্রকৃতি পূজায় নিমজ্জিত ছিল। কাব্যচর্চা, গান ও বাগ্মীতায় অগ্রসর থাকলেও নৈতিক চরিত্রে আরব সমাজ পিছিয়ে পড়েছিল। হাটে-বাজারে পণ্যের মত মানুষ বেচাকেনা হত। এদের জীবন-মৃত্যু মনিবের খেয়াল-খুশির ওপর নির্ভর করত। মনিবেরা এদের প্রতি অমানুষিক নির্যাতন চালাত। সাধারণভাবে নারীদের অবস্থা ছিল খুবই করুণ, ব্যতিক্রম ছাড়া। নারীদের কোনো সামাজিক মর্যাদা বা অধিকার ছিল না। এমনকি সে সময় জীবন্ত মেয়ে শিশুদের গর্তে ফেলে মাটি চাপা দেওয়া হত। এরূপ অবস্থায় আল্লাহ তা'আলা মানুষকে সঠিক পথে পরিচালিত করার জন্য হযরত মুহাম্মদ (স.) কে পাঠান। তাঁর আগেও পৃথিবীতে আরও অনেক নবি-রাসূল এসেছেন। আমাদের নবি হলেন সর্বশেষ নবি। সকল নবির সেরা নবি, বিশ্বনবি।

জন্ম ও পরিচয়

হযরত মুহাম্মদ (স.) আমাদের প্রিয় নবি। তিনি ৫৭০ খ্রিস্টাব্দের ২০শে এপ্রিল রবিউল আউয়াল মাসের ১২ তারিখ সোমবার মক্কায় জন্মলাভ করেন। তাঁর পিতার নাম আব্দুল্লাহ এবং মাতার নাম আমিনা। তিনি মাতৃগর্ভে থাকতেই তাঁর পিতা আব্দুল্লাহ মৃত্যুবরণ করেন। জন্মলাভের পর তাঁর নাম রাখা হয় মুহাম্মদ ও আহমদ।

মহানবির চারিত্রিক বৈশিষ্ট্য ও পাদ্রি বুহাইরার ভবিষ্যৎবাণী

আরবদের বনু সা'দ গোত্রের মেয়ে ধাত্রী হালিমার ওপর শিশু মুহাম্মদের লালন-পালনের দায়িত্ব পড়ে। তিনি পাঁচ বছর বয়স পর্যন্ত তাঁকে নিজের সন্তানের মতো স্নেহ-মমতায় লালন-পালন করেন। এরপর মুহাম্মদ (স) মা আমিনার কোলে ফিরে আসেন। তিনি মা আমিনার সীমাহীন আদর-যত্নে বড় হতে লাগলেন। কিন্তু তাঁর কপালে এ আদরও বেশিদিন জুটল না। তাঁর মাও মৃত্যুবরণ করেন। তখন তাঁর বয়স ছিল মাত্র ছয় বছর। অল্প বয়সেই তিনি পিতা-মাতা উভয়কে হারিয়ে ইয়াতিম হয়ে যান। বিশ্বের বুকে তিনি তখন একা, নিঃসঙ্গ ও অসহায় বালক। উম্মে আয়মান নামক একজন পরিচারিকা তাঁকে দাদা আব্দুল মুত্তালিবের হাতে তুলে দেন। দাদা অত্যন্ত আদর যত্নে তাঁকে লালন-পালন করতে থাকেন। তাঁর বয়স যখন আট বছর তখন দাদাও তাকে ছেড়ে পরলোকগমন করেন। এবার তিনি চাচা আবু তালিবের হাতে বড় হতে থাকেন। চাচার সংসারে ছিল অভাব-অনটন। তিনি চাচার ব্যবসায়িক কাজে সহযোগিতা করতেন ও মেস চড়াতে। চারিত্রিক সকল ভালো গুণাগুণ তাঁর মধ্যে পরিলক্ষিত হয়। তিনি অহংকার, অপব্যয়, অর্থহীন ও অনৈতিক কথা থেকে নিজেকে মুক্ত রাখতেন এবং তিনি অন্যের দোষ খোঁজ ও কাউকে লজ্জা দেয়া থেকেও বিরত থাকতেন। সর্বদা মানুষের সাথে হাশিখুশি কথা বলতেন। অন্যের ব্যথায় ব্যথিত হতেন। মানবতার কল্যাণে নিজের সম্পদ অকাতরে ব্যয় করতেন। তিনি ছিলেন সত্যবাদী। তাঁকে আপন-পর সকলেই আল-আমিন (বিশ্বাসী) উপাধিতে ভূষিত করেন। এককথায় তিনি পৃথিবীর সকল প্রাণী ও জীবজন্তুর উপকারী বন্ধু ছিলেন।

হযরত মুহাম্মদ (স.)-এর বয়স যখন ১২ বছর দু'মাস ১০ দিন তখন চাচা আবু তালিবের সাথে ব্যবসার উদ্দেশ্যে সিরিয়া রওয়ানা হলেন। তিনি বসরায় পৌঁছলে বুহাইরা (জারজিস) নামক একজন খ্রিস্টান পাদ্রির সাথে দেখা হয়। তিনি মুহাম্মদ (স.)-কে চিনতে পেরে ইনিই শেষ জামানার নবি ও সর্বশ্রেষ্ঠ রাসূল। পাদ্রি আবু তালিবকে বলেন, ওকে মক্কায় ফেরৎ পাঠিয়ে দিন, ইহুদীরা তাঁর ক্ষতি করতে পারে। এ পরামর্শ অনুযায়ী চাচা আবু তালিব কয়েকজন ভৃত্যের সঙ্গে প্রিয় ভাজিকাকে মক্কায় পাঠিয়ে দেন।

শান্তি প্রতিষ্ঠায় মহানবি (স.)

ওকাজ মেলায় জুয়া খেলাকে কেন্দ্র করে ফিজার যুদ্ধ শুরু হয়। তা একটানা পাঁচ বছর চলতে থাকে। এতে অনেক লোকের প্রাণহানি ঘটে। মহানবি (স.) এসব হানাহানি ও রক্তরক্তি অবস্থা দেখে ব্যথিত হলেন। কীভাবে শান্তি প্রতিষ্ঠা করা যায়, তা নিয়ে চিন্তা করতে লাগলেন। অবশেষে তিনি শান্তিকামী কয়েকজন যুবককে নিয়ে 'হিলফুল ফুযুল' নামে একটি শান্তিসংঘ গঠন করেন। এর মাধ্যমে তিনি তৎকালীন আরবের চলমান হিংসা-বিদ্বেষ, মারামারি ও হানাহানি বন্ধ করতে আশ্রয় চেষ্টা করেন। তাঁর এ প্রচেষ্টার ফলে সমাজে কিছুটা শান্তি ফিরে আসে। সকল মানুষের মধ্যে পারস্পরিক ভ্রাতৃত্ব ও গোত্রে গোত্রে সম্প্রীতি ও তাঁর সুখ্যাতি চারদিকে ছড়িয়ে পড়ে। ফলে আপন-পর সকলেই তাঁকে আল-আমিন (বিশ্বাসী) উপাধিতে ভূষিত করেন।

কুরাইশগণ বছদিনের পুরাতন কাবা ঘর সংস্কারের কাজ হাতে নিল। কাবা ঘর সংস্কারের কাজ সমাপ্ত হলো। কিন্তু পবিত্র হাজরে আসওয়াদ (কালো পাথর) স্থাপন করা নিয়ে তাঁদের মধ্যে ঝগড়ার সৃষ্টি হলো। এ ঝগড়া বিভিন্ন গোত্রে গোত্রে ছড়িয়ে পড়ল। প্রত্যেকেই এ পাথর স্থাপনের মত মহৎ কাজের অংশীদার হতে চাইল। কেউ ছাড় দিতে রাজি হলো না। তাই গোত্রসমূহের মধ্যে যুদ্ধের প্রস্তুতি শুরু হলো। অবশেষে সিদ্ধান্ত হলো আগামী দিন সকাল বেলা সবার আগে যিনি কাবা ঘরে প্রবেশ করবেন তিনিই এ বিবাদ মীমাংসা করবেন। তিনি যা সিদ্ধান্ত দিবেন সকলেই তা মেনে নিবে।

সকাল বেলা দেখা গেল হযরত মুহাম্মদ (স.) সবার আগে কাবা ঘরে প্রবেশ করেছেন। এটা দেখে সকলেই আনন্দ প্রকাশ করল এবং বলে উঠল, "আল-আমিন" এসেছেন, সঠিক সিদ্ধান্ত হবে। হযরত মুহাম্মদ (স.) একখানা চাদর

বিছিয়ে নিজ হাতে পাথরটি চাদরের মাঝখানে রাখলেন। তারপর সকল গোত্রের সরদারকে ডেকে চাদর ধরতে বললেন। তারা সকলে মিলে চাদরটি বহন করে যথাস্থানে নিয়ে গেল, হযরত মুহাম্মদ (স.) নিজ হাতে পাথরখানা কাবার দেয়ালে বসিয়ে দিলেন। ফলে জাতি একটি ভয়াবহ যুদ্ধ হতে বেঁচে গেল এবং সকলে পাথরটি বহনের সম্মান পেয়ে খুশি হলেন।

নবুয়ত প্রাপ্তি ও আরবের লোকদের প্রতিক্রিয়া

হযরত মুহাম্মদ (স.) শৈশবকাল হতেই মানুষের মুক্তি ও শান্তির কথা ভাবতেন। যুবক বয়সে তাঁর এ ভাবনা আরও গভীর হতে থাকে। হযরত খাদিজা (রা)-এর সাথে বিবাহের পর তিনি সাধনা ও ধ্যান আরও বাড়িয়ে দেন। তিনি মক্কার অদূরে হেরা গুহায় গভীর ধ্যানে মগ্ন থাকতেন। তিনি সর্বদা চিন্তা করতেন, কীভাবে মানব জাতিকে মূর্তিপূজা, অগ্নিপূজা ও শিরক হতে মুক্ত করবেন ও এক আল্লাহর পথে নিয়ে আসবেন। এভাবে তিনি হেরা গুহায় একটানা ১৫ বছর ধ্যান-মগ্ন থাকেন। অবশেষে ৪০ বছর বয়সে ৬১০ খ্রিস্টাব্দে পবিত্র রমযান মাসের ২৭ তারিখ নবুয়ত লাভ করেন।

নবুয়ত লাভের পর তিনি লোকদেরকে এক আল্লাহর প্রতি দাওয়াত দেন। মক্কার কাফিররা তাতে বাধা দেয়। তাই তিনি গোপনে ইসলামের পথে দাওয়াতের কাজ চালিয়ে যান। আরবের প্রভাবশালী মহল সবসময় তাঁর কাজের বিরোধিতা করতে থাকে। তারা হযরত মুহাম্মদ (স.) ও তাঁর অনুসারীদের নানাভাবে নির্যাতন করতে থাকে। হযরত মুহাম্মদ (স.) অত্যন্ত ধৈর্যসহকারে তাদের অত্যাচার সহ্য করেন এবং নীরবে এক আল্লাহর আনুগত্য ও ইবাদতের প্রতি মানুষকে আহ্বান করতে থাকেন। হযরত মুহাম্মদ (স.) আরব সমাজের কুসংস্কার দূর করে সমাজে শান্তি প্রতিষ্ঠা করেন।

পাঠ ২

হযরত আবু বকর (রা)-এর জীবনাদর্শ

পরিচয়

হযরত আবু বকর (রা) ছিলেন ইসলামের প্রথম খলিফা। তিনি মক্কার প্রসিদ্ধ কুরাইশ বংশের তামিম গোত্রে ৫৭৩ খ্রিস্টাব্দে জন্মগ্রহণ করেন। তাঁর বাল্য নাম আব্দুল্লাহ, উপাধি সিদ্দিক ও আতিক। পিতার নাম ওসমান, ডাকনাম আবু কুহাফা এবং মাতার নাম সালমা, ডাকনাম উম্মুল খায়র। তাঁরা হযরত মুহাম্মদ (স.)-এর হাতে ইসলাম গ্রহণ করেন। হযরত আবু বকর (রা) ছিলেন বয়সের দিক থেকে হযরত মুহাম্মদ (স.)-এর চেয়ে তিন বছরের ছোট। মহানবি (স.)-এর প্রায় সমবয়সী হওয়ায় হযরত আবু বকর (রা)-এর সাথে তাঁর গভীর বন্ধুত্ব ছিল। তিনি উম্মুল মোমেনিন হযরত আয়েশা (রা)-এর পিতা ও হযরত মুহাম্মদ (স.)-এর শ্বশুর।

ইসলাম গ্রহণ

পুরুষদের মধ্যে সর্বপ্রথম ইসলাম গ্রহণ করেন হযরত আবু বকর (রা)। তিনি রাসূল (স.)-কে খুব বিশ্বাস করতেন। একদা তিনি ব্যবসার উদ্দেশ্যে ইয়ামেনে গমন করেন। মক্কায় ফিরে শুনলেন হযরত মুহাম্মদ (স.) নবি দাবি করছেন এবং ইসলাম ধর্ম প্রচার করছেন। তিনি রাসূল (স.)-এর দরবারে হাজির হয়ে কালেমায়ে শাহাদাত পাঠ করে ইসলাম গ্রহণ করেন।

চরিত্র ও গুণাবলি

হযরত আবু বকর (রা) ছিলেন স্বল্পভাষী, সাহসী, ধৈর্যশীল, বিচক্ষণ ও দূরদর্শী। হযরত মুহাম্মদ (স.)-এর প্রতি ছিল তার অটল বিশ্বাস। রাসূল (স.)-এর মে'রাজের (উর্ধ্বগমন) ঘটনা অকপটে একমাত্র তিনিই বিশ্বাস করেন। তাই তিনি সিদ্দিক উপাধিতে ভূষিত হন। সততা, ধর্মভীরুতা ও বদান্যতার ক্ষেত্রে তিনি ছিলেন অদ্বিতীয়। দুঃখী ও আতের সেবায় তিনি নিজেকে উৎসর্গ করেন। এজন্য তিনি আরব সমাজে অত্যন্ত প্রভাবশালী ও মর্যাদাবান ব্যক্তি হিসেবে পরিচিত ছিলেন।

তিনি ছিলেন নম্র ও ভদ্র প্রকৃতির লোক। কুরআন পাঠের সময় তাঁর দু'চোখ দিয়ে অশ্রু ঝরতো। ইসলামের সেবায় হযরত আবু বকর সিদ্দিক (রা)-এর দান অতুলনীয়। তিনি ইসলামের জন্য তাঁর সর্বস্ব বিলিয়ে দিয়েছিলেন। মসজিদে নববি ও হযরত মুহাম্মদ (স.)-এর বাসগৃহ নির্মাণ এবং তারুক অভিযানে তিনি অর্থ ব্যয় করেন। তিনি হযরত বেলাল (রা)-সহ অসংখ্য ক্রীতদাসকে ক্রয় করে স্বাধীন ও মুক্ত করে দেন।

ইসলাম প্রচার

ইসলাম গ্রহণের পর হযরত আবু বকর সিদ্দিক (রা) রাসূল (স.)-এর সাথে ইসলাম প্রচারের কাজে নিয়োজিত হন। মক্কার আশেপাশের গোত্রে তিনি ইসলামের দাওয়াত দেন। হজের মৌসুমে বিভিন্ন তাঁবুতে গিয়েও তিনি ইসলামের প্রতি লোকদের আহ্বান করেন। তাঁর ব্যক্তিগত প্রচেষ্টায় কুরাইশ বংশের বিশিষ্ট যুবক ওসমান (রা), যুবাই (রা), আব্দুর রহমান বিন আউফ (রা), সা'দ (রা), ড্বালহা (রা)-এর মত আরও অনেক সাহাবি ইসলাম গ্রহণ করেন।

মদিনায় হিজরত

হযরত আবু বকর সিদ্দিক (রা) হযরত মুহাম্মদ (স.)-এর হিজরতের সাথী ছিলেন। রাসূল (স.) হিজরতের আদেশ

প্রাপ্ত হন এবং হযরত আবু বকর সিদ্দিক (রা) - কে অবগত করেন। তিনি রাসুল (স.) থেকে হিজরতের কথা শনার পর রাতে আর ঘুমাতে না, অপেক্ষায় থাকতেন কখন রাসুল (স.) এসে তাঁর সাথে হিজরত করার জন্য ডাক দিবেন। গভীর রাতে তিনি রাসুল (স.)-এর ডাকে সাড়া দেন এবং উভয়ে হিজরতের উদ্দেশ্যে বের হন। পথিমধ্যে তারা কাফির শত্রুদের হাত থেকে রক্ষা পেতে সাওর নামক পর্বতের গুহায় আশ্রয় নেন। সেখান থেকে মদিনায় হিজরত করেন।

খলিফা নির্বাচন

হযরত মুহাম্মদ (স.)-এর ওফাতের পর হযরত ওমর (রা) ও অন্য সাহাবিগণ হযরত আবু বকর (রা)-কে খলিফা নির্বাচনের ব্যাপারে পরামর্শ করে তাঁকে ৮ই জুন ৬৩২ খ্রিস্টাব্দে মুসলিম জাহানের প্রথম খলিফা নির্বাচন করেন। রাসুল (স.)-এর ওফাতের পর মুসলমানদের মধ্যে বিভিন্ন সমস্যার সৃষ্টি হয়। এ সময় কিছু লোক নবি হওয়ার মিথ্যা দাবি করে, আবার কেউ কেউ যাকাত দিতে অস্বীকৃতি জানায়, কেউ কেউ ইসলাম ত্যাগ করে। হযরত আবু বকর সিদ্দিক (রা) কঠোরভাবে সমস্ত বিশৃঙ্খলা দূর করেন ও শান্তি স্থাপন করেন। তার শাসনামলে ৬৩৩ খ্রিস্টাব্দে ইয়ামামার যুদ্ধ শুরু হয়। এ যুদ্ধে অনেক হাফেজ ও ক্বারি সাহাবি শহিদ হন। এরপর তিনি কুরআন সংরক্ষণ ও সংগ্রহ করার জন্য হযরত য়ায়েদ বিন ছাবিত (রা)-কে নির্দেশ দেন। হযরত য়ায়েদ বিন ছাবিত (রা) আদেশপ্রাপ্ত হয়ে বিভিন্ন সাহাবি থেকে কুরআনের আয়াতসমূহ সংগ্রহ করেন এবং তা গাছের বাকলে, হাড়ে ও চামড়ায় লিখে রাখেন। হযরত আবু বকর (রা) এটির একটি কপি উম্মুল মোমেনিন হযরত হাফসা (রা)-এর নিকট গচ্ছিত রাখেন।

ওফাত

হযরত আবু বকর সিদ্দিক (রা) ২৩ আগস্ট ৬৩৪ খ্রিস্টাব্দে মৃত্যুবরণ করেন। তিনি ৬৩ বছর জীবিত ছিলেন। তাকে হযরত আয়েশা (রা)-এর কামরায় হযরত মুহাম্মদ (স.)-এর পাশে মদিনায় সমাহিত করা হয়।

রাসুল (স.)-এর ওফাতের পর হযরত আবু বকর (রা) ইসলাম রক্ষায় অসাধারণ ভূমিকা পালন করেন। তাঁর আদর্শ সকল মানুষের জন্য অনুসরণীয় ও অনুকরণীয়।

কাজ : শিক্ষার্থীরা শ্রেণিকক্ষে হযরত আবু বকর (রা)-এর চরিত্রের দুটি গুণ লিখে একটি প্ল্যাকার্ড তৈরি করবে।

পাঠ ৩

হযরত উমর ফারুক (রা)-এর জীবনাদর্শ

পরিচয়

হযরত উমর ফারুক (রা) ছিলেন মুসলিম জাহানের দ্বিতীয় খলিফা। তিনি ৫৮৩ খ্রিস্টাব্দে কুরাইশ বংশের আদি গোত্রে জন্মগ্রহণ করেন। তাঁর ডাকনাম আবু হাফস, পিতার নাম খাতাব, মাতার নাম হান্তামা। ইসলাম গ্রহণের পর তিনি ফারুক (সত্য-মিথ্যার পার্থক্যকারী) উপাধিতে ভূষিত হন। বাল্যকালে তিনি উট চড়াতে, যৌবনের শুরুতে যুদ্ধবিদ্যা, কুস্তি, বক্তৃতা ও বংশ তালিকা সম্পর্কে পারদর্শী ছিলেন। হযরত মুহাম্মদ (স.)-এর নবুয়ত প্রাপ্তির সময় কুরাইশ বংশে ১৭ জন ব্যক্তি লেখাপড়া জানতেন, তিনি তাঁদের মধ্যে ছিলেন অন্যতম।

ইসলাম গ্রহণ

হযরত উমর ফারুক (রা) ইসলাম গ্রহণের আগে আবু জাহালের নেতৃত্বে ইসলামের বিরুদ্ধে অবস্থান নেন। তিনি মুসলমানদের উপর অত্যাচার ও নিপীড়ন চালাতেন। এমনকি তাঁর চাকরানীও ইসলাম গ্রহণ করলে তিনি তার উপর নির্ধাতন করা থেকে বিরত থাকেন নি। মক্কার 'দারুন নদওয়া' বৈঠকের সিদ্ধান্ত অনুযায়ী একশত উট পুরস্কার পাওয়ার আশায় তিনি উনুজ্জ তলোয়ার হাতে মুহাম্মদ (স.)-কে হত্যার উদ্দেশ্যে বের হন। পথে নঈম ইবন আব্দুল্লাহর সাথে তাঁর সাক্ষাৎ ঘটে। নঈম বললো, 'কোথায় যাচ্ছ উমর?' উত্তরে রাগস্বরে বললেন, মুহাম্মদকে হত্যা করতে যাচ্ছি। একথা শুনে নঈম বললো, আগে তোমার ঘর সামলাও। তোমার বোন ফাতিমা ও ভগ্নিপতি সাঈদ ইসলাম গ্রহণ করেছে। তিনি অগ্নিশর্মা হয়ে বোনের বাড়ি গেলেন। তাঁর বোন ও ভগ্নিপতি তখন পবিত্র কুরআনের সুরা ত্বাহা পাঠ করছিলেন। এমতাবস্থায় হযরত উমর (রা)-এর উপস্থিতি তাদের মধ্যে ভীতির সঞ্চার করলেও তারা ইমানি চেতনা থেকে সরে যান নি। হযরত উমর (রা)-এর জিজ্ঞাসাবাদে তাঁরা কুরআন পাঠের কথা জানায়। এতে তিনি ক্ষিপ্ত হয়ে তাদের উপর আঘাত করতে থাকেন। তখন তাঁর বোনের শরীর থেকে রক্ত ঝরা দেখে তাঁর মনে দয়ার উদ্বেক হয়। হযরত উমর (রা) তাদের বললেন, তোমরা কী পাঠ করছিলে তা আমাকে দেখাও। উত্তরে তাঁর বোন বললো, কুরআন পাঠ করছিলাম। এটা পবিত্র গ্রন্থ, অপবিত্র অবস্থায় স্পর্শ করা যায় না। পরে তিনি পবিত্র হয়ে এলে তাঁকে কুরআন মাজিদ পড়তে দেয়া হয়। তখন তাঁর মনে চিস্তার পরিবর্তন হয়। তিনি তখন ইসলাম গ্রহণের উদ্দেশ্যে রাসূল (স.)-এর নিকট যাওয়ার আশ্রয় প্রকাশ করেন। সে সময় রাসূল (স.) সাফা পাহাড়ের পাদদেশে হযরত আকরাম (রা)-এর বাড়িতে অবস্থান করছিলেন। কোষমুক্ত তরবারিসহ হযরত উমর (রা)-এর উপস্থিতি সাহাবিদের মধ্যে আতঙ্ক সৃষ্টি করে। হযরত উমর (রা) রাসূল (স.)-এর পায়ের কাছে কম্পিত কণ্ঠে বললেন, "হে আল্লাহর নবি! আমাকে ইসলামে দীক্ষিত করুন। যে তরবারি নিয়ে আপনার শিরশ্ছেদের উদ্দেশ্যে বের হয়েছিলাম, আজ হতে সে তরবারি উমরের হাতে ইসলামের শত্রু নিধনে ব্যবহৃত হবে।" হযরত উমর (রা) হযরত মুহাম্মদ (স.)-এর হাতে তখন ইসলাম গ্রহণ করেন। মূলত তাঁর ইসলাম গ্রহণ ছিল হযরত মুহাম্মদ (স.)-এর দোয়ারই ফল। রাসূল (স.) তার জন্য এভাবে দোয়া করেন, "হে আল্লাহ! উমর বিন হিশাম (আবু জাহাল) অথবা উমর ইবনুল খাতাব এ দু'জনের একজনকে ইসলামে প্রবেশ করার তৌফিক দিয়ে ইসলামকে শক্তিশালী করুন।"

খলিফা নির্বাচন

ইসলামের প্রথম খলিফা আবু বকর সিদ্দিক (রা)-এর ইস্তিকালের পরে তাঁর অন্তিম ইচ্ছা অনুযায়ী হযরত উমর (রা)

৬৩৪ খ্রিস্টাব্দে ইসলামের দ্বিতীয় খলিফা নির্বাচিত হন। তা অধিকাংশ সাহাবি সমর্থন করেন।

শাসন ব্যবস্থা

হযরত উমর (রা) খলিফা নির্বাচিত হওয়ার পর মুসলিম সাম্রাজ্য বিস্তারের ধারাবাহিকতা অব্যাহত থাকে। এ সময় রোম, পারস্য, সিরিয়া, মিশর ও ফিলিস্তিন মুসলিম সাম্রাজ্যভুক্ত হয়। রাজ্য শাসনে তিনি রাসুল (স.)-এর আদর্শ অনুসরণ করতেন। আইনের চোখে সকলকে সমানভাবে দেখতেন। এমনকি মদ্যপানের অপরাধে স্বীয় পুত্র আবু শামাকে শাস্তিদানে বিন্দুমাত্র দ্বিধা করেন নি। ন্যায়বিচার প্রতিষ্ঠায় তিনি ছিলেন যেমন কঠোর তেমনি মানুষের দুঃখ-কষ্টে তিনি ছিলেন অতি কোমল। তিনি সাধারণ প্রজাদের অবস্থা জানার জন্য রাতের আঁধারে একাকী বের হয়ে পড়তেন। প্রয়োজনে তিনি নিজের কাঁধে খাদ্যসামগ্রী বহন করে গরিব-দুঃখী মানুষের মাঝে বিতরণ করতেন। তাঁর শাসনামলে রাজ্যে কোনো অভাব-অনটন ছিল না। সে সময় কৃষিকাজে ব্যাপক উন্নতি হয়েছিল। তিনি ডাক বিভাগ প্রবর্তন, সাম্য ও ন্যায়ের বাস্তব শাসন প্রতিষ্ঠা করেন। তিনি হিজরী সন প্রবর্তন করেন। জনকল্যাণে তিনি অসংখ্য মসজিদ, বিদ্যালয়, সেতু, সড়ক, হাসপাতাল নির্মাণ করেন। পানির জন্য তিনি অনেক খালও খনন করেন। তাঁর সময়েই আরবে সর্বপ্রথম আদমশুমারি চালু হয়। ইনসাফ প্রতিষ্ঠায় তিনি বাইতুলমাল থেকে প্রাপ্ত কাপড় সেই পরিমাণ গ্রহণ করতেন যে পরিমাণ সকলের জন্য নির্ধারিত ছিল। তাছাড়া জেরুজালেমে যাওয়ার পথে ভৃত্যকে উটের পিঠে চড়িয়ে নিজে উটের রশি ধরার দৃষ্টান্ত একজন ন্যায়পরায়ণতা শাসকের বিরল ঘটনা। ঐতিহাসিক হিট্রি বলেন, “অল্প কথায় বলা যায়, হযরত উমর (রা)-এর সরলতা ও কর্তব্যজ্ঞান ছিল তাঁর জীবনাদর্শ। ন্যায়পরায়ণতা তা ও একনিষ্ঠতা ছিল তাঁর শাসনামলের মূলনীতি।”

চারিত্রিক গুণাবলি

হযরত উমর (রা) খুব সহজ সরল ও অনাড়ম্বর জীবনযাপন করতেন। অর্ধপৃথিবীর শাসক হয়েও তাঁর কোনো দেহরক্ষী ছিল না, খেজুরপাতার আসন ছিল তাঁর সিংহাসন। জনসেবাই ছিল তাঁর ব্রত। ইবাদত বন্দেগিতে অতিবাহিত হত তাঁর অধিকাংশ সময়। জাগতিক লোভ-লালসা ও জাঁকজমক তাঁকে স্পর্শ করে নি। তাঁর মধ্যে কঠোরতা ও কোমলতার ব্যাপক সমন্বয় ঘটেছিল।

শাহাদতবরণ

হযরত উমর (রা)-এর গৌরবময় শাসনামলে দশম বছরে মসজিদে নববিতে ফজরের নামায আদায় করছিলেন। এমতাবস্থায় কুফার শাসনকর্তা মুগীরার ভৃত্য লুলুর বিষাক্ত ছুরিকাঘাতে আহত হন। তিনি আহত হওয়ার তৃতীয় দিন হিজরী ২৩ সনের ২৭ জিলহজ্জ বুধবার (৩রা নভেম্বর) ৬৩ বছর বয়সে শাহাদতবরণ করেন। হযরত ইবন মাসউদ (রা) বলেন, “আমার ধারণা হযরত উমর (রা) যখন দুনিয়া হতে বিদায় নিয়েছেন, তখন দশভাগ ইলমের নয়ভাগ তিনি সঙ্গে করে নিয়ে গেছেন।” আমরা হযরত ওমর (রা)-এর মহান আদর্শ মেনে চলব এবং সে অনুসারে জীবন গড়ব।

কাজ : শিক্ষার্থীরা হযরত উমর (রা)-এর ন্যায়বিচার ও সুশাসন সম্পর্কে বাড়ির কাজ হিসেবে একটি টীকা লিখে নিয়ে আসবে।

পাঠ ৪

হযরত খাদিজা (রা)-এর জীবনাদর্শ

পরিচয়

মহানবি (স.)-এর প্রথম স্ত্রী হযরত খাদিজা (রা)। তিনি বিখ্যাত কুরাইশ বংশের আব্দুল উয্য়া নামক পরিবারে ৫৫৬ খ্রিস্টাব্দে জন্মগ্রহণ করেন। তাঁর পিতা ছিলেন খোয়াইলিদ বিন আসাদ আরবের শ্রেষ্ঠ ধনী ব্যক্তি। তাঁর মাতা ফাতিমা বিনতে য়ায়েক। বিশ্বের ইতিহাসে যে কয়জন নারী প্রসিদ্ধি লাভ করেছেন, তিনি তাদের মধ্যে ছিলেন অন্যতম। সম্পর্কের দিক থেকে তিনি ছিলেন রাসুল (স.)-এর চাচাতো বোন। তাঁর উপাধি ছিল 'তাহিরা' (পুণ্যবতী)। পারিবারিক সূত্রে সম্পদশালিনী বলে তাঁর সুনাম ছিল সমগ্র আরবজুড়ে।

হযরত মুহাম্মদ (সা.)-এর সঙ্গে পরিচয় ও বিবাহ

হযরত খাদিজা (রা) তার ব্যবসা পরিচালনার জন্য বিভিন্ন সময় লোক নিয়োগ করতেন। তিনি মহানবি (স.)-এর সততা, আমানতদারী ও বিশ্বস্ততার কথা শুনে তাঁকে তার ব্যবসা দেখাশুনা করার জন্য অনুরোধ করেন। মহানবি (স.) তার ব্যবসার দায়িত্বভার গ্রহণ করেন। তিনি তার ব্যবসায়িক কাজে মালামাল নিয়ে সিরিয়ায় গমন করেন। এ ব্যবসায় হযরত খাদিজা (রা) ব্যাপক লাভবান হন।

হযরত মুহাম্মদ (স.) সিরিয়া থেকে ফেরার পর হযরত খাদিজা (রা) তাঁর সততা, বিশ্বস্ততা ও উন্নত চরিত্র সম্পর্কে অবগত হন। তিনি যুবক মুহাম্মদ (স.)-এর অসাধারণ চরিত্রগুণে মুগ্ধ হয়ে তাঁর সাথে বৈবাহিক সম্পর্ক স্থাপনের প্রস্তাব করেন। হযরত মুহাম্মদ (স.)-এর বয়স ছিল তখন ২৫ বছর। আর হযরত খাদিজার বয়স ছিল ৪০ বছর। রাসুল (স.)-এর চাচা আবু তালিবের সম্মতিক্রমে বিশটি উট মোহরের বিনিময়ে এ বিবাহ সম্পন্ন হয়। বিবাহের পর হযরত খাদিজা (রা) তার সকল সম্পদের দায়-দায়িত্ব রাসুল (স.)-এর ওপর ছেড়ে দেন এবং নবি কারিম (স.)-কে তাঁর ইচ্ছামত সম্পদ খরচ করার অনুমতি দেন। রাসুল (স.) অকাতরে সম্পদ গরিব-দুঃখীদের মধ্যে দান করেন।

সন্তান-সন্ততি

হযরত মুহাম্মদ (স.)-এর সাথে বয়সের ব্যবধান থাকা সত্ত্বেও তাঁদের দাম্পত্য জীবন ছিল অত্যন্ত সুখের। হযরত খাদিজা (রা) -এর গর্ভে মহানবি (স.)-এর তিন পুত্র সন্তান-কাছিম, আব্দুল্লাহ ও তাহির এবং চার কন্যা-হযরত জয়নাব, রুকাইয়া, উম্মে কুলসুম ও ফাতিমা (রা) জন্মগ্রহণ করেন। কিন্তু পুত্রগণ শৈশবেই দুনিয়া হতে বিদায় নেন। তাতে নবি কারিম (স.) অত্যন্ত মর্মান্বিত হন।

ইসলাম গ্রহণ

হযরত খাদিজা (রা) সর্বপ্রথম ইসলাম গ্রহণ করেন। হেরা গুহায় নবুওয়্যাতপ্রাপ্ত হয়ে মহানবি (স.) যখন ভীত-সন্ত্রস্ত হয়ে বাড়ি ফিরে ছিলেন তখন হযরত খাদিজা (রা) স্বীয় স্বামীর অবস্থা বুঝতে পেরে বুদ্ধিমত্তার সাথে তাঁকে এ বলে সাহায্য দেন যে, 'ভীত হওয়ার কিছু নেই, আল্লাহ আপনাকে অপদস্ত করবেন না, কেননা আপনি আত্মীয়দের সাথে সম্পর্ক বজায় রাখেন, সাহায্য করেন, মেহমানদের আপ্যায়ন করেন এবং ক্ষতিগ্রস্তদের সাহায্য করেন।' এরপর হযরত খাদিজা (রা) আসমানি কিতাবে অভিজ্ঞ ওয়ারাকা বিন নাওফেলের কাছে তাঁকে নিয়ে যান। ওয়ারাকা হেরা গুহায় সংঘটিত ঘটনা শুনে বললেন, 'ভীত হওয়ার কিছু নেই, তিনি সে 'নামুস' (জিবরাঈল) যিনি হযরত

মুসা (আ)-এর নিকট প্রেরিত হয়েছিলেন।' পরবর্তীকালে মহানবি (স.) আল্লাহর নির্দেশে ইসলাম প্রচার শুরু করলে হযরত খাদিজা (রা) সর্ব প্রথম ইসলাম ধর্ম গ্রহণ করেন। তিনি নবুয়তের দশ বছরে রমজান মাসে মৃত্যুবরণ করেন। তার মৃত্যুতে নবি কারিম (স.) গভীরভাবে শোকাহত হন।

চারিত্রিক গুণাবলি

হযরত খাদিজা (রা) জাহেলি যুগে জনগ্রহণ করেও সং চরিত্রের অধিকারিণী ছিলেন। কখনো কোনো অন্যায় ও অশ্লীল কাজে যোগ দেননি। মহানবি (স.)-এর প্রতি ছিল তাঁর প্রবল ভালোবাসা। তিনি ইসলাম প্রচারে হযরত মুহাম্মাদ (স.)-কে সাহস ও উৎসাহ প্রদান করতেন। ইসলামের খাতিরে তাঁর সকল সম্পদ দান করার কারণে আল্লাহ তাঁর উপর সন্তুষ্ট ছিলেন। হযরত খাদিজা (রা)-এর স্বামীভক্তি ছিল অতুলনীয়। যখন রাসুল (স.) বাইরে যেতেন তিনি ফিরে না আসা পর্যন্ত ব্যাকুল হয়ে অপেক্ষা করতেন। আবার তিনি (স.) কখনো বিমর্ষ অবস্থায় বাড়ি ফিরলে হযরত খাদিজা (রা) তাঁকে সহানুভূতির সাথে সান্ত্বনা দিতেন ও সাহস যোগাতেন।

শ্রেষ্ঠত্ব

মহানবি (স.) বলেছেন: হযরত খাদিজা (রা) বিশ্বের শ্রেষ্ঠ নারী (বুখারি)। একদা হযরত জিবরাঈল (আ) হযরত খাদিজা (রা) সম্পর্কে রাসুল (স.)-কে বললেন, তাঁর প্রভু (আল্লাহ) এবং আমার পক্ষ থেকে তাঁকে শুভেচ্ছা জানাবেন এবং তাকে জান্নাতের সুসংবাদ দিবেন (বুখারি-মুসলিম)। আরও বর্ণিত আছে যে, একদা হযরত আয়েশা (রা)-এর এক অভিমানের জবাবে রাসুল (স.) বলেন, 'না, আল্লাহ খাদিজার চেয়ে কোনো মহৎ নারী আমাকে দেননি। তিনি এমন সময় আমাকে বিশ্বাস করেছিলেন, যখন সবাই আমাকে মিথ্যাবাদী বলে আখ্যা দিয়েছেন। আমার বিপদের দিনে সবাই যখন আমাকে নিরাশ করেছে তখন তিনি আমাকে অর্থ সাহায্য করেছেন।' (মুসনাদে আহমদ) অন্য এক হাদিসে হযরত আনাস (রা) থেকে বর্ণিত, তিনি বলেন, 'নবি কারিম (স.) বলেছেন, 'বিশ্বের সকল নারীর উপর চার জনের সম্মান রয়েছে- হযরত মারিয়াম (আ), হযরত খাদিজা (রা), হযরত ফাতিমা (রা) ও হযরত আসিয়া (রা)। বর্তমান বিশ্বের নারীগণ যদি হযরত খাদিজা (রা)-এর আদর্শ অনুসরণ করে, তাহলে তাদের পারিবারিক ও সামাজিক জীবন অনেক সুন্দর হবে।

কাজ : হযরত খাদিজা (রা)-এর উত্তম গুণাবলির আলোকে একটি তালিকা তৈরি করবে।

পাঠ ৫

হযরত ইমাম আবু হানিফা (র)-এর জীবনাদর্শ

জন্ম পরিচয়

হানাফি মাযহাবের প্রতিষ্ঠাতা ইমাম আবু হানিফা (র) ৮১ হিজরী ৭০০ খ্রিস্টাব্দে ইরাকের কুফা নগরীতে জন্মগ্রহণ করেন। তাঁর আসল নাম নোমান, পিতার নাম ছাবিত। কিন্তু তিনি আবু হানিফা নামে খ্যাত।

শৈশবকাল

জন্মগতভাবেই ইমাম আবু হানিফা (র) অসাধারণ মেধার অধিকারী ছিলেন। তিনি অল্প বয়সেই পবিত্র কুরআনের হাফিয হন। তিনি কুরআন হাদিস ও ফিকহশাস্ত্রে গভীর জ্ঞান অর্জন করেন। তিনি তৎকালীন মুহাদ্দিস ও ফকিহ হাম্মাদ (র)-এর কাছে জ্ঞান লাভ করেন। তিনি কাপড়ের ব্যবসা করে জীবন নির্বাহ করতেন।

অবদান

ইমাম আবু হানিফা ছিলেন বিশ্বের সর্বশ্রেষ্ঠ ফিকহশাস্ত্রবিদ। মানুষ যাতে সহজ ও সঠিকভাবে শরিয়তের বিষয়গুলো পালন করতে পারে সে জন্যে তিনি শ্রেষ্ঠ ফিকহবিদদের সমন্বয়ে একটি 'ফিকহ সম্পাদনা পরিষদ' গঠন করেন। তাঁর সম্পাদিত প্রায় তিরিশি হাজার মাসআলা সংবলিত 'কুতুবে হানাফিয়া' রচিত হয়। ইমাম আবু হানিফা কুরআন, হাদিস, ইজমা ও কিয়াসের সমন্বয়ে যুক্তি-ভিত্তিক ও সহজ-সরল ফিকহ প্রণয়ন করেন। এ কারণে তাঁর ফিকহ মুসলমানদের নিকট অতিপ্রিয়। বিশ্বের মুসলমানদের মধ্যে তাঁর মাযহাবের অনুসারী বেশি। ইমাম আবু ইউসুফ (র), ইমাম মুহাম্মদ (র), ইমাম যুফার (র) ও প্রখ্যাত মুহাদ্দিস ইমাম ইবন মুবারক (র) প্রমুখ তাঁর শিষ্য ছিলেন।

ইমাম শাফেয়ী (র) তাঁর সম্পর্কে বলেন, 'মানুষ ফিকহশাস্ত্রে ইমাম আবু হানিফা (র)-এর পরিবার।' ব্যক্তি হিসাবে ইমাম আবু হানিফা ছিলেন উঁচুমানের ইবাদতকারী ও মুত্তাকি। কথায় ও কাজে তার অপূর্ব মিল ছিল। তাঁর জীবনে কোনো লোভ-লালসা ছিল না। তিনি অত্যন্ত সহজ-সরল ও অনাড়ম্বর জীবন-যাপন করতেন।

আব্বাসি খলিফা আল মানসুর তাঁকে প্রধান বিচারপতির পদ গ্রহণের প্রস্তাব করেন। তিনি অত্যন্ত দৃঢ়তার সাথে তা প্রত্যাখ্যান করেন। এ কারণে তাঁকে দৈহিক নির্যাতন ও কারাবরণ করতে হয়। তিনি ১৫০ হিজরী ৭৬৭ খ্রিস্টাব্দে খলিফা আল মানসুর কর্তৃক প্রয়োগকৃত বিষক্রিয়ার ফলে কারাগারেই শাহাদতবরণ করেন।

আমরা ইমাম আবু হানিফা (র) সম্পর্কে আরও বেশি জানব এবং তাঁর ফিকহশাস্ত্রের উপর জ্ঞান লাভ করে সুন্দর জীবন গড়ব।

কাজ : শিক্ষার্থীরা শৈগিকক্ষে বসে ইমাম আবু হানিফা (র)-এর ফিকহশাস্ত্রে জ্ঞানের জনপ্রিয়তা লাভের কারণগুলো চিহ্নিত করবে।

পাঠ ৬

হযরত আব্দুল কাদের জিলানী (র)-এর জীবনাদর্শ

হযরত আব্দুল কাদের জিলানী (র) ৪৭০ হিজরী মোতাবেক ১০৭৭ খ্রিস্টাব্দে ইরানের জিলান শহরে জন্মগ্রহণ করেন। জন্মস্থানের নামানুসারে তাকে জিলানী বলা হয়। তার উপনাম আবু সালেহ, উপাধি মুহিউদ্দীন, কুতুবে রাব্বানি ইত্যাদি। তার পিতার নাম আবু সালেহ মুসা। তিনি হযরত ফাতেমা (রা.)-এর পুত্র ইমাম হাসান (রা.)-এর বংশধর ছিলেন। তাঁর মাতার নাম উম্মুল খায়ের ফাতিমা। তিনি ইমাম হোসাইন (রা.)-এর বংশধর ছিলেন। এজন্যে হযরত আব্দুল কাদের জিলানী (র.)-কে আওলাদে রাসুল বলে গণ্য করা হয়।

এ মহান গুলি বাল্যকাল হতেই শান্ত, নম্র, ভদ্র, চিন্তাশীল ও জ্ঞানানুরাগী ছিলেন। শৈশবে তিনি কুরআন মুখস্থ করেন। জিলানে প্রাথমিক শিক্ষা সমাপ্ত করার পর ১৮ বছর বয়সে উচ্চ শিক্ষা লাভের উদ্দেশ্যে বাগদাদ গমন করেন। নিজামিয়া মাদ্রাসায় ভাফসির, হাদিস, ফিকহ, উসূল, ধর্মতত্ত্ব, তর্কশাস্ত্র, ইতিহাস ও দর্শনে উচ্চ শিক্ষা লাভ করেন।

হযরত আব্দুল কাদের জিলানী (র.) সাধারণ মানুষ থেকে ব্যতিক্রমী একজন মহান সাধক ও তাপস হবেন তা তার শৈশবকালের একটি কাহিনী থেকে বোঝা যায়। বর্ণিত রয়েছে যে, দুগ্ধপোষ্য অবস্থায় তিনি রমযান মাসে দিনের বেলায় মাতৃদুগ্ধ পান হতে বিরত থাকতেন। তাঁর মা তাকে দুধ পান করাতে গেলে তিনি মুখ ফিরিয়ে নিতেন।

হযরত আব্দুল কাদের জিলানী (র.) শরিয়তের জ্ঞানার্জনের পর মা'রেফাতের (আধ্যাত্মিক) জ্ঞান লাভের জন্য বাগদাদের সুফি-দরবেশদের দরবারে যাতায়াত শুরু করেন। তার সাথে সাধক হযরত হাম্মাদান (রা.)-এর পরিচয় ঘটে। তিনি তাঁর সাহচর্যেই সুফি-তত্ত্বে জ্ঞান লাভ করেন।

হযরত আব্দুল কাদের জিলানী (র.) আধ্যাত্মিক সাধনার জন্য ২৫ বছর লোক-চক্ষুর অন্তরালে চলে যান। ৫২১ হিজরীর শেষ ভাগে পুনরায় লোকালয়ে ফিরে আসেন এবং দীন প্রচার শুরু করেন।

হযরত আব্দুল কাদের জিলানী (র.)-এর নিকট শিক্ষা লাভের জন্য অসংখ্য আলেম সমবেত হতেন। তিনি বুধবার স্থানীয় ঈদগাহে সকাল বেলায় বক্তৃতা করতেন। কিন্তু শ্রোতার সংখ্যা বেড়ে যাওয়ায় ঈদগাহটির আয়তন বৃদ্ধি করা হয় এবং সেখানে একটি মুসাফিরখানাও স্থাপন করা হয়।

জীবনের শেষ দিকে তিনি দিনের বেলায় খুতবা ও ফতোয়া প্রদানে ব্যস্ত থাকতেন। নিষিদ্ধ পাঁচ দিন ব্যতীত সারা বছর রোযা রাখতেন।

তিনি ছিলেন অভাবীদের প্রতি সহানুভূতিশীল। তার ছাত্রজীবনে বাগদাদে অনটন দেখা দেয়। তিনি তার নিকট থাকা স্বর্ণমুদ্রা হতে অভাবীদেরকে দান করতেন এবং নিজে খেয়ে না খেয়ে জীবন অতিবাহিত করতেন। অসহায়দের প্রতি তার দরদ কেমন ছিল, তা তার কথা থেকে বোঝা যায়। তিনি বলেন, “আফসোস তোমার নিকট পুরোদিনের খাবার মওজুদ আছে। অথচ তোমার নিকটতম প্রতিবেশী উপবাস থাকছে। তোমার ইমান অসম্পূর্ণ থেকে যাবে যদি তুমি নিজের জন্য যা চাও অন্যের জন্য তা না চাও।”

এ মহান ওলি বড়পীর নামে প্রসিদ্ধ। তিনি ৯০ বছর বয়সে ৫৬১ হিজরী সনের ১১ই রবিউস সানি তারিখে ইস্তিকাল করেন। তার মাজার বাগদাদে অবস্থিত। দক্ষিণ এশিয়ায় তার মৃত্যুদিবস ফাতেহা-ই-ইয়াজদাহম নামে পালিত হয়। বাংলাদেশে এই দিনে শিক্ষা প্রতিষ্ঠানসমূহে সরকারিভাবে ছুটি থাকে। আমরা বড়পীর হযরত আব্দুল কাদের জিলানী (র.)-এর আদর্শে আমাদের জীবন গড়ব, সদা সর্বদা সত্য কথা বলব, অভাবী ও দুস্থদের সাহায্য ও সেবা করব।

কাজ : শিক্ষার্থীরা শ্রেণিকক্ষে হযরত আব্দুল কাদের জিলানী (র.)-এর চরিত্রের মহৎ গুণাবলির একটি তালিকা তৈরি করবে।

অনুশীলনমূলক প্রশ্ন

শূন্যস্থান পূরণ কর :

- ১ . হযরত মুহাম্মদ (স.) খ্রিস্টাব্দে জন্মলাভ করেন ।
- ২ . পুরুষদের মধ্যে সর্বপ্রথম ইসলাম গ্রহণ করেন..... ।
- ৩ . হযরত উমর (রা) খ্রিস্টাব্দে খলিফা নির্বাচিত হন ।
- ৪ . হযরত খাদিজা (রা)-এর উপাধি ছিল ।
- ৫ অল্প বয়সেই পবিত্র কুরআনের হাফিয হন ।

বাম পাশ থেকে শব্দ বা বাক্যাংশ নিয়ে ডান পাশের সাথে মিল কর :

বাম পাশ	ডান পাশ
১ . নারীদের কোনো সামাজিক	শান্তির কথা ভাবতেন ।
২ . মনিবরা ক্রীতদাসদের প্রতি অমানুষিক	নির্যাতন চালাত ।
৩ . হযরত মুহাম্মদ (স.) সকল জীব-জন্তুর	অধিকার ছিল না ।
৪ . জাতি একটি ভয়াবহ যুদ্ধ হতে	বেঁচে গেল ।
৫ . হযরত মুহাম্মদ (স.) শৈশবকাল হতেই মানুষের	উপকারী বন্ধু ছিলেন ।

সংক্ষিপ্ত উত্তর প্রশ্ন :

- ১ . আদর্শ জীবন চরিতের বৈশিষ্ট্য কী ?
- ২ . হযরত মুহাম্মদ (স.)-এর জন্মলগ্নে আরবের সামাজিক অবস্থার সংক্ষেপে বর্ণনা দাও ।
- ৩ . হযরত আবু বকর (রা)-এর সত্যবাদিতার সংক্ষিপ্ত পরিচয় দাও ।

বর্ণনামূলক প্রশ্ন :

- ১ . শান্তি প্রতিষ্ঠায় মহানবি (স.)-এর ভূমিকা কী ছিল ? বর্ণনা কর ।
- ২ . ন্যায়বিচার ও সুশাসন প্রতিষ্ঠায় হযরত উমর ফারুক (রা)-এর ভূমিকা আলোচনা কর ।
- ৩ . 'ফিকহশাক্তে' হযরত ইমাম আবু হানিফা (রা)-এর অবদান আলোচনা কর ।

বহুনির্বাচনি প্রশ্ন :

১. হযরত আব্দুল কাদের জিলানী (র.) কত হিজরী সনে জন্মগ্রহণ করেন ?

- ক. ৪৬০
খ. ৪৭০
গ. ৪৮০
ঘ. ৪৯০

২. ইমাম আবু হানিফা (র.)-এর জন্মস্থান কোথায় ?

- ক. বসরায়
- খ. দামেস্কে
- গ. কুফায়
- ঘ. বাগদাদে

৩. 'কুতুবে হানাফিয়া'-

- i. সহজ সরল ফিক্‌হ
- ii. ইমাম যুফার (র.) সম্পাদনা করেন
- iii. তিরিশি হাজার মাসআলা সংবলিত ফিক্‌হ

কোনটি সঠিক-

- ক. i
- খ. ii
- গ. i, ii
- ঘ. i, ii ও iii

নিচের অনুচ্ছেদটি পড়ে ৪ ও ৫ নম্বর প্রশ্নের উত্তর দাও :

সিরাজ সাহেব তার দুই ছেলের বিরুদ্ধে অভিযোগ প্রমাণিত হলে তিনি তাকে কঠিন শাস্তি দেন ।

৪. সিরাজ সাহেবের কাজের মাধ্যমে কোন সাহাবির আদর্শ ফুটে উঠেছে ?

- ক. হযরত আবুবকর (রা.)
- খ. হযরত উমর (রা.)
- গ. হযরত ওসমান (রা.)
- ঘ. হযরত আলী (রা.)

৫. সিরাজ সাহেবের আখলাকে হামিদার কোন গুণটি প্রকাশ পেয়েছে ?

- ক. ন্যায়পরায়ণতা
- খ. কর্তব্যপরায়ণতা
- গ. সততা
- ঘ. নিয়মানুবর্তিতা ।

নিচের অনুচ্ছেদটি পড়ে ৬, ৭ ও ৮ নম্বর প্রশ্নের উত্তর দাও :

রূপনগর গ্রামে প্রভাব বিস্তার নিয়ে জসিম ও সিরাজ গ্রুপের মধ্যে সংঘাত লেগেই থাকে । এক পর্যায়ে খালেদ নামক এক তরুণ প্রহৃত হয় । এ দৃশ্য দেখে শান্তিপ্রিয় তরুণ কামালের মাঝে চিন্তার উদ্রেক হয় । সে এলাকায় শান্তি-শৃঙ্খলা প্রতিষ্ঠার জন্য কিছু তরুণকে সঙ্গে নিয়ে 'বিজয়' নামক একটি সংঘ প্রতিষ্ঠা করে ।

৬. নিচের কোনটির সঙ্গে কামালের সংঘের মিল রয়েছে ?

- ক. মক্কা বিজয়
- খ. মদিনা সনদ
- গ. হোদায়বিয়ার সন্ধি
- ঘ. হিলফুল ফুজুল ।

৭. কামালের প্রচেষ্টার মাধ্যমে সমাজে মূলত -
 ক. উন্নয়ন আসবে
 খ. শান্তি প্রতিষ্ঠা হবে
 গ. বিজয় অর্জিত হবে
 ঘ. শুভচেতনার উদয় হবে ।
৮. কামাল এলাকার মানুষের কাছ থেকে পাবে -
 i. প্রশংসা
 ii. সম্পদ
 iii. গ্রহণযোগ্যতা ।

কোনটি সঠিক -

- ক. i, ii
 খ. i, iii
 গ. ii, iii
 ঘ. i, ii ও iii

সৃজনশীল প্রশ্ন :

১. সাঈদ সাহেব একজন ধর্মপরায়ণ ব্যক্তি । তিনি পবিত্র কুরআনের শিক্ষা প্রসারে এলাকায় একটি মসজিদ প্রতিষ্ঠা করেন । তিনি এলাকার গরিব-দুঃখীদের অবস্থা চিন্তা করে একটি দাতব্য চিকিৎসালয় প্রতিষ্ঠা করেন । তার স্ত্রী আফরোজা স্বামীর কাজকর্মে মুগ্ধ হয়ে নিজের ব্যক্তিগত সমস্ত সম্পদ আল্লাহর সন্তুষ্টি অর্জনের লক্ষ্যে দাতব্য চিকিৎসালয়ে দান করে দেন ।
 ক. ইমাম আবু হানিফার পিতার নাম কী ?
 খ. হযরত উমর (রা.)-কে ফারুক বলা হয় কেন ?
 গ. কোন মনীষীর আদর্শের সাথে সাঈদ সাহেবের কাজের মিল রয়েছে ? ব্যাখ্যা কর ।
 ঘ. আফরোজার কার্যক্রম তোমার পাঠ্যপুস্তকের আলোকে মূল্যায়ন কর ।
২. জনাব আবু জাফর চৌধুরী ও জনাব আবুল কাসেম চৌধুরী পাশাপাশি দুই ইউনিয়ন পরিষদের চেয়ারম্যান । জনাব আবু জাফর চৌধুরী গভীর রাতে বের হয়ে জনসাধারণের অবস্থা পর্যবেক্ষণ করতেন । অপরপক্ষে জনাব আবুল কাসেম চৌধুরী দীনের কাজে তার অর্জিত সম্পদ অকাতরে বিলিয়ে দিতেন ।
 ক. হযরত মুহাম্মদ (স.)-এর দাদার নাম কী ?
 খ. মহানবি (স.)-কে কেন 'আল-আমিন' বলা হয় ?
 গ. জনাব আবু জাফর চৌধুরীর কাজটি ইসলামের কোন খলিফার সাথে সাদৃশ্যপূর্ণ? ব্যাখ্যা কর ।
 ঘ. জনাব আবুল কাসেম চৌধুরীর চারিত্রিক বৈশিষ্ট্যটি আদর্শ জীবন চরিত্রের আলোকে বিশ্লেষণ কর ।

সমাপ্ত



অশান্তি যুদ্ধ হতেও গুরুতর
আল-কুরআন

বঙ্গবন্ধুর স্বপ্ন- দারিদ্র্য ও নিরক্ষরতামুক্ত সোনার বাংলাদেশ গড়তে
নিজেদের যোগ্য নাগরিক হিসেবে গড়ে তোল

- মাননীয় প্রধানমন্ত্রী শেখ হাসিনা



২০১০ শিক্ষাবর্ষ থেকে সরকার কর্তৃক বিনামূল্যে বিতরণের জন্য

মুদ্রণে :